

Joni

Yagaala Tewaanya' Joni yidavakesi.

Gotiyarine Yagaalyai (Jizaazai) mwaalikerinesi.

1 ¹Sinnawi kigaakuna Kwaaka dava' mima'nyawi Gotiyarine Yagaalyai mwalyaakewinyi. Nabaai, Gotiyai mwaalakewi gaminyawi Gotiyarine Yagaalyai mwaali'. Gotiyarine Yagaalyai sahwai Gotiyai.

²Sinnawi kigaakuna aayawidaasi Gotiyalyi sahwai mwalibainyina yaakelyi. ³Gotiyai sara kyawira' sahwai yuyangi sara wakinikengi. Aane piri' kiri' gami saba yima'naka' mi'. Aawa, sahwai wakakengi yuya sa. ⁴Sinnawi sagaa' sahwari gaalyabwi warakelyi. Gaala sabwi a'mwe yuyaraavire Baakelyi. Yinika sai a'mweinaavina kunya tewaanya yawiryane nejaavinikerina. Kunya tewaanya yawiryane wijaavina kaneya' baaka savi nayaa mwaidaanyaine. (Gotiyarina nayaa yawi'daanyaine.) ⁵Saburidaasi jihinya kayaa'nanyaburi Gotiyare baake' wannyina. Nabaai jihinya sa' baakevi mwavilayinikesi.

⁶Gotiyai yawi'na "A'mwera baakevi mwaabika!" yawiraka sinnawi a'mweri widaasakelyi. Sai Joni (Bavitaaziya Yadei) widaasakelyi. ⁷A'mwe sahwai jalikurakya'nei bina. "A'mweraavi a'mwengi Jizaazai Baakerina wijalikurakana!" daka widaasakei bina. "Kadika wi'napiji Naangeri limwagapika!" dakei bina. ⁸Joni gami sai Baakei mika! Aawa. "Baaka nawi'nya sarina jalikurakana!" dakelyira. ⁹Divi Baakei Kwaaka davakina walaabaka a'mwe gazainazainaavina Baaka nebulya'nanyalyi. A'mwe yuyainaavi kunya tewaanya yawiryane nejaavadei.

¹⁰Nabaai, Kwaaka davaki sai bamwaaina ya'. Sinnawi Gotiyai kyawira' sahwai Kwaaka dava' sara wakina. Sara wakina yaka bamwaaina kya' kiri' Kwaaka davaki mwaalyara gami sahwari myawiramaari yesalyi. ¹¹Gannya Anga Yizirelina bina yaka bamwaaidisi gamijiyara mamaari. ¹²Sara yina yeva mamaari kye' kiri' a'mwera pwara

“Nebulyasira. Naangelyira,” deva maarina ye!. Maarina kye! sai yuya saraavina gannya diraginyabwi wijaavina ya!. Gannya diraginya sabwi sahvara Gotiyare kaimiraayara yima'nya'nebulyi. Gami sahwarinaji gamire yayavinaji limwaga'divisaraavinebulyi. Yi sahvara mudikera yima'nyina ye!. ¹³A'mweraavire yisavakaavidaasi tawengina mudikera mima'nyina. Aawa. Kilaakejikiya sidusaburi mudikera mima'nyina. Aawa. A'mweraavire diraginyavi mudikera mima'nyina. Aawa. Gotiyai gevwi yawi'na “Sahvara nimire kaimiraayara mudikeraavi yawakinima!” kadini! yima'nigavinikengi.

¹⁴Gotiyarine Yagaalyai a'mwe kilaa'nakei yima'nyina yakei neminyawi gannya seli ange! yiladaakuna. Gamire kilaakejiki wilamwaaina yina yada tinna dara wangano! “O, Nawi'nyai diraginaangei daaka!” Sara dadaa gamire byaannyavi tinna wangano. Ganimaangeridaa'nyai gavei yamakinarikabaabita byaanna sasi. Sahwari yuneba yanga gaimwangebulyi nebulyabulyi maanga yeku'nikelyi.

¹⁵A'mwe Joni gaminyina nejalikurakada jaka dara danganna “A'mwe dazarina yihithelyi. Nimi Gotiyare yagaala kyihithiwa diviya pwai bozi yihiziwaakadei Naangelyi. Nimi sahwainyi mika! Nimi maalikeinyira. Nimi mima'nyagaa' kuna mwalyaake'na Sinnawinyalyi.”

¹⁶Sahwai maanga yeku'nikevidaa'nyi nemi yuyainaavina wana nawi'nya nejaavade'na tewaanna mwaiho. Neminyina gamire yanga gaimwagaimwange' nejaavada nejaavinikelyi. ¹⁷Sare! Gotiyai kujaa' Ne Mozizai Gotiyare Kiwinya tewaanya' wijaavina. Wijaavina neyinike! neminyawinna Gotiyai Kiraazitiya Jizaazari widasaabina. Widasaabina kyini! sahwari neminyina yanga gaimwangebulyi nebulyabulyi yima'ninike'nanyi.

¹⁸Gotiyari a'mwe Kwaaka davakiyaina wangadaanyarina mi!. Aane pwai kwai tinna mwanganyi. Aawa, Gotiyai gavei Ganimaangeryaba kusimaginna mwaalikei neminyi yibwaridaakwia neyikelyi.

Joni a'mweraavi aalya' yadei widinike'nesi.

(Matiyui 3:1-12; Maaki 1:7,8; Luki 3:15-17)

¹⁹Jonimire jalikurakya daresi. Jonimiyawinna Juyara Anga Jeruzaalemi mwaalya naangera a'mwe pwaraavi widaasina. Gotiyarina mubithika yira'divisaraaviji Gotiyare Angevi widaayadivisara Livaayaraaviji widaasina. Mi'na widaasina kye! wina yina yeva Jonimi yiwaara'na “Gimi bewaiginaka?” ²⁰Yiwaara'na kye! Joni “Yagaala sa' madiwinera!” myawiri yaka aangyagaala nebulya! kave nayaa widina “Nimi Gotiyai Nyidahilakyaaka Kiraazitiyainyi mika!” ²¹Sara yiwaara'na “Nabaai, bewaiginaka? Ne Yilaajaigi daaka?” Sara yiwaara'na kye! Joni widina “Aawa, nimi mika!” Sahwara widina “Gotiyari nayaa wi'nanewiwaakade naangerina yemwaaio sahwaigi daa?” Widina kye! ma'maa'na “Aawa!” ²²Sarevidaa'nyi gaminyi widina “Dinedana! Bewaiginaka?”

'Nedasiwaasaraavi ja'nawija' nayaa widaana!' dona gyiwaara'manigo. Sahwaigi giminyina be yagaala dimanigin'yavaka?" ²³Widina kye! sai widina "Nimi sainyi dareinyira

"A'mwamaayaba maanguraayainyi jaka widangadinyainyira.

"Naangei tuta tewaanyavi wawode'na

"Tusa' yida'na nayaa jamakwila!" '

Wi'nawijiwaakya Aazaayai niminyina sara dinikesi."

²⁴Yiwaaraveveraavi a'mwe Periziyara widaasina yesare. ²⁵Sahwara gaminyi yiwaara'na "Githahilakinika Kiraazitiyaigi mika! Gimi Ne Yilaajaigi mika! Wi'nawijiwaakya naangerina yemwaa'ho sahwaigi mika! Sarevidaa'nyi a'mweraavi aalya' baa'na yivanigina?" ²⁶Joni ma'maa'na "Aalyavi bavitaaziya' yadinyainyi. A'mwe pwai sariminyaba tinnyaba daavikeri myawiranganyivanigava. ²⁷Gami sai a'mwe naangelyi. Sinnawi nimi biweinyi, sahwai diviyai yarai bathei naangei mwaalika. Nimi gaimwange'na naangere kwaari'masivilya' yiraipurideinyi mika. Sahwarina nimi a'mwe nawi'nyainyi daaka!" sara wida' Joni.

²⁸Yuya sa Aalya Jothani kengihiri Anga Betaani Joni aalyavi bavitaaziya' yadaa'nyiyaba yima'nyina yakengi.

Jizaazai neminyina balakerinesi.

²⁹Mwanyagaa' Joni mwaalaka Jizaazai bakeri tinna wanganaasina yaka a'mweraavi widina "Yithaanyi, dazai Gotiyarei Sipizipiya Diwinyala! Kayaa'nanyanna a'mwera sipizipiyari tamina yadivi' kwaraanyaba Gotiyarina dika nasi'na yadevaai'bi' sai Kwaakevaki mwaalyainaavire kayaa'nanyanna marasisa'na baladelyi. ³⁰Sahwarina yihithadinyalyi. Nimi biweinyi, divi a'mwei bathelyi. Nimi mima'nyagaa' sai kuna mwalyaakelyi. Sai sinnawinyai Naangelyi. Nimi maalikeinyira. ³¹'Boziyai Naanga kwarinera,' yawirena gaminyi myawiranganyainyi. Aawa. 'Sahwarina Yizireliyaraavi yibwaridaakwia'na yima!' dena biwa. Aalya yihyadinyi savi dara jawiryide' 'O, sai Naangei daaka!'"

³²Joni tinna mena bahanaraka a'mwe Juyaraavi wijalikurakina "Sigunyavi Gotiyarebadaa'nyi Kuryai Tewaanyai kwaamiryaisai walaabina yaka a'mwe sari mwalibainikeri tinna wanganerineri. ³³Sinnawi gaminyi myawiranganyainyi. Aawa. Bavitaaziya'na nyidasabakei sahwai nyida' 'Divi dara dangadeiginyi. Kurya Tewaanyai a'mwe pwari bwalamwaina yaja' wangana'gizi dara jawi'de' "Ai, sai a'mweraavina Kurya Tewaanyari yanga wijaa'avadei daaka!" Gimi aalyavi bavitaaziya' jithe' sai Kuryari bavitaaziya' yadelyi.' ³⁴Sara widina nyake' tinna nayaa wangamweinyi yihizalikurakivanige. Sai Gotiyare Gawaalivaangelyi."

Jizaazarera sinnawinyaraavinesi.

³⁵Mwanyagaa' Joniji gamireraalyi sara ayaba daa'dapi Jizaazai kaanya yamarina. ³⁶Kaanya yamarina yada Joni wanganaasaka gannyaraari

widina “Yithaanyi! Sai Gotiyarei Sipizipiya Diwinyala!” ³⁷Widina kya' Jonimireraai kadika wi'nyina yagilyaraai saraai Jizaazari midinna. ³⁸Sara midinna yina yadaakilyi ginyima'naka saraai midinaabina yagilyaraari tinna wanganaka yiwaara'na “Beri'na bi'manigila?” Saraai widahi “Ravaai, anga garivi mwaaihina?” Yiviruyagaalya! “Ravaai,” yagaalya! “Nejiwaakadinyaigi,” widinikesi. ³⁹“Ravaai, anga garivi mwaaihina?” widina kyagi sai widina “Kaanya bakilyi danganyila!” Sarevidaa'nyi gamiji wina yagila gannya anga mwaaidevi tinna wanganna yagila sagaa' gaminyaba mwaalina yagi. Bina yina yagilegaa' sawitirinyagaaki (4 kiloki).

⁴⁰Saraai Jonimi kadika wi'nagila Jizaazalyi wawagila pwai Ediruyalyi. Ediruyai sai, Saaimoni Pitare gya'mwelyi. ⁴¹Ediruyai sai sinnawi wina yaka Saaimoni gya'mwerina birikaanya yina yaka widina “Ai! Nemi Mezaayari mena biramaa'mwona!” Yaya sa! “Mezaayai,” dini! “Kiraazitiyai.” ⁴²Widina yaka Saaimonimi gaminyawinna makuna. Makuna kya' Jizaazai tinna wanganaka widina “Gimi Jonimire gawaali'ginyi Saaimonigi. Gimire yaya! Sipaazai githivanigesi.” Juyaraavire yagaala “Sipaazai,” Girikiyagaala “Pitai,” aangyagaala “Silaangei,” dinikesi.

Jizaazai Pilipiji Nataanyaliji saraari widinike'nesi.

⁴³Mwanyagaa' Jizaazai “Pwaraji Galilineinera,” daka Pilipimi birina yaka widina “Dinyimidinaama!” ⁴⁴Pilipi sai Anga Betizaaitha mwaalyalyi. Anga saba Ediruyalyi Pitalyi sadaraai mwaaidisaba. ⁴⁵Pilipi kadika wi'nyina yaka Nataanyalimi biramaa'na yaka wida! “Kaanyaka! Ne Mozizai kiwibukuyavi pwarina yida'nike' nabaai, Gotiyari wi'nawijiwaakyara sarina pikarya yida'nikevine sari mena biramaa'mwona. Sai, Jizaazai Jozepiyare gawaali' Naazareti mwaalyalyi.” ⁴⁶Widina kya' Nataanyali yiwaara'na “Naazaretidaa'nyara tewaanyara daaka! Savidaa'nyi tewaanyai dalyaabiwaka!” Pilipi wida! “Sahwaigi bwangana! Nebulya'na githiwana. Bwangana!”

⁴⁷Nataanyali badaa'nyi Jizaazai tinna wanganaka sarina widina “Yithaanyi! Sai Yizireliya tewaanyalyi. Kwaasi yadei mika!” ⁴⁸Nataanyali savi kadika wi'naka yiwaara'na “Niminyina gara yawi'mwaana?” Yiwaara'na kya' sai widina “Sagaa' Pilipi giminyina mabiriwakegaa' yita pihya kaavilyavi mwaaida'gi gwangamweiginyira,” wida! ⁴⁹Nataanyali widina “Ravaai, Nejiwaakadinyaigi, giminyina diwa. Gimi Gotiyare Gawaaliki. Yizireliyainaavi nemaremwaaidinyaigine!” ⁵⁰Widina kya' sagaa' sai widina “‘Yita pihyavi mwaaida'gi gwangamwa, githiwe'na niminyina danyilimwamwaana! Sabwi maalikebwi, divi naangengi dangadengira.” ⁵¹Gaminyi widina “Nebulya' yihithivanige. Sigunya' basinadaa'dozi Gotiyare mamaayara ejeliyara

A'mweraavine Kaimiraayaryawinna walaabina, yilaawina yadaapiri danganyideihilyira,” widina ya!

Anga Kena a'mwei kwala maarake'nesi.

2 ¹Yirika daryaai dariki Kwaaka Galili Anga Kena savi kwala maarya yina. Kwala maarya yina kye' tika munnevi Jizaazari ganaange' mwaalina yadi'nyi nabaai, ²Jizaazalyi gamirerari saraavi munne'na jivwaramaa'na. ³Sara yina kye' munne' nyina yadaapiji aalya waainiya'na wigainyina yadaa'nyi ganaange' Jizaazari widina “Aalya waainiya' maayarera.” ⁴Widina kya' sai widina “A'mwe'gi ‘Sana sana ja!’ baa'na nyidiwaana? Nimiregaa' mika!” ⁵Sara widina kya' ganaange' widaayadivisaraavi widina “Sara yihithathe'na sara jila!”

⁶Juyara aalya yinyabwina wa'di'nyi si-aalitala atina ata puridaa'nyi nyidala kune warakengi. Aalitala gazasa' maanga kyeku'na' aalya naanga (80, 100 litaaya) di'na'nikesi. ⁷Si-aalitala sa kune warake, sahwai widaayadivisaraavi widina “Aalitala sa aalya maanga yunebanna yeku'nade dimaradingikaabyila!” Widina kya' maanga yeku'nya'ne aalya maradingikina maradingikina kye' ⁸widina “Aalya piri' yirapiji tika munnevi maremwaaidarina dumaryaawila!” Sara widina kya' makuna yeva wijaavina kye' sai yaamiji nyina. ⁹Aalya sa' sinnawi aangaalya' di'na'di'nyi divi aalya waainiya' yima'nyina yinikesi. Yaamiji nyina yaka dina “Waburyasi. Waainiya da' gawidaa'nyavaka?” Sai myawiri yada sare'na widaayadivisara yawireva aalya wijaavina yesarera. Kuna myawiri yada miginyai taaya' maarakeri munnevi maremwaalakei widina “Kaajo!” ¹⁰Widina yaka widina “Neminyina tewaanya yiwaana! Sinnawi a'mwe pwara gazarazara aalya waainiya nawi'nya' munne wijaavina yadivi' divi a'mwera waainiya naanga nadivi' nayaa myawiryaraavina aalya waainiya yirike' wijaavina yadivisare pwara. Sare'na yadinyaiigi mika! Kwaigi aalya waainiya nawi'nya' navika y'i'nadi'nyi, waainiya piri' mi'na kaniwo divi nawi'nya' wijaavina neyiwaanyaiginyi,” widina ya!

¹¹Kwaaka Galili Anga Kena saba Jizaazai wijiwaainya'ne sa' yina ya! Wijiwaainya'ne sinnawinya' yakesi. Gannya byaanna diraginyabwi wijiwaainake'na wijiwaainya'ne sa' yakesi. Gamirera naangebwi wanganeva gaminyi limwanna ye'.

¹²Mena yakegaa' sagaa' Anga Kaapaniyami sabanna gamiji ganaangesi gya'mwerari gamirerari walyuna yeva yirika piri' piri' saba bamwaaina ye'.

Gotiyare Angevina Jizaazai wawoke'nesi.

(Matiyui 21:12,13; Maaki 11:15-19; Luki 19:45,46)

¹³Juyara dina “Aya kigaa' Pari'ma'munne' naadera Gotiyai neminyina diraginna kavadaihasmayaa' yaasiwa'wawinya Yizipi saba

yagalya'mayaawo' yawita'negaa!." Juyara didaapi Anga Jeruzaalemi sabanna yilaawina. ¹⁴Yilaawina yaka Gotiyare Angevi wilina yaka dara wanganake! "O, a'mwera bulimakaawoyaraji sipizipiyaraji kwaamiryaraji damubivanigava! Nigwia nawi'nya Gotiyari wijaaya'na nigwia pimilika yanga yinyina yadivisara kunnya yi'binyangi damwaaihava!" ¹⁵Dina yaka "Sabwi mipinera!" daka wilyabaai maarina yaka mala li'bwarya'ne' yavikarina yaka Gotiyare Angevidaa'nyi sipizipiyaraji bulimakaawoyaraji saraavi tamaasina yaka nigwia mariwinasi'na yaka yanga yinyina yadivisaraavire yi'binya yarai marapuratawasi'na. ¹⁶Sara mi'na yaka kwaamiryaraavi mubadivisaraavi widina "Sa dimakwalyula! Nimware ange' mubange'na mika. Dimakwila!" ¹⁷Widina kya' gamirera yawi'na "Gotiyare bukuya' dinyina 'Gotiyaigi gimire angevina yilaaya dika nimore simunyavi nyinadevaabisasi.' Dinikesi Gotiyare bukuya', sahwarina."

¹⁸Sara yakevidaa'nyi Juya naangera sinna tika wida'daa'nyi yiwaara'na "Yiwaanya'na aai githiwaka? Gotiyai naangeiginyi gimwaaihiwake' yawiraade'na diraginya wijiwaainya' ja!" ¹⁹Yiwaara'na kye' widina "Gotiyare anga nawi'nya dari kayaaka kyigalapiri yirika daryaai dariki ayina yidikaavidesi." ²⁰Sarevidaa'nyi Juyara widina "Sa' be'na diwaana! 'Yirika daryaai dariki yarai madidesi,' diwaa' kigaa' kwarama pijaakuna (46) sara wawilavakesi anga da' madaapi. Yirika daryaai dariki gaverikaavi dimadeigi dathiwaana!"

²¹Widina yesa'na kiri' sahwai gannya kilaakejikina widina silangavina mi'. ²²Sara widina kye' divi Jizaazari ayina yidikaa'na kya' gamirera yagaalya' widake'na yawi'na yeva dina "Gotiyare bukuya' sara dinike'na kigaakuna Jizaazai widake' nebulyasi," dina, limwanna ye'.

Jizaazai a'mwe yuyaraavirebwi yawi'na yake'nesi.

²³Anga Jeruzaalemi sagaa' Pari'ma'munnegaa' mwaalina yada nawi'nyaji diraginyaji yadaa'nyi a'mwe kwalaalyara tinna sara wanganeva gaminyina dina "Sahwai naangelyi," gaminne yaya' limwanna. ²⁴Sara limwanna kye' a'mweraavirebwina a'mwera yaasiwa'wi'nya yesa'na nayaa yawi'da kuminyina yilaaya yarai myina. ²⁵A'mweraavire yawita'naji kumire sidusa'naji nayaa yawi'dei. Sarebwi pwai mujiwaakyi ya'. Sarebwi wigainadei mi'. Sare' dare'nesi. Sahwai a'mweraavine sidu'nakei nayaa yawiralimwagarikelyi.

Jizaazalyi Nikothimaazalyi saraarinesi.

3 ¹Juya pwara Perizikiwinya yadivi' mwaalina yeve pwai Nikothimaazai wo'nikei Periziyai mwaalina yakelyi. Sai a'mwe naangei Juyaraavi maremwaaidei mwaalakelyi. ²Mwaalina yaka sawita pirivi Jizaazaryawinna bina yaka bamwaaina yaka widina "Wijiwaakyaigi,

'Gotiyai githasiwaabikeigi bahina wijiwaakina neyivanigi. Sare' dare'nesi. A'mwera wijiwaainyangi yivanigi. Diraginya yivanigi. Gotiyai magihaimwagyazi kwaji sara mi kyidi' diraginya davwi,' sara yawi'mwona."

³Jizaazai ja'nawidina "Naanga nebulya'na githivanige. A'mwe pwai kwai ayahi mudikei mima'nyi yajai Gotiyai maremwaaaladeva tinna mwanganyi yannelyi."

⁴Nikothimaazai widina "A'mwe naangei mudikei yima'nade'na gara yoji yima'nadelaka? Pigasaai a'mwei ganaangevi munyiki ayina wilaminyina kyoji ganaange' gara maaradelaka ayahwala!"

⁵Sai ja'nawidina "Naanga nebulya'na githivanige. Kurya Tewaanyai a'mweri aalya myi kyoji mudika mumwaaahi kyoji sai Gotiyare maremwaaideva wiladei mika! ⁶A'mweyore kaimiraayai miwi'naka yaginnakalyi. Gotiyarei, gamire munyiki Kurya Tewaanyai bulamwaaaina kyoji sai a'mwe Gotiyare Kuryai kininnakelyi mudikei. ⁷Githiwe'na 'Sariminyi mudika ayahi yihimwaaihana!' githiwe'na atika maru'nata myinnera! ⁸Yihuta gami sa' kaanna wina yadevaaibisasi. Yihusa' kadika wi'nadinyaigi 'Sawinna wawade' daaka! Sabadaa'nyi bathe' daaka!' dadinyaigi mi'. Aawa, sare'na Gotiyare Kurya Tewaanyai gazaizare munyiki bulamwaaaina yinikei mudika yima'ni'. Mudikei tewaanna yada a'mwera tinna wangamaniga'. Kumi mwanganyivaniga' aaya kaavilyavi."

⁹Nikothimaazai ma'maa'na, "Nyidiwaanya' gara yima'ninikavaka?"

¹⁰Sai widina "Yizireliyainaavire nejiwaakadinyaigi sabwi myawirivaniginyaigi daa? ¹¹Naanga nebulya'na githivanige. Nayaa yawirama'daanya yawi'daa yihithivanigo. Tinna nayaa wangadaanya yihithivanigo. Sara yihithivanigo'na nemire jalikurakyavi mamaaryivanigasaihilyi. Sabwi kadika myivanigata sa' baa'na yivaniga'. ¹²Kwaaka davaki yinikengina kyihithiwa malimwagyivaniga' 'Nebulyasi,' sara maji yiwaasa' Sigunyavi yinikengina yihithiwija' gara dilimwagyideihilaka! ¹³Sigunyavina yilaawakei a'mwei pwai kwai mika. Sigunyavi A'mweraavine Kaimiraayai mwaalaka savidaa'nyi sai gawei walaaba!"

¹⁴Kigaa' a'mwamaayaba Ne Mozizai kwaari'makamaalya' yisavaki pwiyaaka daakuna yaa'. Kamaalyari makilyaakabaabi' yisavaki tamakya'na A'mweraavine Kaimiraayari sara makibi'delyira. ¹⁵Sahwai "Gazaizai nyilimwagarori gaala yuyagaa'nebwi maarana!" kadozi sara makibi'delyira. ¹⁶Sare' dare'nesi. Kwaaka davakiyainaavina Gotiyari kale naanga kwia' Gotiyai neminyina Gawaalivaanga gaveri nejaavakelyi. "Gazaizai sahvari wilimwagaroji myiwawanna! Aawa. Gaala yuyagaa'nebwi maarana!" daka nejaavakelyi. ¹⁷Sare' dare'nanyi. Gotiyai dina "Nyibwaalivaangei a'mweraavi kotiya'na maryawibwaradela!" daka myasaabya'. Aawa. "Nyibwaalivaangeri a'mweraavina padaihasamaata yima!" daka kwaaka davaki yasaabina ya' Gotiyai.

¹⁸ Gawaalivaangerina limwagaza pwari Gotiyai kotiya' maryawibwa'dei mi'. Malimwagyaza pwai kotiya' mena yawibwa'nikelyi. Gotiyare Gawaalivaanga gaverina gamire yayavinaji malimwagaryaja'na kotiya' mena dinikesi. ¹⁹ Kotiya'na dara dini' "Nemire kwaaka davaki pwai nebulya' nejiwaakake'na Baakei walaabina yaka kiri' a'mwera kayaa'nanya yadivisara kayaa'nanyabwi jihinyaburina wivu'nakere. Baakerina wivu'nakara mi'. Sare' dare'nesi. Kumi yadivisa kayaa'nanyangira," sare'na dinikesi. ²⁰ Sare' dare'nesi. Gazaizai kayaa'nanya yadei Baakerina similika wimanikei Baakeryawinna mabi yivani'. "Baakeryaba pwara nimire kayaa'nanyabwi nanyangabika!" daka mabyivani'. ²¹ Sara yada kiri' pwai nebulya'na tewaanna yadei Baakeryawinna nayaa bivani'. "Baakeryabanna kwawa'muji pwara yawita'na 'Gotiyari yuya sa tewaanna jivanika!' " daka kaanna bivanikelyi.

Jizaazalyi Joniji saraarinesi.

²² Sangi dividaa'nyi Kwaaka Juthiya sawi Jizaazalyi gamirerari kaanna. Mi'na kaanna yaka saba kumiji mwaalaka bavitaaziya' aalya yina. ²³ Bavitaaziya' yadaa'nyi nabaai aalya naange' wa'di'nyiya'na Joni Kwaaka Yinoni Anga Selimi pimaginna wawaka bavitaaziya' yina. Bavitaaziya' yina yada gaminyawinna a'mwera a'mwe samilika badaapi kuminyi bavitaaziya' yina ya'. ²⁴ Sare' dare'nesi. Sagaa' tewaanna mwaalaka kalavuzza mumwaaihyagaa' Jonimi.

²⁵ Sagaa' Juyai yawi'na "Aalya yinya'nebwi yiniga wi'na daaka? Be bavitaaziyavaka nawi'nya'?" Dina yaka Jonimireraavi yagaala naanga widina kya' maanga dinyina. ²⁶ Mi'na dinyina kye' Jonimiyawinna gamirera bina yeva widina "Wijiwaakyaigi, kigaa' Aalya Jothani pimagi pihiri mwaalagina a'mwe pwalyi mwaalagina sarina nejalikurakaginyalyi. Yithaa, dahaa' sai bavitaaziya' yivanike' gaminyawinna yuyara wivaniga'."

²⁷ Joni ma'maa'na "Sarina simunya kwalaalya myawipinera! Sigunyavidaa'nyi Gotiyai a'mweri mujaayi yaja' aane piri' kiri' mamaari yannelyi. Gotiyai dina 'A'mwe pwai naangelyi. Pwai maalikelyi,' sana sana yina yadelyi Gotiyai. ²⁸ Sarimi sahwaihi nimire yagaala kadika nyu'nesaihilyi. Dara yihithe. Gotiyai dinika Kiraazitiyainyi mika! Aawa. Gotiyai niminyidaasi nyidaasakeinyi. Divi sahwai bathelyi, sara yihithe. Ke'ba'na yihithima! ²⁹ Miginyai taaya' maa'mwakelyi. Mudikangegaa' miginyaryawinna taaya' wina. Wina kyiwa' miginyai yilaaya yina yaka widina. Widina kyiwa' gya'mwei mwaalaka gamire maanguraayavi kadika wi'nyina yaka yilaaya naanna yina. Taaya' gya'mweryawi mwaalike'na yilaaya yina yiwa'. Sa'bisa'na a'mwera Jizaazaryawinna wina yivanigasa'na yilaaya yuna yivanige. ³⁰ Gami naangei

nyavilavikelyi. Nimi naangeinyi myima'niwineinyi. Nimi maalikeinyi yima'nideinyi,” widina ya' Joni.

³¹Munyabadaasi diraginyai walaabakei yuyainaavi nevilavikelyi. Kwaakevakidaasi pwaina Kwaakevakiyaina kwaakevakiyabwi widina, kwaasi kwaasi yagaala widina yadaanyaine. Sigunyavidaasai yuyainaavi nevilavikelyi. ³²Sai Gotiyaryaba tewaanyabwi tinna wanganakengi kadika wi'nakengi sangina jalikurakina. Sare jalikurakina kya' kiri' aane pwai kwai kadika wi'naka gamire yagaalya' mu'nya'. Aawa. ³³Pwai gamire jalikurakya' daapina yake' yi, “Gotiyai nebulya'nanyai!” diraginna dina ya'. ³⁴Sare' dare'nesi. Sahwari Gotiyai yasaabina kya' Gotiyare yagaalyangi wijiwaakina. Sare' dare'nesi. Gotiyai sahwarina gamire Kuryari wijaavina ya'. Gotiyai gamire Kuryari maali'na wijaavakarina mi'. Naanga yuyabwi wijaavakerina. Gotiyai gamire Kuryari yinahu wijaavake'na sai Gotiyare yagaalya' nayaa widina neya'. ³⁵Gawaalivaangerina Ganimaangeri tewaanya wivu'nada yilaaya yada diraginyaji yuyaji mwangina yada widina “Yuya dimaremwaala!” widakerina. ³⁶Gawaalivaangeri nayaa limwaga'dei gaala yuyagaa' yuyagaa'nebwi kininnakelyi. Kwai Gawaalivaangeri malimwagaryadei gaalyabwi tinna mwanganyi. Aawa. Gotiyari sinna tika widayabwi sahwari kuna wiwarikelyi.

Jizaazalyi Kwaaka Sameriya mwaalyasi sawaarinesi.

4 ¹A'mwe Periziyara dara wi'nesa' “Ai, a'mwe kwalaalyara Jizaazarera yima'nyina yeva a'mwe pwai pwai Jonimirera yima'nyina. Jizaazai a'mwe kwala naangevi bavitaaziya' jivanika!” ²Sara wi'neta kwaraavi Jizaazai bavitaaziya' mya'. Aawa. Gamirera gavera bavitaaziya' yina ye'. ³Periziyara sara didaapi sarevidaa'nyi Jizaazai sa'na wi'naka Kwaaka Juthiya ya'ma'na yaka “Kwaaka Galilina ayina wima!” daka ⁴Kwaaka Sameriya lotaya'nei kaanna wina ya'.

⁵Wawakegaa' Kwaaka Sameriya Anga Saaika wo'nikebanna yi'mavaawina. Kigaakuna Ne Jaikopi gawaalivaanga Jozepiyarine kwaake' wijayaakeba anga sa' mannikebe. ⁶Nabaai saba Ne Jaikopi aalikavi'ninnya' likyaakeba kavi'ninnya' kuna di'na'disiyaba. Jizaazai kaanna kaanna wodaa'nyi maa'na naanga wiadaa'nyi sirigwajahaa' aalikavi'ninna sayabanna yi'mavaawina yaka walamwaaina ya'.

⁷Aalya yiryane' Kwaaka Sameriya mwaalya' bina yina kya' Jizaazai widina “Aalya' dinyiryama!” ⁸Sare' dare'nanyi. Gamirera “Wapaaya mubaana!” deva anga savina wilaawina yesai gavei sara widina ya'.

⁹Sarevidaa'nyi a'mwe sa' widina “Gimi Juyaiigi, nimi a'mwe'nyi Sameriya mwaalya'nyi aalya'na nyiwara'mwaanya'na githiwa.” Sare' dare'nesi. Sameriya mwaalyara gwarewaki aalya' nyina yadivi' Juyara gwarewakina “Aala!” dadivisa'na widina ya' a'mwe'.

¹⁰ Jizaazai ja'nawidina “ ‘Gotiyare sihumale' nyijaavana!' yawi'diza' a'mwe sai githiwaka sa' 'Aalya' dinyiryaama!' gimi widizi kwaji sai aalya' a'mwera gaala mwaabine' kagizaavadika!”

¹¹ A'mwe' wida' “A'mwe naangeigi, aalikavi'ninna da' saaminaange' warike' kebani aalya' di'ni'. Aaligware' maayaiginyi. Aalya' a'mwera gaala mwaabi'de' gawi dimaa'jiwaa' ¹² Nemire Ne Jaikopi aalikavi'ninna da' neminyine' kalikyaa' aalya kuna nadaanyannera. Gamiji gawaalivaangerari gamire jilikyaawaryarari aalya da' nyina yaa' aalikavi'ninna tewaanya davi. Sarei nemire Nei a'mwe naangelyi aalya naanga nejayaakei. 'Aalya tewaanya naange' gizaavima!' dahina gaminyi wavila'mwaanyaigi daa?”

¹³ Jizaazai ja'nawidina “A'mwe yuyara aalya da' nadivi' divi mijika ayina wiade' kiri' ¹⁴ a'mwe dai aalya' wijaavide' noji yuyagaa' mijika mwi yadelyi. Arikewi. Aalya' wijaavide' gamire munyiki wilaroji nabaai yiminya' yima'nadelyi. Yiminyavidaasi aalya nawi'nya' bilyiri'na yada a'mwe savi yuyagaa' yuyagaa'ne' gaala wimwaaiahadelyi.”

¹⁵ A'mwe' widina “A'mwe naangeigi, aalya sa' nyijaama! 'Na'muri mijika ayina manyoji davanna mabi ya'muji aalya' myiri yide'nyi,' dena githiwa.”

¹⁶ Sai widina “Ginnya a'mwerina duzima'naawa!” ¹⁷ Widina kya' a'mwe' ja'nawidina “A'mwamaaya'nyi.” Jizaazai widina “Naange' nyidiwaana 'A'mwamaaya'nyi.' ¹⁸ Sare' dare'nanyi. Kigaa' a'mwe atilyaraavi maa'nagina kigaa' pigaa' yuyaraavi byenidakwawagi. Dahaa' a'mwe mwaaihilyai gimireina mika! Nebulya' sara nyidiwaa.”

¹⁹ A'mwe' widina “A'mwe naangeigi, giminyina dara wangamwe' 'O, a'mwe dai Gotiyari wi'nawijiwaakadei daaka!' ²⁰ Mugunya davi nimore Ne sinnawinyara Sameriya mwaalyara Gotiyari yilaaya yina. Sara yina kyaa' kiri' Juyaihi sahwaihi widina 'Aawa, Gotiyari yilaaya Jeruzaalemi yipi'deva.' Sara nedivaniga'.”

²¹ Jizaazai widina “A'mwe'gi, githide'na du'nana! Divi pigaa' yima'nadehaa' mugunya davi a'mwera Nimwari yilaaya mi yipi'de' Anga Jeruzaalemi yilaaya mi yipi'dehaaki. Aawa, yawita sabwi. ²² Kwaaka Sameriya mwaalyaihi siduta maalika' yadivi' Gotiyari yilaaya kwaasi kwaasi yadivisaihilyi. Juyainaavidaasi dakinikei biwaka, a'mweraavi padaihasamaa'de'na Gotiyari nayaa yawi'na yadaa yilaaya tewaanna yadaanyaine Juyaina. ²³ Sare' kiri' sagaa' yima'nadehaa' githiwegaa', dahaa' mi'na yima'niwakegaa' a'mwera, a'mwe Nimwari yilaaya nebwinia yipi'dera. Kumire kuryara yilaaya yipi'de' nabaai, nebulya'na yilaaya yipi'dera. Sare' dare'nesi. Sara yilaaya yipi'deraavina Gotiyai dina 'Sahwara yilaaya nyipika!' dadelyi. ²⁴ Gotiyai Kuryalyi. A'mwei mika. Sare'na a'mwera kumire kuryaraaviji nebulyaburiji yilaaya yipinerera. Yaasiwa'na yilaaya mipina!”

25 A'mwe sa' widina “Dara yawi'mwa. Divi Mezaayai yaya piri' Kiraazitiyai wo'nikei bathelyi. Sai bazai yuyabwi, yuyangi nedathelyi.”

26 Jizaazai widina “Dahaa' githivanige dainyi nimi sahwainyi.”

27 Sagaasagaa' Jizaazarera yagalaawina yeva dara wanganesa! “Ai, a'mwevi widivanikei daaka!” Deva atika maru'na'na yeva kiri' kumijiyi aane pwai kwai savi mujina “Baa'na bahineka?” sari myiwaarayina “A'mwe savi baa'na widivanigina?” Sara muji, navika mwaalina ye'.

28 Sarevidaa'nyi a'mwe! gannya aaligware! wakina yaka gannya angebanna ayina wilaawina yaka a'mwe anga sabanyaraavi widina 29 “Ai, a'mweih kaajila! A'mwe pwari danganyila! Yuya yadinyanna nyidiwakelyi. Gotiyai dahilakyaakei Mezaayai dingaka?” 30 Sara widina kya' anga saba ya'ma'na yeva sahwayawinna wina ye'.

31 Angebanna a'mwe! wodaa'nyi gamirera Jizaazari widina “Nejiwaakadinyai, wapaa dimaranana!” 32 Sara widina kye' kiri' wida! “Aala, wapaa pinijiyainyi sarimi mwanganya.” 33 Mi'na widina wiyakevidaa'nyi gamirera yiwaara'nyina “Pwai wapaaya dahamakabiwaka?”

34 Jizaazai widina “Nimire wapaaya piri'si. Da'na yihithivanige. Nyidasaabakei sara nyidivanikebwi gamire simunyabwi sara yivanige'na nimire wapaayasi. Gamire wawinya' mi'na yi'mwannya'ne' nimire wapaayasi. 35 Sarimi wawinya tinna wangadivi' dara didivi' midaaka! ‘Lawe dikaai dikaai kwavilavoji wapaaya milaadera.’ Yihithiwa. Dahaa' sa' madipina! Yithaanyi! Wawinya keiningi nayaa danganyila! Kigaa' pwara burinna yeva witizila yawaka yi'nikabaaibi' a'mwera niminyina yarai nyu'nipi'derera. 36 Pwai wapaaya miloji miloji kave yovirawakade' gamire tivikita mena maa'mani'. Yi witizila yuyagaa' yuyagaa'ne gaalyabwine mena yovirawakivani'. Sila piraihirakadelyi wapaaya yovirawakadelyi 'Witizila mena warike'na yilaaya yaka!' dahila sara yovirawakivani'. Sa'na pwai Gotiyare yagaalya' wijiwaakina yadelyi pwai a'mwera Gotiyareraavi wimwaihina yadelyi saraai sare'na yilaaya yikaderaalyi. 37 Sare' dare'nesi. Darevi nebulya' didivi' 'A'mwe pwai burinna yadelyi. A'mwe pwai midelyi.' Yi sa' nebulyasi. 38 Wawinya pirivi sarimi myesavina 'Wapaaya dimaaryila!' yihithiwe. Wawinya savi pwara miraagiki'na kye' sarimi kumire wapaaya dimaaryidengi. Sinnawi pwara a'mweraavi Gotiyare yagaala wijiwaakina yadivi' dahaa' sarimi yagaala tewaanya' kudapiji a'mwera nimirera yima'nipi'derera,” widina ya'.

39 Anga saba mwaalyara Kwaaka Sameriya mwaalya kwalaalyara a'mwevire jalikurakya' kadika wi'nyina “Yuya yadinyanna nyidiwakelyi.” Sara kadika wi'nyina yeva Jizaazari limwanna yadivi' “Mezaayai Kiraazitiyai. Gotiyai dahilakyaakelyi,” dina. 40 Sarevidaa'nyi Kwaaka Sameriya mwaalyara gaminyawinna wina yeva diraginna widina “Neminyawi se da'mwaka!” Widina kye' savi yirika daryaa mwaalina. 41 Mwaalina yada gamire yagaala

widina yake'na pwara kwalaalyara gaminyi limwanna yeva dina “Mezaayalyi. Gotiyai dahilakakelyi!” ⁴²Dina yeva a'mwevi widina “Nabaai, dahaa' gaminyi limwamanigo. Nediwaanya'na mika! Sare' dare'nesi. Nemi sahwaina kadika wi'nona dara yawi'manigo' 'O, nebulya', Kwaaka davaki mwaalyaraavina Naangei padaihasamaaradei daaka! Sara dona gaminyi limwamanigo.”

Jizaazai kaimiraayarina nabalya' marasi'nake'nesi.

⁴³Anga saba sawita daryyai Jizaazai wa'mwaraka saba ya'ma'na yaka Kwaaka Galilina wina. ⁴⁴Jizaazai sahwai widake' “Gannyaba mwaalyara a'mwe piropetiyai Gotiyari wi'nawijiwaakaderi muji 'A'mwe naangeiginyi,' muji yadivisalyi.” Widake'na Galilina wina. ⁴⁵Mi'na wina kya' saba mwaalyara gaminyina maarina. Anga Jeruzaalemi Pari'ma'munne'na kaanna yeva munnegaa' Jizaazai yuyangi tewaanna yadaa'nyiyangi tinna wanganeva “Tewaanyasi,” desa'na gaminyina yilaaya yina ye'.

⁴⁶Kwaaka Galili Anga Kena mannikebanna Jizaazai ayina wina. Saba kigaa' diraginna kya' aangaalya' wa'di'nyi aalya waainiya' yima'nikebe. Anga piba Kaapaniyami kingiyare a'mwe naangei mwaalina yadi'nyi gamire kaimiraayai nabalinakei warina ya'. ⁴⁷Jizaazai Anga Kenana ayina wina kya' kingiyare sai dara wi'nake' “Galilina Juthiyadaa'nyai Jizaazai damwaali!” Mi'na daka gaminyawinna wina yaka yidaangana' “Nimire kaimiraayai yarai balade'na nimiji wawa'gizi nabalya sa' dimarasi'nana! Yarala!” ⁴⁸Jizaazai widina “Sarimire yawi'divisabwi yawi'mwa. Nimire yijiwaainyaji diraginyaji sarimi tinna mwanganyipija' niminyi manyilimwagyi jideihilyi.”

⁴⁹Kingiyarei kave widina “A'mwe naangeigi, ninnya kaimalei nabaladika! Naarimi yarai wawaka!”

⁵⁰Jizaazai widina “Ginnya angevina kaanna diwona! Ginnya kaimalei mabalyai mwaali!. Nabalya' maayai mwaali!”

Jizaazai widake' a'mwe sai limwanna yaka dina yada “Nebulyasi,” kaanna wina. ⁵¹Gannya angevina kuna kaanna wina yadaa'nyi gamire yaasiwa'wawinyara wijimaa'nyina yeva widina “Gimire kaimiraayai tewaanya mwaali!. Nabalya' aawa.” ⁵²Sarevidaa'nyi sai yiwaara'na “Nimire kaimiraayarina gathingaa' yiwiwaka?” Sara yiwaara'na kya' widina “Wona sirigwajaha! waani kilokiyagaa' kilaaka dika menanyira.” ⁵³Sarevidaa'nyi ganimaangei yawi'na “Yo, sagaasagaa' Jizaazai nyijawaali! 'Ginnya kaimalei tewaanyai mwaali!' ” Sara yawi'na yaka kinidaka sahwari limwanna yesanidakera.

⁵⁴Kwaaka Juthiyadaasi Kwaaka Galilina yi'mavaawina yaka Kwaaka Galili yijiwaainya' kaimalerina yake' diraginya piriwaalya' ya'.

Aalibunya Bethezitha Jizaazai a'mwe nalaavinakeri yidikaavake'nesi.

5 ¹Sare mena kyima'na' Juyara Gotiyarina tika munne' nadivisagaa' kyima'na' Anga Jeruzaalemina Jizaazai kaanna wina ya'.

2 Jeruzaalemi saba Sipizipitikurya' wo'nikevi pimagingyavi aalibunya' di'na'na ya'. Aalibumaangevi yihuliviliya ati manni'. Aalibunya sa' "Bethezitha," Yiviruyagaala wo'nikesi. 3 Yihuliviliyangi nalaavinaka kwala naanga mwaalina ye!. Nalaavinakera pwara tibinyara, pwara sivila nadiya yinikera, pwara kilaaka bainikera mwaalina ye!. Savi yuyara aalya' kwaayakwaaya'na yemwaaina. 4 Pigaa', pigaa' aalyavi Sigunyavidaasai Naangere mamaayai ejelijai walaabina yaka aalya' ginyiwanna. Sara ginyiwanna kya' sagaa' sinnawinyai nalaavinakei aalya sinaapwipulyavi yarai walaawina, yithaa, maamidaryai yima'nakelyi. 5 Yemwaaina yadivi' nabaai, a'mwe akwai yemwaaina yada kwarama naanga naanga (kwarama 38) wavila'daa'nyai nalaavinakei mwaalina. 6 Sai mwaalina yadi'nyi Jizaazai bina yaka yawi'na "We', a'mwe sai nalaavinakei kwarama kwalaalya mwaaidelyi," yawi'na yaka widina "Gimire simunya 'Maamidaryainyi yima'nima!' yawi'dinyaigi daaka?"

7 Nalaavinakei ja'nawidina "A'mwe naangeigi, aalya' kwaaya yadaa'nyiyagaa' 'Aalibunyavi nyimarapaihana!' dena a'mwe bewai yanneka? Walaawina yadaazi sinnawi pwai yarai wavila'na nyada aalyavi pahinyina yadelyi."

8 Jizaazai widina "Daava'gizi nalabwarya' pwala'gizi kaanya dimakwo!" 9 Sara kuda' yime'nya'bi' a'mwei maamidaryai yima'naka gannya nalabwarya' pwalaka kaanna wina ya'.

Sagaa' Juyaraavire Kwazaakegaa'. 10 Sarevidaa'nyi Juyara naangera nalaavinakei tewaanyai yima'nakeri widina "Juyainaavire Kwazaakegaaki. Nemire kiwinya' dini' 'Kwazaakegaa' nalabwarya' mamakunnera!' Sara dinikegaa' be'na makuvanigina?"

11 Sai widina "A'mwei maamidarya nyidikaa'mwakei nyidiwa' 'Ginnya nalabwarya' pwala'gizi kaanya dimakwo!' Sara kanyidiwakira."

12 Kumi yiwaara'na " 'Ginnya nalabwarya' pwala'gizi dimakwo!' githiwakei aaihwalaaka?" 13 Yiwaara'na kye' kiri' tewaanya yima'nakei myawirina. Sare' dare'nesi. Aalibunyavi kwala naanga mwaaidapi Jizaazai kave wina kya' sai sahwarina wida' "Aaihwai dingaka?"

14 Divi sagaa' Gotiyare Angevi Jizaazai gaminyi biramaaraka widina "Yithaa, dahaa' maamidaryaigi mwaaihi. Kayaa'nanyabwi minna! Kigaa' nabalya kayaaka gihaideiginyi. Aya kayaa'nanaanga gyade'bita naanga piri' nagyathika! Gimire kayaa'nanya minna!"

15 A'mwei Jizaazari kadika wi'nyina yakegaa' Juyara naangeraayawinna widaawina "A'mwei maamidarya nyidikaa'mwakei Jizaazalyi."

16 Sarevidaa'nyi naangera dara yawiresa' "Niwaava, Juyainaavire Kwazaakegaa' kayaaka'na a'mwe sai sabwi yadei daaka!" Sara deva Jizaazaryawinna kaanna yeva sagaa' Kwazaakegaa' sara yake'na "Balana!" deva maanga gaai widina. 17 Maanga gaai widina yadivi' Jizaazai widina "Dahaa'na ninnya Nimwai yivanikegaa'nanyi. Nabaai nimi yivanigeinyi."

¹⁸Sarevida'nyi Jizaazai sara widakeгаа' Juya naangera dinyina "Nemire kiwinya' Kwazaakeгаа'na kayaaka yiwa'. Sa' kayaa'nanyasi. Kayaa'nanya' kiri' nediwa' 'Gotiyai ninnya Nimwalyi,' sa' kayaa'nanaangesi. Yarai balana!" Jizaazai widina "Gotiyai ninnya Nimwalyi," yaka "Nimi Gotiyari avaalyainyi," dinike'na dinyina ye' Juyara.

Jizaazare diraginya'nesi.

¹⁹Juya naangera dinyina yesagaa' Jizaazai gaminyina wida' "Naanga nebulya'na yihithivanige. Gawaalivaangei gamire simunyavidaa'nyi aane piri' kiri' yannei mi'. Aawa. Nimwai yadaawori wanganajanna yadelyi. Sare' dare'nesi. Yuya Nimwai yade Gawaali' yivanike sahiningi. ²⁰Sare' dare'nesi. Nimwari Gawaalivaangerina wivu'nade'na Nimwai sahwai wawinya yivanika yuya sa yibwaridaakwadelyi. Gawaali' nabalinakeri tewaanya yaka wawinya maalikesi. 'Sarimi atika maru'na'na jila!' daka Nimwai wawinya naange wibwaridaakwoji Gawaali' sana yadelyi. ²¹Sare' dare'nesi. Nimwai bainikeraavi yidikaa'da gaala wijaavadevaabi' Gawaali' "Sahwaraavi yidikaavima!" da'muji wimwaaihima!' dozi gaalyabwi wijaavadelyi. ²²Sare' dare'nesi. Nimwai aane pwari kwari kotiya' mujadelyi. Aawa. Wawinya savina diraginya' Gawaalivaangeri kujaawa' sai kotiya yuyanna widathelyi. ²³Sarevi 'A'mwe yuyara Nimwainyine yaya' munyabanna makimanigatabaabi' Nyibwaalivine yaya' makibika!' daka wijaawakelyi. Gawaalivaangerine yaya' munyaba mamakilyadei yi sai Nimwai widasaabakerine yaya' mamakilyadelyi.

²⁴Naanga nebulya'na yihithivanige. A'mwei yagaalyavi kadika nyu'najai Gotiyai nyidasaabakeri limwaga'na yoji sagaasagaa' yuyagaa' yuyagaa'ne gaalyabwi kininnakelyi. Sai kotiya' jidaya'neba wilaabathei mi'. Aawa. Sahwai balyaburidaa'nyi gaalyaburina mena ga'ma'na yiwakelyi. ²⁵Naanga nebulya'na yihithivanige. Pigaa' yima'nya'negaa' dahaa' bainikera balyabwi yadivisara Gotiyare Gawaalivaangere maanguraaya' kadika mena wi'napiji nabaai, kadika wi'nipijara gaala mwaabi'dere. ²⁶Sare' dare'nesi. Nimwai diraginna mwaalikei gami sahwai gaalyabwine aaya kaavilyai mwaalikabaabi' Gotiyai Gawaalivaangerina dina kya' Gawaalivaangei gami sahwai gaalyabwine aaya kaavilyalyira. ²⁷Sahwai, A'mweraavine Kaimiraayai mwaalike'na Gotiyai wida' 'Diraginya' kagizaawa a'mweraavina kotiya' jawibwa'deiginyi.' ²⁸Sara widaka sa' atika mamaru'napina! Divi pigaa' yima'najahaa' wakadivisangidaa'nyi baryara gamire maanguraayavi wi'napiri ²⁹kunnya wakinikeba yagalya'ma'na, walyaabina yipi'dere. Pwara mwaalyagaa' tewaanna mwaabizara dikaavapiji gaalyabwi maapi'dere. Pwara mwaalyagaa' kayaa'na mwaabizara kadikaavapiji kotiya' jidasabwi maapi'dere.

³⁰Nimire simunyavidaa'nyai aane piri' kiri' mi yiwineinyi. Yagaala Nimware wi'niwebaaibi' maryawibwa'manige a'mweraavi kotiya'na. Nimire simunyavi mabiramaarivanige. Aawa. Nyidasaabaka sare simunya' maa'manige'na nimire yawibwata sa' yida'maraangesi.

³¹Sahwainyi gaveinyi 'Naangeinyi,' jalikurakimuji kwaji pwara 'Nebulya' mika!' kadipidika! ³²Niminyina nayaa jalikurakadei pwai mwaali'. Yagaala sara yihizalikurakivanike' 'Jalikurakya sa' nebulyasi,' yawi'mwa. ³³Jonimiyawinna sarimi a'mweraavi kudaase' Joni nebulyaburina yihizalikuraka'. ³⁴Sare'na a'mwe gaveraavi niminyina jalikurakyabwina mamaaryadinyainyi. Aawa. 'Sariminyi nayaa yihivadaihasamaarima!' dena yihithivanige. Joni yihithake'na ³⁵Joni di'baakelyi. Di'baaka sai naka a'mweraavina wanyina yakelyi. Joni mwaalaka gannya baake' sariminyina wanyina yake', maalikageaa' baaka savina gamire yagaalyavina yilaaya yesaihilyi. Joni niminyina nayaa yihithakelyi. ³⁶Nabaai, niminyina jalikurakya pini warike Jonimire yagaalyavi wavila'na yaka dinikengi. Sare' dare'nesi. Yuya yivanige Nimwai 'Sana ja!' nyidade wawinya sa yivanige tinna wanganeva dara yawi'mwaasa' 'O, Jizaazai sara yade'na Ganimaangei widasaabakei daaka!' Jalikurakya sahirisi. ³⁷Nimire wawinya sa niminyina yihithivanika nabaai, Nimwai nyidasaabakei niminyina nayaa jalikurakiwakelyi. Sare'na sarimi gamire maanguraaya' kadika mu'nyadivi' gamire sinnya' tinna mwanganyadivisaihilyi. Arikawi. ³⁸Sarimire sidusangi gamire yagaalya' mwaribainyi'. Sahwai nyidasaabakeinyi dainyi manyilimwagyadivisa'na gamire yagaalya' mwaribainyina. ³⁹Sarimi yawi'na 'Yuyagaa' yuyagaa'ne gaalyabwi kininnakeinyi mwaalima!' yawi'na yadivisa'na Gotiyare bukuya' kave birina birina yadivisaihilyi. Gotiyare bukuya' dinike sahini niminyina jalikurakinikeinyira. ⁴⁰Niminyina dinike'na kiri' sarimi 'Gaalyabwi kininnakeinyi mwaalima!' deva niminyawinna divide' sarinnya simunyangi myawirivaniga'.

⁴¹Niminyina 'Yilaaya yaadeina daaka!' dipija' sarimiresi. A'mweraavi byaannya' maaarivanige. ⁴²Aawa. Sariminyina yawi'mwa. Sariminyi Gotiyarina tewaanya yihivu'nadevwi mwari'. Sare' yawi'mwa. ⁴³Nimware diraginya' maarena gaminyine yayavi biwa. Kabiwa kiri' sarimi niminyi mamaari. Pwai gannya diraginya' maaroji gannya yayavi bazai, yi sahwari dimaaryideihilyi. ⁴⁴Sahwaihi sariminyina 'A'mwe tewaanyalyi,' deva yilaaya marivanigasa' byaannya' wijaavanigasa'na 'Gotiyai gavei yilaaya neyana!' majaihilyi. Sarimi sara yadivi' niminyina gara dinyilimwagyideihilaka? 'Naangeiginyi,' gara dizideihilaka? ⁴⁵Sare'na myawiri yadivi' divi sarimi dinyina yipi'de 'Ganimaangeri neminyina kotiya' jina yadei daaka!' Sara myawipina! Aawa, nimi kotiya' jina myiwina! Sarimi Ne Mozizarina dinyina 'Sai nevadaihasamaaradelyi,'

dinyina yadivi! kiri! Ne Mozizai sariminyina kotiya! jina yihyathelyi.
 46 Sare! dare'nesi. Mozizai niminyina bukuya! yida'nike'na sarimi Ne
 Mozizari nayaa limwanna yipiji kwaji kanyilimwabithika! 47 Kwaasi
 yadivi! Mozizai yida'nike malimwagi yeva yagaala yihithiwe gara dinyili
 mwagyideihilaka?"

Jizaazai a'mwe kwalaalyaraavi (5,000) wapaaya wijaavake'nesi.

(Matiyui 14:13-21; Maaki 6:30-44; Luki 9:10-17)

6 1 Sare mena kyima'na' Aalibunya Galili (yaya piri! Aalibunya
 Taaiviriyaazavi) Jizaazai sipiyavi wilamwaaina kya' pimaginna
 makuna. 2 Makuna kya' kwala bwa'naanya' midinna. Yijiwaainya
 naange Jizaazai nalaavinakera tewaanyaraavi wimwaaihina yake tinna
 wanganna yesa'na Jizaazari midinna yeva gaminyawinna bina. 3 Mi'na
 bina kye! mugunyavi yilaawina yaka saba gamirerari walamwaaina.
 4 Sagaa! Juyaraavire Pari'ma'munne'negaa' aya kigaa' yima'nakegaaki.
 5 Walamwaaina yaka Jizaazai wanganaasina yaka tinna dara wanganake!
 "Niminyawinna kwala naanga davivaniga!" Sara dake'na Pilipimi
 widina "A'mwe dara wapaaya nipika! dona girikula yuyaraavine
 gawi mubaaziwona?" 6 Jizaazai Pilipimina dina "Gara nyidazihiywaka?
 Yaamiji widima!" Sare! dare'nesi. "Sara yideinyi," mena yakei.

7 Pilipi ja'nawidina "We!, 'Gazaizai maalike! maarana! dona kinaaya
 200 (tu aadireti) wapaaya biretiyanne mubaazi kwaji wi'na yima'nade'
 mi!"

8 Gamire pwai Ediruyai Saaimoni Pitare gahwaalaangei Jizaazari
 widina 9 "Dava kaimale pwai yisila baali biretiya atilyaji jawinya
 piriwaalyi sa kininnakei mwaali!. Sare kiri! a'mwe kwalaalya darera tika
 nya'ne wapaaya sa beningaka!"

10 Jizaazai widina "A'mweraavi a'mwengi duzila! 'Dalamwaalyila!' "
 Saba kuridarya naangebe. Sarevidaa'nyi a'mwera a'mwe walamwaaina.
 A'mwera gavera kwalaalyara (5,000) mwaalina yeva walamwaaina.
 11 Yuya, a'mwera a'mwe walamwaaina kye! Jizaazai biretiya sa maarina
 yaka Gotiyari "Su! Su!" widina kya' biretiya naanga yima'nadaa'nyi
 a'mwe walamwaaina yadapiyangina yanga wijaavina. Wijaavina yaka
 biretiya wijaavakabaaina jawinyawaai wijaavina kya! "Sare! nima!"
 yawi'divi! sara nyina kye! munya wina!. 12 Munya kwina! sai gamireraavi
 wida! "Nagihwaasa yaasiwa! warya nyadika! Wapaaya wa'mwaka
 yuya dimaaryi!" 13 Sarevidaa'nyi gamirera sara yeva soigilya atiraa
 siviliyiridaa'nyi piriwaalyangi mihina mihina kye! maanga yeku'nyina.
 A'mwera a'mwe yisibaalibiretiya nagihesa soigilya sangi maanga
 yeku'nyina ya!.

14 Sarevidaa'nyi a'mwera Jizaazai yijiwaainya sa' yake' tinna wanganna
 yeva dinyina "Gotiyai wijaaka 'Kwaakevaki nyu'nawijiwaakadei

bathelyira,' wijaakei sahwalyi. Nebulyasira. Sahwalyi.” ¹⁵ Sarevidaa'nyi Jizaazai dara wanganake! “ ‘Kingiyai nemaremwaaladei yima'nana!' dapi yarai galalimwannan nyipi'dera daaka!” Sara daka mugunyavi ayina yilaawina ya' gavei.

Aalibunyavi Jizaazai ga'nigoke'nesi.

(Matiyui 14:22,23; Maaki 6:45-52)

¹⁶ Sawitirinyagaa' aalibumaangebaarina gamirera walaawina yeva ¹⁷ sipiyavi yilamwaaina kye' aalibunyavi Anga Kaapaniyamina makuna. Sawisa' kajinna' kuminyawinna Jizaazai kuna mabya'. ¹⁸ Sipiya' makuna yadaa'nyi yihuta naange' yaka aalimavajinaaka naanga yina yadaa'nyi ¹⁹ naangeba (5 kilomitaaya pini, 6 kilomitaaya kini) gamirera sipiya' yisaji aalyavi maarimaarya yina. Sarevidaa'nyi aalyavi a'ba Jizaazai ga'niguna yaka sipiyavi aya kibanna yi'ma'na yakeri tinna wanganna yeva lika naanga yina. ²⁰ Lika naanga yina kye' sai widina “Niminyira. Lika mipinera!” ²¹ Sara widina kya' gamirera dina “Sipiyavi yilamwaalana!” Dina kye' sawwai yilamwaaina kya' sagaa' “Sabanna yi'mavawaana!” desabanna sipiya' yarai yima'naabina ya'.

A'mwera Jizaazarina biresa'nesi.

²² Mwanyavi aalibunya pimagi kwala bwa'naanya' kuna mwaalina yeva dara yawiresa' “O, wona sipiya pini mwari kyiwadi' gave' yila'mwa'dike' daaka!” Nabaai, dara yawiresa' “Sipiya' gannyaraji Jizaazai milamwaalyi yawaali'. Aawa. Sahwari ya'ma'na kyawaaiha' sipiya' gavera damakwiawaalika!” ²³ Dadaapi Anga Taaiviriyaazidaa'nyi aalibumaanga sabaarina sipiya pini bina. Naangei Gotiyari “Su! Su!” widina kya' kwala bwa'naanya' biretiya nesaba samwinebanna sipiya sa bina. ²⁴ Sarevidaa'nyi kwala bwa'naanya' dara wanganesa' “O, Jizaazai pwai midaaka! Jizaazarera pwara midaaka!” Mena deva sipiya sangi yilamwaaina yeva “Jizaazarina biraana!” deva Anga Kaapaniyamina wina ye'.

“Jizaazai Sigunyavine Wapaalyi,” dinike'nesi.

²⁵ Aalibunyavi a'mwera ga'ma'na yeva Jizaazarina birina birina yeva biramaa'na yeva yiwaara'na “Wijiwaakyaigi, dava gathingaa' biwaa?”

²⁶ Jizaazai ja'nawidina “Naanga nebulya'na yihithivanige. Nimi diraginna yadinyangina yijiwaainyangina sidusa' nayaa myawiryadivi' nyibi'maniga'. Aawa. Biretiya neva munya yihinyawaalike'na nyibi'maniga'. ²⁷ Wapaaya bwia bu'denna wawinya' minna! Aawa. Yuyagaa' yuyagaa'ne gaalya'ne wapaaya ge waragwode sanna wawinya' ji! Wapaaya sa A'mweraavine Kaimiraayai gizaavadengi. Sare' dare'nesi. Gotiyai Ganimaangei gannya diraginya' kujaava' baavanaka sawwai sara yadelyira.”

²⁸ Sarevidaa'nyi kumi widina “‘Nemi Gotiyare wawinyanna yaana! dona gara yawaaji yaadeinaavaka?”

²⁹ Jizaazai ja'nawidina “Gotiyare wawinya sa'na daresi. Sahwai widasaabakerina diraginna dilimwagarila!”

³⁰ Sarevidaa'nyi kumi widina “Nabaai, ‘Nemi tinna wanganawaaji gilimwagaana!’ dawaaji yijiwaainya' garivi dineyidevaka? Beri' jiziwaana? ³¹ A'mwamaayaba Ne sinnawinyara sigunyavidaa'nya wapaaya manaaya nyaasare. Gotiyare bukuya' dinikabaabisasi. Sigunyavidaasi wapaaya tika nya'ne wijaava'. Sara dinikesi.”

³² Sarevidaa'nyi Jizaazai widina “Nebulya'na yihithivanige. Mozizai Sigunyavidaa'nya wapaaya' mena yihizayaakei mika! Aawa. Nimaamaangei yuyagaa' Sigunyavidaa'nya Wapaaya Nebulyari yihizaavadelyi. ³³ Sare' dare'nesi. Gotiyare Wapaayai Sigunyavidaa'nyai Kwaakevaki mwaalyaraavina gaalyabwi wijaavadelyi yuyagaa'.”

³⁴ Sarevidaa'nyi kumi widina “A'mwe naangeigi, yuyagaa' wapaaya nediwaanya' dinejaadeiginyi.”

³⁵ Jizaazai widina “Gaalyabwine wapaaya sai sahwainyi. A'mwera aawapaaya tika nyina yadivi' ayawi mijika yina. Aalya nyina yadivi' ayawi mijika yadivitar. Pwai niminyawinna wilaabozi gannya kuryai mijika mwi. Arikewi. Sai nyilimwagozi aalya'na mwinyi yadelyi. Arikawi. ³⁶ Aawa. Nabaai, piriwaaina dara yihithiwa. Tinna nyangamwaasainyi. Manyilimwagyivanigasaihilyi. ³⁷ Nimwai nyijaavajara yuyara niminyawinna bipi'deinyi. Niminyawinna sara boziyari mwasimaginna marasi'nidei mika. Arikewi. ³⁸ Nimi ‘Nimire simunyabwi miwina! Aawa. Nyidasaabakere simunyabwi yima!’ dena Sigunyavidaa'nyi walaabeinyi. ³⁹ Nyidasaabakere simunyabwi daresi. Niminyina yuyaraavi nyijaavake aane pwari kwari myagalya'mayainyi. Aawa. Yirika Aayagaa' sahwari tewaanna yidikaavidelyi. ⁴⁰ Sare' dare'nesi. Nimaamaangere simunyabwi dara yawi'manikesi. Gazaizai Nyibwaalivi wanganoji sahwari limwagaroji yuyagaa' yuyagaa'ne gaalyabwi maarana! Sara kanyida' Yirika Aayagaa' sahwari yidikaavidelyi.”

⁴¹ Jizaazai widina “Sigunyavidaa'nyi Wapaayainyi walaabeinyi.” Widina yake'na Juyara pwara jikurya yeva kinimyagaala dina.

⁴² Sarevidaa'nyi dinyina “Baa'na nediwa'? A'mwe dai Jizaazai Jozepiyare gawaalivaangei daaka! Ganimaangerinaji ganaangevinaji yawi'mwo. ‘Sigunyavidaa'nyi walaabeinyi,’ gara nediwakelaka!”

⁴³ Jizaazai ja'nawidina “Jikurya yeva kinimyagaala dimanigasa'na mipinera! ⁴⁴ Nimwai nyidasaabakei niminyawinna aane pwari kwari mamwagi'nya yaja' sai nimirei yima'nya'nei mabyi yannelyi. Nimwai sahwari mwagi'nyi yajari Yirika Aayagaa' tewaanna mwaalade'na yidikaavideinyi. ⁴⁵ Gotiyari wi'nawijiwaakyara yidayaasangi dara dinikesi. Gotiyai a'mwe yuyaraavi wijiwaakadelyi. Sara dinike' gazaizai

Nimwari kadika wi'nyina yoji gamire wijiwaakya' maarina yada sahwai niminyawinna bathelyi. ⁴⁶A'mwe pwai kwai Nimwari mwanganyadei mi'. Gotiyaryawidaasai dazahwai gaveina wangana' Nimwari. ⁴⁷Naanga nebulya'na yihithivanige. A'mwe nyilimwagarajai yuyagaa' yuyagaa'ne gaalyabwi kininnakelyi. ⁴⁸Sahwainyi gaalyabwine Wapaayainyi. ⁴⁹A'mwamaayaba sarimire Ne sinnawinyara wapaaya manaaya' nyaata kwara balina. ⁵⁰Balina yaasa' Sigunyavidaa'nyi Wapaayai walaabina yake' daresi. Pwai kwai Wapaaya sari maranajai mabalyi yadelyi. ⁵¹Wapaaya sai Sigunyavidaa'nyi walaabeneinyi sahwainyi. A'mwe pwai kwai Wapaaya sainyi nyinajai yuyagaa' yuyagaa' tewaanya mwaaladelyi. Wapaaya nimi wijaawiwija' nimore miwisaji'na nabaai Kwaakevaki mwaalyaraavina miwita saji' muba'muji Kwaakevaki mwaalyaraavi gaalyabwi wimaaridezikira."

⁵²Sara widakevidaa'nyi Juyara maanga naanga dinyina yeva yiwaara'nyina "A'mwe dai gannya miwisaji' nya'ne' gara nejaavannelaka!"

⁵³Sarevidaa'nyi Jizaazai widina "Naanga nebulya'na yihithivanige. A'mweraavine Kaimiraayare miwisajisi gamire tawesi manyi yija' sahwaiginyi gaalyabwi kininnakeigi mi'. ⁵⁴A'mwei nimore miwisaji' nyina, nimore tawe' najai yuyagaa' yuyagaa'ne gaalyabwi kininnakelyi. Yirika Aayagaa' sai baryari yidikaavidelyi. ⁵⁵Sare' dare'nesi. Nimore miwisaji' wapaaya nebulyasi. Nimore tawe' aalya nyinya'ne nebulyasi. ⁵⁶A'mwei nimore miwisaji' nyina, nimore tawe' najai niminyi wilamwaaina nyadelyi. Sari wilamwaaina yidelyi. ⁵⁷Nimwai yuyagaa' gaala mwaaida mwaalikei nyidasaabakeinyi Nimware diraginya'na mwaaihevaai' a'mwei nyinajai nimore diraginya'na mwaaladelyi. ⁵⁸Sigunyavidaa'nyi Wapaaya sai walaabakelyi. Ne sinnawinyara wapaaya manaaya' neva balyaasa' wapaaya sabaai'bita' mika! A'mwei Wapaaya sai najai yuyagaa' yuyagaa' gaala mwaaladelyi."

⁵⁹Anga Kaapaniyami Juyaraavire lotuangevi wijiwaakina yada yuya sa sara wida'.

A'mwera tewaanya mwaalyabwina dinikesi.

⁶⁰Sarevidaa'nyi widake' gamirera kwalaalyara kadika wi'nyina yeva dinyina "Yagaala sa' taangesi. Aai wi'noji daapadevaka!"

⁶¹Jizaazai gannya simunyavi dara yawirake' "Nimore mididivisara savina kinimyagaala yivanigasara daaka!" Sara daka widina "Yihithiwe'na sarimire simunyaburi navika galayigala jihiywaka! Niminyi dinyasi'nyideihi daaka? ⁶²Sarevidaa'nyi sinnawi A'mweraavine Kaimiraayai mwaalakewinna ayina yilaawina kyoji sarimi wangabiza' sagaa' garevaka! ⁶³Yuyagaa'ne gaala sabwi Gotiyare Kuryai yihizaavadelyi. A'mweraavire miwisajiki dimaaryidevwina mi'. Yagaala

sa niminyina yihithivanige sa Gotiyare Kuryaina yihithivanige. Yagaala sa gaalyabwinenna yihithivanige. ⁶⁴Sare kiri' sarimi pwaihi manyilimwagyivanigasaihi mwaaaha!" Sare' dare'nesi. Aayawidaasi Jizaazai malimwagyí yipijaraavina mena yawirake' nabaai sinnawi "Yinagaawai yikamaangeraavi niminyina wibwaridaakwadei daaka!" mena yawirakelyi. ⁶⁵Sai widaka widina "Sarevi dara yihithiwa. Nimwai aane pware kware sidusavi 'Jizaazari dimidina!' yawita mwaki yaja' niminyawinna a'mwe sai mabi yannelyi."

⁶⁶Sarevi gamirera kwalaalyara gaminyi yagalya'maveva ayina wina. Yuyagaa' gamiji ayina myamari ye!. ⁶⁷Sarevidaa'nyi Jizaazai gamirera sivilyiraai ata puridaa'nyi pwaraalyaraavi widina "Nabaai, sawhaihi dinya'mayideihi daaka?"

⁶⁸Saaimoni Pitai ja'nawidina "Naangeigi, aaryawinna wawaadeinaavaka! Aawa, yuyagaa' yuyagaa'ne gaalyabwine yagaalya kininnakeiginyi. ⁶⁹Gilimwaga'manigo. Giminyina dara yawi'mwo. Gotiyare Tewaanaangeiginyi. Girika maayaiginyi. Sara yawi'mwo."

⁷⁰Jizaazai ja'nawidina "Sivilyiraai ata puridaa'nyi pwaraalyaihiri dahilakeihi daaka! Yo, sare' sariminyidaa'nya pwai yimakelyi." ⁷¹Saaimoni Yizikeriyotiyari gawaali' Juthaazarina widina ya'. Sare' dare'nesi. Jizaazarei a'mwe atiraai sivila puridaa'nyi pwaraalyai Juthaazai kwalyi mwaaleva kiri' divi maalikegaa' yikamaangeraavina Jizaazari wibwaridaakwadelyi.

Jizaazalyi gya'mwerari kidarakaavinesi.

7 ¹Sare mena kyima'na' Kwaaka Galili saba Jizaazai kaanya yamarina. Sare' dare'nesi. Juya naangera dinyina "Jizaazari tamakaana!" dinyina yesa'na gamire simunyavi "Kwaaka Juthiya kaanya myamari yidera." ²Sagaa' Juyara "Aya kigaa' Tika Munne Siminange' munne' naadesi," desagaaki. ³Sarevidaa'nyi gamire gya'mwera gaminyina mu'nyadivi' widina "Nimi naangeinyi daakaji, dava ya'mava'giri Kwaaka Juthiya diwodera. 'Naange yivanigenna nimirera tinna wangabika!' da'gizi diwodera. ⁴Sare' dare'nesi. Aane pwai kwai yawi'na 'Yuyara nyangabika!' daka yinike' lika myulyarivani'. Sara yija kwaaka yuyavaki ku'maayaba sara jithera," wide!. ⁵Sare' dare'nesi. Pwara gaminyina "Naangelyi," malimwagyesa' nabaai, gya'mwera malimwagyese.

⁶Sarevidaa'nyi Jizaazai widina "Nyidiwaasa' niminyine tewaanyagaa' myima'nyiwa'. Yuyagaa' sariminyine tewaanyagaa' wari!. ⁷Kwaakevaki mwaalyara sariminyina sinna tika mudayi yipineihilyi. Kiri' nimi 'Sarimire yadivisabwi kayaa'nanaangebulyi,' wijalikurakivanige'na a'mweraavi niminyina sinna tika davina yivanikere. ⁸Tika munne' nipi'dewi jilaawila! Dahaa' Munne savi milaawiwina! Nimore

tewaanyagaa' yuna myiima'nyiwa!." 9 Sara widina yaka Kwaaka Galili pizi'gwa mwaalina ya'.

**Ne sinnawinyara siminya yamwalyaasaviya
Munnevi Jizaazai mwaalake'nesi.**

10 Munnevi gya'mwera mena wawesagaa' Jizaazai mwaalina yaka savina kave wina. A'mwe kwala naangeraji mwiyi. Aawa. Divi kima'nyikaanyabi' kave wina. 11 Sarevidaa'nyi Munnevi Juyara yaamiji birina yeva yiwaara'nyina "Gava mwaalika?"

12 Kwala bwa'naanyavi a'mwera gaminyina a'mabyahaala dinyina dinyina. Pwara widina "A'mwe nawi'nyalyi." Pwara widina "Sare' mi'. Aawa, a'mweraavi kwaasi widadelyi." 13 A'mabyahaala dinyina yeve' kiri' Juya naangeraavina lika yesa'na ku'maayaba aane pwai kwai muji ya'.

14 Munnevi tinnyagaa' Gotiyare Angevi Jizaazai wilaawina yaka wijiwaakina. 15 Wijiwaakina yadaa'nyi Juya naangera atika maru'na'na yadivi' dinyina "Nemire sikuliyangi myake' siduta naange' gara yawiramaarakalaka?" 16 Sarevidaa'nyi Jizaazai ja'nawidina "Wijiwaakadinya' nimore wijiwaakya' mika! Aawa. Wijiwaakya sa' Nyidasaabakeresi. 17 Pwai kwai gannya sidusavi dina 'Gotiyai sara kanedozi sara nebwinna yima!' Dina yaja' yawita kiri' dathelyi 'Gotiyai Jizaazari wijiwaakya' kujaava' Jizaazai sara nejiwaakivanikelyi.' Nabaai yawita piri' dathelyi 'Jizaazai gavei yawiraka yaasiwa'na nejiwaakivanikelyi.' Yi Gotiyare simunyavi midinajai sidusavi diraginna dara yawi'na yade' 'Ai, Jizaazare nejiwaakade' Gotiyaridaa'nya' daaka!' 18 A'mwei gannya sidusavidaa'nyi gannyabwi a'mweraavi widada 'Niminyina a'mwera dinipika! "A'mwe sai naangelyi," sara dinipika!' yawi'delyi. Sara yada kiri' pwai yawi'na 'A'mwera nyidasaabakerina dinipika! "Gotiyai naangelyi. Byaannakelyi," ' yawi'na yada nebulyabwi dadelyi. Sai nadiyabwi gaminyi mwari'. 19 Ne Mozizai Kiwinya' yihizayaakei daaka! Yihizayaaka kiri' sarimijiya aane pwai kwai Kiwinya' dinikebwi myadelyi. Niminyina dinyina 'Sari tamakaana!' Sa'na baa'na dimanigataihilaka?"

20 Kwala bwa'naanya sa' ja'nawidina "Yimakei gimwaalikeigi! Aai giramakajiwaka!"

21 Jizaazai ja'nawidina "Kwazaakegaa' diraginya piri' kye yuyaihi atika maru'na'na yesaihilyi. 22 Ne Mozizai din!' 'Sawita ati ata puridaa'nyi piriwaalyi kajinnoji ginnya kaimiraayare kilaakeji' dithako!' Dinike'na pigaa' Kwazaakegaa' kaimaleri davesaihilyi. Sara yadivi' 'Tewaanyasi,' dadiviki. Sabwi sinnawi Mozizai yakebwi mi'. Aawa. Sinnawi kigaa' waryaakebuliyi. 23 Sarimi dinyina 'Kilaaka daya'na Mozizare Kiwinya kayaaka nyigalaadika! Kwazaakegaa'na yawita myaanna! Kwazaakegaa' kaimaleri kilaakeji' davaadeinera.' Sara dinyina yadivi' Kwazaakegaa'

nabalinakeri maamidarya yinahu yidikaaveinyina sinna tika be'na yihitha'mwaka! ²⁴Sare'na sarimi mwasimaginya' tinna wanganna yadivi' mipina! Aawa. Yawibwata yida'maraangebwi nayaa jila!”

“Kiraazitiyai daaka?” dinesa'nesi.

²⁵Sarevidaa'nyi Anga Jeruzaalemi mwaalya pwara dinyina “Sarina ‘Tamakaana!’ dimanigasai daaka! ²⁶Yithaa, ku'maayaba a'mweraayaba widivanikelyi. Maiyagaala aane piri' kiri' yuyara mujivaniga'. Niwaava, a'mwe naangera mena dinyina ‘Sai Kiraazitiyalyi. Gotiyai dahilakyaakelyi,’ nayaa dinyina yivanigasara midingaka! ²⁷Sare'na kiri' Kiraazitiyai kabozu aane pwai kwai gaminyina dinyina ‘Gawidaasi biwakalaka! Aawa, myawiryadaanyaine.’ A'mwe dai bakewinna yuyaina yawi'mwo.”

²⁸Sarevidaa'nyi Gotiyare Angevi Jizaazai wijiwaakakegaa' sagaa' naangave'na widina “Niminyina tivi yawi'mwaasainyi daaka! Nimi bahewinna jawi'manigava! Nimi sainyi sidusa' yawirena mabye. Aawa. Nebulyai nyidasaabakei sahware myawiranganyadivisalyi. ²⁹Kiri' sai kanyidasaaba' gaminyawidaa'nyi bahe'na sari yawi'manige.”

³⁰Sarevidaa'nyi a'mwe naangera dina “Jizaazari wila pwiyaawaaji kalavuzavi wakaana!” dina yeva yaamiji yina yina yeva Jizaazare balya'negaa' kuna mima'nyi yake'na aane pwai kwai magalalimwagi ye! ³¹Kwala bwa'naanyavi a'mwe kwalaalyara gaminyi limwanna yeva dinyina “Kiraazitiya kwai bozi dahware yijiwaainya yivanike wavila'na yadei daaka! Aawa.”

Jizaazari wila pwiya'na damera wawesa'nesi.

³²Kwala bwa'naanya' sangi Jizaazarina a'mabyahaala didaapi A'mwe Periziyara kadika wi'nyina yeva “Sahwari wila yipika!” deva sahwaraji Gotiyarine tamira'divita naangeraji sara Gotiyare Angevi dameraavi widaasina. ³³Sarevidaa'nyi Jizaazai kwala bwa'naanya' widina “Pizi'gwa sariminyaba mwaala'muji divi nyidasaabakeryawinna kaanya wideinyi. ³⁴Niminyina ‘Tinna wanganaana!’ dizide' kiri' mabiramaari dinyideihilyi. Sagaa' mwaaimujawinna mwiyi jideihilyi.”

³⁵Sarevidaa'nyi Juyara naangera dinyina “Mabiramaari yaanne'na gawinnelaka? A'mwe Girikiyaraavire angengi Juyara mwaaidivisangina wawoji Girikiyaraavi wijiwaakadei daaka? ³⁶Nediwa' ‘Niminyina “Tinna wanganaana!” dizide' kiri' mabiranyimaari dinyidera. Mwaaimujawinna mwiyi jideihilyi.’ Sara nediwake' be yagaala nediwaka?”

Aalya nawi'nya walyuna yadenna gaalyabwinenginesi.

³⁷Munnevi aayagaa' sagaa' naangegaaki. Sagaa' Jizaazai daavina yaka naangave'na widina “Pwai kwai aalya'na mijika wiajai niminyawinna

bozi nadelyira. ³⁸ Gotiyare bukuya' niminyina dinikabaaibi' 'Pwai limwanna nyada gamire munyavidaa'nyi aalya gaalya'ne walaawina yadengira.' ³⁹ Jizaazai nabaai Gotiyare Kuryarina widina. A'mwera Jizaazari limwanna yadivi' maalikegaa' kumire munyangi Kuryai maapi'delyi. Sare' dare'nesi. Sagaa' Jizaazai mabalyi yaka madikaayi yaka Nawi'nyaba byaannakei kuna myima'nyake'na Kuryaregaa' mi'. Divi Jizaazai yilaawina kya' Kuryari wijaayagaa' yima'nakegakira.

A'mweraavire yawita jaapainanya'nesi.

⁴⁰ Kwala bwa'naanyavi a'mwe pwara yagaala sa kadika wi'nyina yeva widina "Nebulyasi. Gotiyari wi'nawijiwaakadei piropetiya kwarina yemwaaيمانigolyi."

⁴¹ Pwara widina "Sai Gotiyai dahilakyaakei Kiraazitiyali."

Widina yesa' kiri' pwara widina "Niwaava, Kiraazitiyai Galilidaa'nyai daaka! ⁴² Gotiyare bukuya' dini' 'Kiraazitiyai Ne Devitimire yisavaakidaa'nyalyi. Nabaai, Deviti mwalyaakeba anga Betilemi saba Kiraazitiyari ganaange' maaradelyi.' Sara dinike' daaka!" ⁴³ Sarevidaa'nyi kwala bwa'naanyavi jaapalya' yima'nyina. Pwara Jizaazarina yilaaya yadaapi pwara yilaaya mi. ⁴⁴ Pwara yawi'na "Kalavuzangevi wimwaihaana!" yawi'na yeve' kiri' aane pwai kwai ata magalalimwagi ye'.

Juya naangera Jizaazari mu'nyesa'nesi.

⁴⁵ Sarevidaa'nyi Gotiyarina mubithika yira'divita naangeraji A'mwe Periziyaraji widaaseta saraayawinna damera ayina wina kye' sahwaraya iwaara'na "Gaminyi mamakabyi be'na yiwaava?"

⁴⁶ Damera ja'nawidina "Pwara manejasare dahaa' a'mwe nedivanikabaaibi'."

⁴⁷ Sarevidaa'nyi Periziyara ja'nawidina "Gamire kwaasi yagaalya'na 'Nebulyasi,' dathiwaa'! ⁴⁸ A'mwe naangeraji Periziyainaji sainaavidaasai pwai kwai gaminyi limwamanikei daaka! ⁴⁹ Aawa. Kwala bwa'naanya da' Ne Mozizare Kiwinya' myawiryeva gaminyi yaasiwa'na limwamanigasa'na Gotiyai Dikevi sahwarava marasi'naderera."

⁵⁰ Nikothimaazai kumijiyai mwaalina. Sinnawi Jizaazaryawi sai angyiri'maata yakelyi. Sai mwaalina yada ⁵¹ widina "Nabaai, 'Yaasiwa'na kotiya' ja' madinyika nemire kiwinya'. Dara dini' 'A'mwere yagaalya nayaa wi'nyina ya'gizi gamirebwina nayaa yawira'gizi divi sagaa' kotiya'na "Kayaa'nanyaigi," dizida'deiginyi,'" wida'.

⁵² Kumi ja'nawidina "Nabaai, Galilidaasaigi daaka! Gotiyarina yida'nikengi nayaa wangana'gizi dara jawi'de' 'Piropetiya pwara Galilidaa'nyara yima'nipi'dera daa!'"

⁵³ Sagaa' wina. Gazaizai gannya angebannelyi.

A'mwe ata limwagakevinesi.

8 ¹Kunnya angengina wina kye! Mugunya Wolivna Jizaazai yilaawina. ²Yilaawina yaka yuna mwanayavi yirike! purakegaa! Gotiyare Angevina ayina wina. Ayina wina kya! gaminyawinna a'mwe yuyara yi'bwa'na yina kye! Jizaazai walamwaaina yina yaka wijiwaakina. ³Wijiwaakina yadaa'nyi Juyaraavire Kiwijarari Periziyarari sara a'mwevi makulaabina. A'mwe sa! pwari ata limwadaa'nyi galalimwanna yesasi. A'mwevi makulaabina yeva a'mwe yuyaraayaba tinnyaba wimwaaihina. ⁴Mi'na wimwaaihina yeva Jizaazari widina “Wijiwaakyaigi, a'mwe da! ata limwagyawaalikevi pwara galalimwagyawaaiha! ⁵Nemire Kiwinyavi Ne Mozizai dakinike! ‘A'mwe! ata limwagaza! tamakya'na silyaji diliwakidesi.’ Sarevidaa'nyi gimi gara dadinyaiginaka?” ⁶Kumi yawi'na “Jizaazari yaamiji yijiwalaana! ‘Sai kayaa'na widina kyoji kotiya' jina yaana!’ dara widaana!” yawi'na yeva widina. Widina kye! kiri! Jizaazai walaruta'nyina yaka kwaakevi gannya asilyi pikarya yida'na. ⁷Pikarya yida'na yadaa'nyi kumi kwara daavina yeva kuna yiwaara'na kye! sai daavina yaka widina “Sarimijiyai pwai dina ‘Kayaa'nanyasi,’ dina yoji yuyagaa'na kayaa'nanya myade sai sahwaiddaa'nyi silya' liwakadelyi.” ⁸Widina yaka ayina walaruta'nyina yaka kwaakevi pikarya yida'na. ⁹Pikarya yida'na yadaa'nyi widakevi kadika wi'nyina yeva kunnya kayaa'nanya yawireva yuyara ya'ma'na. Pwai wina, pwai wina, sara ya'ma'na. Sinnawi a'mwe naangera wina, divi a'mwera wina, divi miginyara wina. Yuyara ya'ma'na kye! Jizaazai gavei mwaalina. A'mwe! tinnyaba daavina yadi'nyiyasi Jizaazai gavei mwaalina. ¹⁰Gavei mwaalina yaka daavina yaka a'mwevi widina “A'mwe!gi, gawi mwaaiha! Yuyara ‘A'mwe kayaa'nanyasira,’ gizidaveva sila magiliwakiwaatara daa!” ¹¹A'mwe! widina “Naangeigi, aawa, aane pwai kwai mika!”
Jizaazai widina “Nabaai, sara yiwaasa! nimiji sara magizida'muna! Wawa'gizi kiri! dahaa'daasi kayaa'nanyabwi ayina minna!”

Kwaakevakina Jizaazai di'baakerinesi.

¹²Sarevidaa'nyi Gotiyare Angevi kwala bwa'naanya' mwaaidapiyaraavi Jizaazai ayina widina “Kwaakevaki mwaalyaraavire Baakeinyi. Pwai nyimidinaabozi jihinyavi kaanya myamari yadelyi. Arikewi. Aawa. Sahwai Gaalya'ne Baakei kininnakei mwaaladelyi.”

¹³Sarevidaa'nyi a'mwe Periziyara widina “Gimi sahwaiginyina nejalikurakiwaanya! yaasiwa'na nediwaa. Sabwi gaveigi dadinyaigire jalikurakya' nebula' mi!”

¹⁴Jizaazai ja'nawidina “Aawa, niminyina yihizalikurakiwija! kiri! nimore yihithadinya! nebulyasi. Kaanya bahevidaa'nya! yawi'mwe! kaanya widewinnya! yawi'mwe'na nebulyasi nimore yagaalya! Kaanya bevidaa'nya!”

sarimi myawiriwaasa' kaanya widewinnya' myawiriwaasa'nanyi. ¹⁵ Sarimi a'mweraavirebwi kilaakejisiyabwi yawi'divi' yawibwa'divisaihilyi. Dahaa' aane pwari kwari kotiya' myawibwarivanige. ¹⁶ Kiri' yawibwa'muja' nimiré yawibwata sa' nebulyasi. Gaveinyi mika. Aawa. Nimiji nyidasaabakelyi sainaai widakade'na nebulya' widadinyainyi nimi. ¹⁷ Nabaai sarimire Kiwinya' dara dinikesi. A'mweraare jalikurakya' nebulyasi. ¹⁸ Sara dinike'na niminyina yihizalikurakivanige', nabaai, nyidasaabakei Nimwai niminyina nayaa yihizalikulakivanikelyi."

¹⁹ Sarevidaa'nyi kumi yiwaara'na "Gimaamaangei gawi mwaalika?" Widina kye' Jizaazai ja'nawidina "Sarimi niminyi myawiriwaa'. Nimaamaangeri myawiriwaa'. Niminyina yawipija' Nimwarina kyawipidika!" ²⁰ Gotiyare Angevi ku'dika Gotiyarina nigwibukusa wa'di'nyiyaba Jizaazai wijiwaakada yagaala yuya sa widina. Sara widakeri aane pwai kwai kalavuzana magalalimwagi. Gamiregaa' balya'negaa' mima'nyi yake'na magalalimwagi ye'.

"Nimi wiwijawinna diwideihi mi," widake'nesi.

²¹ Sarevidaa'nyi Jizaazai ayina widina "Kaanna kwawa'muri sarimi yaasiwa'na birina nyapiji kiri' sarimire kayaa'nanyaburi divalyideihilyi. Nimi wiwijawinna sarimi mabyi yipineihilyi."

²² Sarevidaa'nyi Juyara naangera dinyina "Niminyi 'Nimi wiwijawinna sarimi mabyi yipineihilyi,' widina neyiwake'na gaminyi tamakinadei daaka? Gara nediwaka?" ²³ Sara dinyina kye' sai widina "Sarimi dava kwaakewinyangidaa'nyaihilyi. Nimi Munyabadaa'nyainyi. Kwaaka davakidaa'nyaihilyi. Kwaaka davakidaa'nyainyi mi'. ²⁴ Sarevidaa'nyi dara yihithiwe. Sarimire kayaa'nanyangi divalyideihilyi. Sare' dare'nesi. 'Mwaaiheinyi niminyira,' yihithivanige' malimwagi yipijaihi sarimire kayaa'nanyangi divalyideihilyi."

²⁵ Sarevidaa'nyi kumi widina "Bewaiginaka?" Sara widina kye' Jizaazai widina "Ayawidaa'nyi yihithadinyainyi. ²⁶ Yagaala kwalaalya yihithiwijaihilyi. Yadivita kwalaalyangina yihithiwijainyi. Sarengina yihyawibwa'mujainyi. Sare' kiri' nyidasaabakei nebulyalyi. Nyidiwake yagaala sa kadika wi'nadi kwaakevaki mwaalyaraavi widadinyainyi."

²⁷ Ganimaangerina widake' sidusa myawirina. ²⁸ Sarevidaa'nyi Jizaazai widina "A'mweraavine Kaimiraayari makilarimwapiji dara jawiryide' 'O, Jizaazai neda' "Mwaaiheinyi niminyira," nedake' nebulya' daaka! Nabaai 'O, gaminyi simunyavi aane piri' kiri' mijivanika!' Aawa. Nimwai sara nyjiwaakiwakabaabi' nayaa sare yihithivanige. ²⁹ Nyidasaabakei nimiji mwaaidelyi. Nyidasaabakei yilaaya yade yuyagaa' sara yadinyana nimi gaveinyi manya'mayiwakelyi."

³⁰ Yagaala sa Jizaazai widake a'mwe kwalaalyara kadika wi'nyina yeva gaminyi limwanna yesalyi.

Yaasiwa'wawinyaraavinaji a'mwe diraginyaraavinajiya'nesi.

³¹ Sarevidaa'nyi Juyara Jizaazari limwanna yesaraavi Jizaazai widina “Nimire yagaalyavi sara mwaabizaihi nimireihi nebulyaihi dimwaalyideihilyi. Sara yapiji nayaa dinyimidinyideihilyi. ³² Nimire nebulyabwi yipijaihi nebulyabwina sarimire yaasiwa'wawinya yihimarsi'nadengira.”

³³ Kumi widina “Ne Eviraamimire yisilyaina. Gamire kaimiraayainera. Yuyagaa' yaasiwa'wawinya myadaa mwaaihoinera. ‘Sarimire yaasiwa'wawinya' yihimarsi'nadengira,’ nediwaanya be yagaalavaka?”

³⁴ Jizaazai ja'nawidina “Naanga nebulya'na yihithivanige. Gazaizai kayaa'nanyabwi yada kayaa'nanyabwine'na yaasiwa'wawinyalyi. ³⁵ Yaasiwa'wawinya kwai yuyagaa' yuyagaa' angevi mamwaalyadelyi. Gawaali' yuyagaa' yuyagaa' angevi mwaaidelyi. ³⁶ Sarevidaa'nyi Gotiyari Gawaali' sarinnya yaasiwa'wawinya kyihpalasi'noji diraginyaihi nebwinna dimwaalyideihilyi. ³⁷ Sarinnya kilaakejikana ‘Eviraamimire yisilyaihilyi,’ yawi'mwa. Sa'na kiri' niminyina dina ‘Nemire sidusangi gamire yagaalya' mulannera!’ dina yadivisa'na ‘Sari tamakaana!’ dinyina yivanigasaihilyi. ³⁸ Nimwaryaba yawirangane sara yihithivanige. Sarevidaa'nyi sirinimaangeri wi'neva sara yivanigasaihilyira.”

³⁹ Kumi ja'nawidina “Aawa, Ne Eviraami nenimaangelyi. Sahwalyi.” Widina kye' Jizaazai widina “Eviraamimireihi mwaabizi kwaji Eviraami yaake avaalyabwi kyipidika! ⁴⁰ Yuyagaa' Gotiyari kadika wi'nena nebulya' sara yihithadinyainyi. Sara yadi kiri' niminyina dinyina ‘Sari tamakaana!’ Sabwi Eviraami myina. ⁴¹ Sirinimaangei yadevwi yivanigasaihilyi.” Sara widina kya' kumi yarai widina “A'mwe yaasiwa' maryawakidivi' nemwaahinikeina mi'. Nenimaanga gavei kininnakeine Gotiyai.”

⁴² Jizaazai widina “Gotiyai sirinimaangei nebwinna mwaalaji kwaji niminyina kyihivu'nadika! Sare' dare'nesi. Gotiyaridaa'nyainyi walaabina yena dava mwaaihe. Sare' dare'nesi. Simunya nimirevidaa'nyi bina yeinyina mi'. Aawa. Gotiyai sawwai nidasaabakeinyi. ⁴³ Yagaalya' yihithivanige' myawiramaari baa'na yivaniga'? Nimire yagaalya'na sarimi mu'nyi yipineihilyi. Sarimi dinyina ‘Kadika mu'naannera!’ ⁴⁴ Sirinimaangei Kotiya' Jadereihilyi. Sirinimaangere yawisaji gamirebulyi sangina dinyina ‘Sabwi yaana! Nevu'nivanikebulyi.’ Sawwai sinnawidaa'nyi a'mweraavi tamakadelyi. Gamire sidusavi nebulya' maaya kunesi. Sare'na yuyagaa' nebulyaburi madaayadelyi. Sare'na yuyagaa' nebulya'na sinna tika wida'delyi. Kwaasi yagaalya' dadei gami sawwarebwi yadelyi. Kwaasi yagaalyaburi gyakwalaangelyi. Sare'na kwaasi yagaalya' dada gannyangi dadelyi. ⁴⁵ Nebulya' yihithadinyana'na manyilimwagyadivita gamireihilyi. ⁴⁶ Niminyina nebwinna aai widiwaka

'Kayaa'nanyabulyiyalyi!' Aawa. Nebulya' yihithadi malimwagy'i baa'na nyadivitaihilaka? ⁴⁷Gotiyaridaa'nyai Gotiyare yagaalya kadika wi'nadelyi. Sarevi sarimi Gotiyaridaa'nyaihi Gotiyareih'i mamwaalyigasa'na yagaala sa mu'nyivanigasaiahilyira."

Jizaazalyi Ne Eviraamiji saraarinesi.

⁴⁸Juyara Jizaazari ja'nawidina "Giminyina 'Sai kayaa'nanyai Kwaaka Sameriya mwaalyalyi. Yimakei kininnakelyi,' nebwina sara dinoina daaka!"

⁴⁹Jizaazai ja'nawidina "Yimakei maayainyi. Aawa. Nimaamaangerine yaya' munyaba makidinyainyi. Sara makidinya kiri' niminyine yaya' marulawakadivisaiahilyi. ⁵⁰'Nimi a'mwe naangeinyi, byaannakeinyi,' majadi mabirivanige a'mweraavina. Aawa. Pwai niminyina 'A'mwe naangei byaannakelyi,' dada niminyina 'Nebwina dadelyi,' jawibwa'delyi. ⁵¹Naanga nebulya'na yihithivanige. Pwai kwai nimore yagaalya' midinajai yuyagaa' yuyagaa' balyabwi mwanganyi yadelyi. Arikawi."

⁵²Juyara widina "Sare'na giminyina 'Sarei yimakei kininnakelyi,' diraginna yawi'mwo. Ne Eviraami balina yaa'. Gotiyari wi'nawijiwaakyara piropetiyara balina yaa'. Sare' kiri' nediwaa 'Pwai kwai nimore yagaalya' midinajai yuyagaa' yuyagaa' balyabwi myagaanganyi yadelyi. Arikawi.' ⁵³Neyakwalaanga Eviraami balyaakerina, 'Eviraami maalikelyi. Nimi naangeinyi,' sara danediwaa! Nabaai, piropetiyara balina yaasa' gimi sahwaiginyina yawi'dinyaigi bewaiginaka!"

⁵⁴Jizaazai ja'nawidina "Nimi gaveinyi widina 'A'mwe naangeinyi, byaannakeinyi,' sara widina yiwija' ninnya byaannya' yaasiwa'na yima'nadesi. Sa' kunesi. Niminyina 'Sai byaannakelyi,' widina yade Nimaamaangelyi. Nimwai sahwarina sarimi dinyina 'Nemire Gotiyalyi,' dinyina yadivita sahwalyi. Sare'na niminyina avaa'ina kadipidikeihilyi. ⁵⁵Yuyagaa' gaminyi myawiramaarivanigasa' kiri' gaminyi yawiramaa'manige. 'Sari myawirivanige,' yihithiwiji kwaji kwaasi dadinyainyi sarimibisainyi kyima'niwidika! Sare'na gaminyina yawi'manige' gamire yagaalya' sara mididinyainyi. ⁵⁶Sirinimaanga Eviraami niminyina dina " "Gotiyai dahilakakeregaa' wanganima!" da'muji yilaaya yiwijainyi.' Dina yaka sare' tinna wanganaka yilaaya yina yaa'."

⁵⁷Sarevidaa'nyi Juyara widina "Neigi daaka! Kwarama pwaraare sivilatiraai pware atiraalya gwawilavakeigi daaka! Ne sinnawinya Eviraamimi tinna danganye!" ⁵⁸Jizaazai widina "Naanga nebulya'na yihithivanige. Sinnawi Ne Eviraami mima'nyagaa'daa'nyi sawainyi niminyira." ⁵⁹Sarevidaa'nyi kumi "Sila liwakaana!" deva livina kye' kiri' Jizaazai yulya'na yaka Gotiyare Angevina ya'ma'na yina ya'.

Jizaazai tibinyari tewaanya tinnakeri yavada'galake'nesi.

9 ¹Jizaazai kaanya yamaryada a'mwe pwari tinna wangamabina. A'mwe sari mudangegaa'daa'nyi tibinyai mwaala! ²Tinna wangamabina kya' gamirera yiwaara'na “Nejiwaakadinyaigi, tibinyarina kayaa'nanyabwi aai yake'na yima'nakalaka mudangegaa'? Sahwai kayaa'nanyabwi yakei dingaka? Gaminyi ganimaangeyoi kayaa'nanyabwi yagilyayoi dingaka?”

³Jizaazai ja'nawidina “Tibinyai mwaalike'na gamire kayaa'nanyaji ganimaangeyore kayaa'nanyaji sangina mika. Aawa. Tibinyai mwaalike'na Gotiyai ‘Gaminyina nimire wawinyanna wijiwaainima!’ daka sara ya'nesi. ⁴Yirike' pu'daa'nyi nyimaryasaabakere wawinya kuna yaanneinera. Divi aane pwai kwai wawinya mi yannegaa' jinnadesi. ⁵Kwaakevaki mwaaidi kwaakevaki mwaalyaraavine Baakeinyi.”

⁶Jizaazai mena widina yakegaa' kwaake' maaraka kwaakevi maagwala wiraa'mavaka maagwalyasi kwaakesi yamwaihaka a'mwere tinnyaraari araka marayepuraka ⁷widina “Aalibunya Silowamiyawinna wawa'giri ginnya sinnya' aalya jinana!” widina. Yaya' Silowami “Maryasaawinikevi,” dinikesi. Sarevidaa'nyi a'mwei wawaka gannya sinnya' aalya yinaka tinna nayaa wangada ayina bina ya'.

⁸Sarevidaa'nyi gamire ange' avaalyaba mwaalyaraji sinnawi sai “Nigwia nyijaama!” widadaa'nyiyari tinna wanganesaraji yiwaara'nyina “Walamwaaina yada a'mweraavi ‘Nigwia nyijaama!’ widadei midaaka?” ⁹Pwara widina “Sahwalyi,” widina yesa' kiri' pwara widina “Aawa, sai mika! Saibisalyi.” Sara dinyina yadaapi a'mwe sai widina “Sahwainyira.” ¹⁰Sarevidaa'nyi kumi yiwaara'na “Ginnya tinnyaraai tewaanyaraai wa'di'nyi gara yima'niwaka?” ¹¹Gami ja'nawidina “A'mwe Jizaazai wo'nikei araka yamwaihaka ninnya tinnyaraari maranyiraka nyidiwa' ‘Silowamiyawinna wawa'gizi ginnya sinnya' aalya jinana!’ Sarevidaa'nyi kaanya wina yena yiniwegaa' sagaa' tinna yarai wangamweinyi.” ¹²Sara widina kya' kumi yiwaara'na “Gawi mwaalika?” Gami widina “Aawa, sarina myawiriwa. Gawi dahamwaalika?”

Periziyara tibinyari kave yiwaaravesa'nesi.

¹³A'mwe Periziyaraayawinna a'mwera kigaa' tibinyai mwaalakeri yibwaramakuna. ¹⁴Jizaazai araka yamwaihaka gamire tinnyaraai “Yenana!” dakegaa' Juyaraavire Kwazaakegaaki. ¹⁵Sarevidaa'nyi Kwazaakegaa'na Periziyara yiwaara'na “Tinna tewaanna wangamaniginya' gara yagineka?” Yiwaara'na kye' sai widina “Nimire tinnyaraari araka piri' kamaranyi'mwa' ninnya sinnya' aalya yinena, yithaa, tinna tewaanna wangamanige.”

¹⁶Sarevidaa'nyi Periziya pwara widina “Kiwinya Kwazaakegaa' myade'na a'mwe sari Gotiyai maryasaabakei mika. Tewaanyai mika!”

Widina kye! kiri! pwara widina “Sabwi yijiwaainya yakebwi a'mwe kayaa'nanyai gara yannelaka! Tewaanyai dingaka?” Sara dinyina yeva kuminyi jaapainyina yadivi! maanga dinyina ye!

¹⁷Sarevidaa'nyi pigaa! Periziyara a'mweri ayina yiwaara'na “Nediwaa 'Nimire tinnyaraai tewaanyaraai wakiwa!' Nabaai, nediwaanya' sarina beriva nedivanigi?” A'mwei widina “Gotiyari wi'nawijiwaakyai piropetiayali.”

¹⁸Sarevidaa'nyi Juyara naangera siduta ge' ge' yawi'na yeva dara mu'nyi yesa! “Ai, sinnawi tibinyai mwaalaka dahaa' tinna nayaa wangamanikei daaka!” Mujevegaa'na pwaraavi widina “A'mwe dari ganimaangeyorina dimaraawila!” ¹⁹Sawinna bina kyagi a'mwe naangera yiwaara'na “A'mwe dai kiribwaalivaangei daaka? Mudangegaa' 'Tibinyai daaka!' dathahi? Sarevidaa'nyi dahaa' tinnya' gara yaka wangamanika?”

²⁰Sarevidaa'nyi neyoi ja'nawidina “ ‘Sahwai nehiribwaalivaangelyi. Mudangegaa' tibinyai maarolyai daaka!' yawi'manigoi. ²¹Sare'na dahaa' tinna wangamanike'na myawirivanigoi. 'Tinna jena!' widiwakeri mwanganya'naalyira. Gaminyi jiwaarayila! Nehiribwaalivaangei a'mwelyi. Sahwai gaminyina yihithathelyi.” ²²Juya naangeraavina lika yadisa'na neyoi sara widina. Sare' dare'nesi. Juya naangera mena dinyina “Yo, pwai kwai widina ‘Sahwai Kiraazitiyalyi. Gotiyai dahilakyaakelyi,' widina neyajai nemi widina yaanneinera 'Nemire lotuangengi muidinna! Maaveiginyi.' ” ²³Mena dinyina yesavidaa'nyi lika yagila sara widina. Neyoi widina “A'mwelyi. Gaminyi jiwaarayila!”

²⁴Sarevidaa'nyi pigasaai a'mwei mudangegaa' tibinyai yima'nakerina ayina jaka widina yeva gaminyi widina “Gotiyai gwangamanikerina 'Byaannakelyi,' duthana! Sare'na nedana! A'mwe sari nediwaanyai 'A'mwe kayaa'nanyalyi,' nayaa sara yawi'manigo.” ²⁵Sarevidaa'nyi a'mwe sai ja'nawidina “ ‘A'mwei nawi'nyai dingaka? Kayaa'nanyai dingaka?' Sare' myawirivanige. Gave piri'na yawi'mwa 'Kigaa' tibinyainyi mwaale. Dahaa' tinnakeinyi tinna wangamanigeinyi.' Sara yawi'mwa.” ²⁶Sarevidaa'nyi kumi yiwaara'na “Giminyi gara gyaka? Gara yaka 'Tinna jena!' githiwake'?” ²⁷A'mwei ja'nawidina “Mena yihithiwa. Sara yihithiwe' kadika mu'nyywaataihi daa! 'Savi kadika wi'naana!' ayina baa'na nyidiwaa!. Sarimire simunyavi 'Gamireina yima'naana!' dimanigasaihi daaka!” wida!. ²⁸Sara widina kya' kumi sari birala widina yeva widina “A'mwe sahwareiginyi. Nemi Ne Mozizareinera. Sari mididaanyaina. ²⁹Gotiyai Mozizari wijaake'na yawi'mwo. 'A'mwe pwai gawidaa'nyai dingaka!' nemi myawiriwo.”

³⁰A'mwei ja'nawidina “Sara nyidiwaasa'na atika maru'na'manige. Sawidaa'nyai bake'na myawirivanigasai 'Tinna jena!' nyidiwakelyi. ³¹A'mwera kayaa'nanyabwi yadivisaraavi Gotiyai kadika mu'nyi yivanike' yawi'mwo. Aawa. Pwai kwai Gotiyarina dina 'Naangelyi.

Lika yadinyalyi. Sara nyidathe' gamire simunyavi sara yideinyi,' daderi Gotiyai kadika nayaa wi'nyina yivanikelyi. ³²Sinnawi Kwaakevaki wakyakegaa'daasi yuyagaa' kadika dara mu'nyadaanya' 'O, pwai mudangegaa' tibinyai yima'nakeri "Tinna jena!" dathaka! Sara mu'nyadaanyainera. ³³Gotiyaryawidaa'nyi mabi yajai Gotiyare diraginya aane piri' kiri' kyadika' mika."

³⁴Kumi widina "Mudangegaa' yuna kayaa'nanyaiginyi. Divi kuna kayaa'nanyabwi yadinyaiginyi. Sareigi danejiwakiwaana!" Sara widina yeva lotuangevi gaminyi marasi'nyina ye'.

Simunya kayaa'na yinike'nesi.

³⁵Jizaazai kadika dara wi'nake' "Lotuangevi a'mwerina dasi'niwaa!" Mena daka a'mweri biramaa'na yaka widina "A'mweraavine Kaimiraayari dalimwaga'manigina?" ³⁶Widina kya' a'mwei widina "A'mwe naangeigi, a'mwela divaniginyarina 'Sahwari midinima!' dena dinyibwaridaakwia!" ³⁷Jizaazai widina "Gami sahwari tinna mena wangamwaa. Sai dahaa' githivanikei sahwalai." ³⁸A'mwei widina "Naangeigi, gilimwaga'manigena." Widina yaka Jizaazaryaba kwadaai gilina yaka lotuya yina ya'.

³⁹Jizaazai yuyaraavi widina "Kwaaka davaki nimi a'mweraavi yawibwata'na bina ye. 'Tibinyara bi'manigasara, nabaai sara wangabika!' dena bina. 'Tinnakera "Nemi tewaanyainera," dadivitaru, nabaai, tibinyara yima'nipika!' dena bina ye."

⁴⁰Periziya pwara gaminyi mwaalesara Jizaazai widake' kadika wi'neva yiwaara'na "Neminyina dathiwaana? 'Tibinyaihi Gotiyarina sidusa' myawirivaniga!', sara dathiwaana?" ⁴¹Jizaazai widina "Tibinyaihi bi'manigasaihi mwaabizi kwaji kayaa'nanyaihi kuna mamwaalyi kypidika! Sa'na 'Tinna nayaa wangamanigo tewaanyaina,' dadivi' kayaa'nanya kininnakeihi mwaaiha'."

Sipizipiyaraavine kurisa'nesi.

10 ¹Jizaazai wida' "Naanga nebulya'na yihithivanige. Sipizipikurisavi tikuryavi mulyi yaja' kiri' kukidaa'nyi dikwosi'na yajai yi sai kukelyi. Nabaai, kuka yipalamaa'delyi. ²Tikuryavina a'mwe pwai wilaabina yajai sai sipizipiyaraavi maremwaaidelyi. ³Sahwarina kaanyavi maremwaaidei kaanya basadaawori sipizipiyaraavi maremwaaide sai gannya sipizipiyaraavi 'Yinagaawai! Yinagaavaiha!' jaka widina yadaa'nyi sipizipiyara gaminyi maanguraaya' kadika wi'nyina yadaapi mwasilaanna yibwaramakwalyuna yadelyi. ⁴Mwasilaa gannya yuyaraavi mena yibwaramakwalyuna yada sinnawi waanyina yadaa'nyi gaminyi midinna yadivi' gamire maanguraaya' wi'namaa'na yadivisa'na mididiviki. ⁵A'mwe mudikeri mididivi' mi'. Arikawi. Aawa.

Mudikerina likaanya wina. Mudikeraavire maanguraaya' yadivisa'na likaanya wina yadivisarera.”

⁶Jizaazai yagaala ke'ba'nanya sa' kuda' kiri' kumi dinyina “Nediwaka sa' be yagaalavaka? Myawiriwona.”

Jizaazai sipizipiyaraavi maremwaaide tewaanyarinesi.

⁷Sarevidaa'nyi Jizaazai ayina widina “Naanga nebulya'na yihithivanige. Nimi sainyi sipizipiyaraavine kaadihisainyi. ⁸Yuya pwara sinnawi kukera kuka yipalamaa'divisarera. Nimi mabyahaa' kwaasiyara yihithesa' kiri' sipizipiyara nimirera kadika mu'nyi ye'. ⁹Kaadihisainyi niminyira. Niminyawinna a'mwe pwai bazai kusawinna wilajai Gotiyai wivadaihasamaadelyi. Sipizipikurisavi sai wilamwaaina yada mwasilaa wapaaya bwalyamaa'na yada yawinna wilina yadelyi. ¹⁰Kukei ‘Kuka maarima! Saraavi tamima! Saraavi kayaaka yigalakima!’ dada badelyi. Nimi ‘Saraavi gaalyabwi maapika! Yi gaalyabwi naanga naanga maapika! Muna winana!’ dena baheinyi.

¹¹Sipizipiyaraavi maremwaaide tewaanyai niminyira. Sipizipiyaraavi maremwaaide tewaanyai dina ‘Nimirera mwaabika! Nimi balima! Nimirera nabaibithika!’ dada gamire gaalyabwi walakina yadelyira. ¹²Nigwiwawinyai kavijilikei boziyari tinna wangoji sipizipiyaraavi ya'ma'na yoji likaanya wina. Nigwiwawinyai sipizipiyaraavi maremwaaidei mika. Gannyaraavi gyakwai mika. Savidaa'nyi sai likaanya wina. Likaanya wina kyoji kavijilikei sipizipiyaraavi tika davina kyoji pwara piwinna piwinna likaanya wina yapiji yiwinadaa'na yipi'derera. ¹³Nigwiwawinyai gannya nigwiannaji gannya kilaakeji'naji gavenna yawi'na yada myawirina ‘Sipizipiyaraavina yilaaya yima! Tewaanna maremwaaimujainyi,’ sara myawiryori nigwiwawinyai likaanya wina yadelyi. ¹⁴⁻¹⁵Sipizipiyaraavi maremwaaide tewaanyai niminyira. Nimwai niminyi nyawi'da nimi Nimwari yawi'dinyabaabi' nimi nimireraavi yawi'di kumi niminyi nyawi'divisainyi. Kuminyi yawi'di kuminyina nimire gaalyabwi walakina yadi baimujainyi. ¹⁶Sipizipiya pwara nimirera mwaalina yadivi' sipizipikurita davi mamwaalyi yadivisarera. Sahwaraaviji makabina yidere. Nimire maanguraaya' kadika nyu'napiri dahaa' nimire sipizipiyara mwaaihasaraji mudikera nimireraji sipizipikwala gave' yima'nipi'desira. Yuyaraavi maremwaaladei gavei mwaalikelyira.

¹⁷Savidaa'nyi nimi dina “‘Nimire gaalyabwi ayina maarima!’ da'muji nimireraavina sabwi walakideinyi,’ dadinya'na Nimwai niminyina kurya nyukadelyi. ¹⁸Aane pwai kwai nimire gaalyabwi mamaaryiwa!. Aawa. Nimi sainyi kave walakina yideinyi. Nimi navika mwaalina kya'muri pwara nyiramakipi'de' mi!. Aawa, nimi sainyi dina ‘Pwara nyiramakipika!’ dina kya'muri nyiramakipi'deinyi.

Sahwainyi diraginyainyi dina 'Pwaraavina balima!' nabaai Nimwai sara nyidakakeinyi diraginya' nyijaavake' divi sara yideinyira."

¹⁹Jizaazare yagaala sanna kadika wi'nyina yeva Juyara maanga dinyina yeva ayina jaapainyina. ²⁰Kwalaalyara dinyina "Yimakei kininnakelyi. Aa'neliyi. Yimakyagaala divanikelyira. Gaminyi kadika baa'na wi'niwaava!" ²¹Sara dinyina yadaapi pwara widina "Yagaala sa yimakei wilamwaaidere yagaala mika. Aa'nei a'mwe tibinyari "Tinna jena!' gara widiwaka?" widina ye' Juyara.

Juyara Jizaazari malimwagyesa'nesi.

²²Pigaa' Anga Jeruzaalemi Juyara yawi'divi' "Gotiyare Ange' tewaanya' ayina yima'nyaake'na tika munne naana! Gotiyari yilaaya yaana!" Dinyina yesagaa' yirilyagaa' burikegaaki. ²³Munne sagaa' Gotiyare Angevi Ne Solomonimine yihukangevi Jizaazai kaanya yamarina. ²⁴Sarevidaa'nyi gaminyawinna Juyara yikabina, dakwamwada'na yeva widina "Nemi 'Sahwai dingaka? Pwai dingaka?' kuna yawi'manigo'na nayaa gathingaa' dinedathevaka? Aangyagaala nebwinna kavena dinedana! Kiraazitiyaigi Gotiyai githahilakakeigi mwaaidiza' naange'nanya' dinedana!"

²⁵Jizaazai ja'nawidina "Mena yihithena kiri' niminyi malimwagyi yiwaava. Nimaamaangere diraginyasi tewaanna yivanige wawinyanna nayaa nyijalikurakyaka kiri' sarimi manyilimwagiyivaniga'.

²⁶Nimire sipizipiyaihi mwaabizi kwaji kanyilimwabithika! Nimire sipizipiyaihirina mi'. Sare'na manyilimwagiyivaniga'. ²⁷Nimire sipizipiyara nimire maanguraaya' kadika wi'nadivi' nimi yawi'manige sarera nyimididivisare. ²⁸Yuyagaa' yuyagaa'ne gaalyabwi wijaavadi yuyagaa' yuyagaa' myiwiyi yipi'dere. Arikawi. Nimireraavi a'mwe pwai kwai nimire asiri myipalasi'nyi nyapiji kayaa'na myi yipi'dere. ²⁹Nimaamaangei sahwarraavi nyijaavakei diraginaangelyi. Yuyara pwara diragimaayare. Nimaamaangei maremwaaimanikeraavi aane pwai kwai Nimware asiri mipalasi'nyi yannere. ³⁰Nimiji Nimwalyi sanidainai avaalyainaalyi," widina ya' Jizaazai.

³¹Sagaa' Juyara "Tamakya'na silaange liwakaana!" deva sila ayina maarina. ³²Ayina maarina kye' Jizaazai ja'nawidina "Nimwai nyida' 'Diraginyaji tewaanyaji ja!' Sara kanyida' sariminyawi kwalaalya sara yiwa. Nimire wawinya gari'na yawi'divi' 'Liwakaana!' dadivi' yivanigava silyaji?"

³³Juyara ja'nawidina "Gimi wawinya tewaanyavina 'Sila liwakaana!' divanigo'na mi'. Aawa. Gotiyarina birala yivaniginya'na sa'na yawi'daa' 'Sila liwakaana!' divanigo'na. Gimi sahwaigi a'mweigi kwaigi kiri' nediwaa 'Nimi Gotiyainyi,' sara nediwaa'na birala yivaniginyaiginyi a'mwe kwaigi."

³⁴ Jizaazai ja'nawidina “Sarimire yagaakiwinya' dini' 'Gotiyai widina “Sarimi gotiyaihilyi.” ’ ³⁵ Sara dinike' nabaai, 'Yuyagaa' Gotiyare bukuyavi yagaalya' dinike' waragothesi,' yawi'daanyainera. A'mwe saraavi Gotiyai widina 'Sarimi gotiyaihilyi,' widina yaake'nanyi. ³⁶ Sare' Nimwai gamire wawinya'na nayaa yide'na tewaanyainyi nyidahilakaka Kwaakevakina maryasaabina kanya' sareinyi 'Gotiyari Gawaalivaangeinyi,' yihithiwe'na 'Sahwai Gotiyari birala yiwaka,' gara dimaniga! ³⁷ Yithaa, Nimwai yivanikabaabi' gamire wawinyanna myiwiji kwaji malimwagyi dinyideihilyi. Sarebwi tewaanyabulyi. ³⁸ Sare' kiri' Nimwai yivanikabaabi' nimi sara yivanige'na dinyilimwagyla! Nimi yagaala yihithiwe'na malimwagyi nyipija' wawinya sanna yivanigevwi wanganapiri dilimwagyla! Sara yapiri “O, Nimwai Jizaazari wilamwaalikei daaka! Jizaazai Nimwari wilamwaaidei daaka!” yawiraana! Kuna sara yawiraana!’ dapiri wawinya sanna dilimwagyla.”

³⁹ Sarevidaa'nyi kumi yagaalya'na jikurya yeva ayina yawi'na “Kalavuzana'na wila pwiyaana!” Sara deva yesa'. Jizaazai kuminyabadaa'nyi kaanna wodaa'nyi tinna wanganeva wanganakina ye'.

⁴⁰ Aalya Jothaniyavi Jizaazai ayina ga'ma'na yaka sinnawi sagaa' Joni aalyavi bavitaaziya' yakewi wina yaka saba mwaalina. Saba mwaalina yadi'nyi ⁴¹ gaminyawinna a'mwe kwalaalyara bina. “Joni sahwai atika maru'nata aane piri' kiri' myi ya'. Yuya a'mwe darina nedakabaabisa nebulyangi,” dinyina yeva bina. ⁴² Bina kye' saba a'mwe kwalaalyara gaminyi limwaga'na ye'.

A'mwe Lazaarazai balake'nesi.

11 ¹ A'mwe pwai Lazaarazai wo'nikei Anga Betaani mwaalyai nabalinakei yima'nyina. Anga Betaani savi Maariyaasi ganaanaanga Maathasi sanadaai mwaalagilyabanyi. ² Maariyaa sa' Naangere sivilyaraari welivananya wabatirinya' dingina yaka gannya mijasasi yiwaipiwanna yake' gaminyi gathaakaanga Lazaarazai nabalinakei mwaalakesi. ³ Nabalinakei yima'nyina yakevidaa'nyi kinadaai Jizaazari yagaalya' widaasina “Naangeigi, ginnya ja'mwei nalaavinakelyi,” widaasina yagi.

⁴ Jizaazai kirimire yagaalya' widaasagilya' kadika wi'nyina yaka gamireraavi widina “Nabalya sa' yuna balyabwine'na mika. Aawa. Nabalya sa' yima'niwa'dike'na a'mwera dinyina 'Gotiyai Naangelyi. Gotiyai byaanna diraginya' kininnakelyi.' Sare'nesi. Nabaai niminyina 'Gotiyare Gawaalivaangei Naangelyi. Byaannakelyi,' daka nabalya sa' yima'niwa'di.” ⁵ Jizaazai Maathaviji gamire ganyaabulaangeviji Lazaarazariji saginyirakaavina wivu'nakelyira. ⁶ Sarevidaa'nyi “Nabalinakei mwaali,” widaasagilya' Jizaazai kadika wi'nyina yaka saba mwaalakeba yirika piryaari kuna mwaalina. ⁷ Mena kuna mwaalina yaka

gamireraavi widina “Kwaaka Juthiyanna Lazaarazare angewinna ayina wawaana!”

⁸Gamirera widina “Akai, nejiwaakadinyaigi kigaa' maalikageaa' Juyara dinyina ‘Jizaazari silaangeji liwakaana!’ Sare'na Juthiyanna ayina jitheigi daaka!”

⁹Jizaazai ja'nawidina “Nimiregaa' mi'na daaka! Yithaa, yirikegaa' nyilyai dadehaa' (12 aawaaya) midaaka! Kwaaka davaki yirike' pu'daasiyagaa' a'mwe pwai yirikevi kaanna yamarina yajai kwaaka davakiya baake' tinna wangade'na mala myamaari yadelyi. ¹⁰Sare' kiri' sawisavi sai kaanna yamarina yajai baake' gaminyi mularike'na mala yamaaradelyi. Dahaa' yirike'bisagaa' wawaana!” ¹¹Sa widina yaka piri' widina “Neya'mwei Lazaarazai se wa'mwaka kiri' kaanna wawa'muri yidikaavideinyi.”

¹²Sarevidaa'nyi gamirera widina “Naangeigi, se wa'manike' tewaanyabulyi. Divi nalaaya' mena yadelyi. Sare'na mawaanna!”

¹³Jizaazai gamire balya'nebwina widakesi. “Lazaarazai mena baimwaka.” Gamirera yawi'na “ ‘Se wa'mwaka,’ nediwakesi.” ¹⁴Sara yawi'na yesavidaa'nyi Jizaazai aangyagaala kave widina “Lazaarazai baimwakelyi. ¹⁵Savidaasi kiri' gaminyaba mamwaalyiwe'na ‘Nimirera nyilimwagapika!’ dena yilaaya yivanige. Sare' gaminyawinna kaanya wawaana!”

¹⁶Sarevidaa'nyi A'mwe Tomaazai Jizaazare pwaraavi widina “Wikira. ‘Gamiji balaana!’ dawaaji yuyainaji wawaana!” wida'. Tomaazai gira'miraala maarakei mwaalaka kunnya yagaala “Dithimaazai,” wo'nikelyi.

Jizaazai a'mweraavi wimwaihya'neji baryaraavi yidikaaya'nejia'nesi.

¹⁷Sarevidaa'nyi Jizaazai kaanna wina yina yaka savina yi'ma'na yakegaa' dara wi'nake' “Lazaarazai kabaimwa'di' yirika daryaai daryaalyavi simaangevi wakinikelyira.” ¹⁸Anga Betaani sa' Anga Jeruzaalemidaa'nyi esabera. Jeruzaalemidaa'nyi kilomitaaya dawaai dasaba mannikebanyi Anga Betaani. ¹⁹Juyara “Betaani esabera,” dina yeva kwalaalyara Maathaviji Maariyaaviji sanadaarina angyiri'maata yina. “Kirya'mwerina kale'na wigaimwagaana! ‘Kale nyiwaka,’ widaana!” deva angyiri'maata yina.

²⁰Maatha' kadika dara wi'nake' “Ai, Jizaazai davivanika!” Sara dakevidaa'nyi mwasawinna walyawijima'naawina kya' gannya angevi Maariyaa' mwaalina. ²¹Maariyaa' mwaalina yadi'nyi Maatha' Jizaazari wijimaa'nyina yaka widina “Naangeigi, dava mwaaidizi kwaji nyidaakaangei mabalyi kyadika! ²²Savina kiri' yawi'na ‘Nabaai dahaa' sagaa' gimi Gotiyari jiwaara'de'na Gotiyai sara wijaavadelyira.’ Sara yawi'mwe'nyi.” ²³Jizaazai widina “Jithaakaangei mwaaladei

dikaavadera.”²⁴ Sara widina kya' a'mwe' widina “Nimi yawi'na ‘Aayagaa' Kwaaka dava' aaya' yima'nadehaa' dikaasagaa' ayina mwaaladelyi. Dikaavadelyi,' sara yawi'mwana.”²⁵ Jizaazai widina “Nimi a'mweraavi a'mwengi yidikaa'dinyaini niminyira. Dikaasabwi niminyira. Nimi a'mweraavi a'mwengi wimwaaihadinyaini. Gaalyabwi niminyira. Pwai nyilimwagazai balajai mwaaladelyira.”²⁶ Gazaizai tewaanna mwaaida nyilimwada yuyagaa' mabalyi yadelyira. Arikawi. Sabwina dalimwamanigi?”

²⁷A'mwe' widina “Yo, Naangeigi, giminyina dara limwamanige ‘Gimi Kiraazitiyaigi Gotiyari Gawaalivaangei Kwaaka davakina bahinyaiginyira.’ Sara yawi'na yiwe'nyi.”

Jizaazai kinna dake'nesi.

²⁸Sa' Maatha' widakegaa' ayina wina yaka ganyaabulaanga Maariyaavi kave danganna yaka kuku'nya widina “Dava Nejiwaakadei bamwaaalaka githathelyi.”²⁹ Widina kya' a'mwe sa' wi'nyina, daavina yaka wijimaa'nya'ne' yarai walyuna. ³⁰Sagaa' anga saba Jizaazai mwilaabyi. Aawa. Maatha' wijimaa'nakeba kuna mwaalina yakelyi. ³¹Yarai walyuna kya' angevi Maariyaayaba Juyara wilamwaina yeva kale wiakera tinna dara wanganesa' “O, Maariyaa' daavina yaka yarai walyuvanike' daaka!” Sara devevidaa'nyi midinaabina. Juyara yawi'na “Gilaayari wakinikeba kinnya'na walyuvanika,” yawi'na yeva midinaabina ye'.

³²Jizaazaryawinna Maariyaa' yi'ma'na yaka tinna wangadevidaa'nyi gamire sivilyaraari wala'na yaka avaa'ina widina “Naangeigi, dava mwaaidizi kwaji nyidaakaangei mabalyi kyadika!”

³³Maariyaa' kinna dadaasi Jizaazai tinna wanganna. Nabaai gamiji Juyara besara kinna dadaapi Jizaazai tinna wanganna. Tinna wanganna yakevidaa'nyi kale naanga wiadaasi gamire kuryari simuyiwaala yawi'na, a'mwera barya'na simunya kwalaalya yawi'na. ³⁴Simunya kwalaalya yawi'na yaka yiwaara'na “Sarimi gawi wakiwa'daava?” Kumi widina “Naangeigi, bwanganna ja!”³⁵ Widina kye' Jizaazari kidaraalya walaabina. ³⁶Kinna dina yadaa'nyiya'na Juyara dinyina “Yithaa, Lazaarazarina tewaanya wivu'nakerinesi.”³⁷ Dinyina kye' kiri' pwara dinyina “Tibinyari ‘Tinna jena!’ wida! Sa'na daaka! Sarebaaibi' gami widina ‘Lazaarazai mabaidinna!’ widazi kwaji sahwai mabalyi kyadikei daaka!” dinyina ye'.

Balakeri yidikaavakerinesi.

³⁸Sarevidaa'nyi Jizaazai kale naanga ayina wiadaasi gaminyi simuyiwaala ayina yawi'na yada gilaayai wakinikewinna wina. Gilaaya wakinike sa' simaangesi. Simaangevi tikuryavi silaangeva' tih'nikesi. ³⁹Gilaayai wakinikewinna mena wina yaka widina “Silaanga da'

divaasila!” Sara kuda' Maatha' gilaayari ganyaabulaange' widina “Aawa, Naangeigi, butirinya' wilarika. Sare' dare'nesi. Yirika daryaai daryaalyariki dahaa!”

⁴⁰Jizaazai widina “ ‘Gimi nyilimwaga'gizi Gotiyare byaanna diraginyabwi tinna dangade'ginyi,' githiweinyi midaaka!” ⁴¹Sara widina yakevidaa'nyi silaange' baasina. Mena baasina kye' Jizaazai maranganna yaka widina “Nimwai, ‘Su! Su!’ githiwa. Kadika nyu'niwaanya'na ‘Su,’ githiwa. ⁴²Yuyagaa' kadika nyu'nadinyaiginyine'na yawi'mwe' kiri' dava kwala naanga mwaaihasaraavina sara githiwa. “ ‘Gotiyai Jizaazari yasaabakeva,” limwabika! dena sara githiwa.” ⁴³Sa mi'na widina yaka maanguraaya naangeva'na jaka widina “Lazaarazaigi, dalyaama!” ⁴⁴Sara widina kya' baryai walyaabina. Baryare asiraalyi sivilyiraalyi kwaabihannya' gwavaaihi'nike!, gamire sinnya' kwaabiyivisa' gwavaaihi'nikelyi. Sare kiri' baryai walyaabina kya' Jizaazai a'mweraavi widina “Kaanya wawode'na ji'daalyila!” wida'. Kuda' sara ye'.

Juya naangera “Jizaazai baladelyi,” dinesa'nesi.

(Matiyui 26:1-5; Maaki 14:1,2; Luki 22:1,2)

⁴⁵Sarevidaa'nyi Juyara Maariyaa' angyiri'maata yeta kwalaalyara Jizaazai yake' tinna wanganeva Jizaazari limwanna yadivi! “Kiraazitiya sahwalyi,” dina. ⁴⁶Sara dina kye' kiri' pwara A'mwe Periziyaraayawinna wina yeva Jizaazai yake'na widina. ⁴⁷Mi'na widina yesavidaa'nyi Periziyaraji Gotiyarina yira'divita naangeraji Juyaraavire Kaajoliyaraji yi'bwa'na yeva dinyina “ ‘Gara yaadevaka?’ A'mwe dai yijiwaainya kwalaalya yivanikele! ⁴⁸Nemi mujina ‘Sabwi minnera!’ muji yaaja' yuyara gaminyi limwabi'delyi. Sara kyapiji A'mwe Romiya naangera yaasina kyapiji aawilasara bina yapi Gotiyare Angevi kayaaka yigalapi yita davaakiya Juyainaavi neramakipi'de'nanyi.”

⁴⁹Kumijiya pwai Kaayapaazai wo'nikei sagaa' Gotiyarina Mubithika Yira'de Naangei mwaalina yaka widina “Siduta maayaihilyi. Aane piri' kiri' myawiriwaava. ⁵⁰Pwai a'mweraavina balana! Gave pwai balaja' nemire yisavaakiya yuyaraavi kayaaka myigalakipina! dawaaji sa' tewaanyasi. Sara myawirivanigasaihi daaka!” ⁵¹Sare' widina yake' sai gavei sara mujakelyi. Aawa. Kwarama sagaa' Gotiyarina Yira'de Naangei mwaainikerine' Gotiyare yagaala wida' “Juya yisavaakiyara mabaibina! Jizaazai sahwaravina baladelyi.” ⁵²Sara dake yisavaakiya sahwaravina gavera mi!. “Pwara piwinna piwinna kigaakuna yosinigasara Gotiyarera yima'nipika!” dozi yuyara Gotiyare avaalayaraavi maryi'bwaramwaaihade'na Jizaazai baladelyi.

⁵³Sarevidaa'nyi sagaa'daasi Juya naangera “Sahwari tamakaana!” deva dinyina “Davwina tamakaana! Pibwi dingaka? Gevwi dingaka?” ⁵⁴Mi'na jamungajakina yesavidaa'nyi Kwaaka Juthiya a'mweraayaba ku'maayaba

Jizaazai kaanya myamari ya! Aawa. Ya'ma'na yaka a'mwamaayaba pimaginna kaanna wina Anga Yipireminei. Saba gannyarari mwaalina yakelyi.

⁵⁵Juyara yawi'na “Gotiyai yikamaangeraavi tamakyaake! Ne sinnawinyaraavi maramaki yaka kave pari'mayaake'nanyi.” Sara yawi'divi' “Pari'ma'munne! tika naana!” dadivi' yi'bwa'nemwaaina yesasira. Munne sa' aya kigaa' kyima'na' wawinyangidaa'nyi Anga Jeruzaaleminera yilaawina. “Nemi Munne' naadeinaavine! kiwinya' sara dinike' aalya' yinaana! Kwaabihannyaji baazi'ma'nyaji aalya' yaana!” deva yilaawina. ⁵⁶Yilaawina yesavidaa'nyi dina “Jizaazai damwaalika?” dina yeva Gotiyare Angevi yikabina yeva dinyina “Beri' divanigina? Munnevina sai mabi yadei daaka?” ⁵⁷Gotiyarina yira'divita naangeraji Periziyaraji yagaala widina “Sarimi yawi'na ‘Saba sahwai mwaali,’ yawi'na yipija' sare' yarai dinejila!” Kumi “Jizaazari wila pwiyaana!” dina yeva sara widina yesare.

Anga Betaani Jizaazari welivananya' dingake'nesi.

(Matiyui 26:6-13; Maaki 14:3-9)

12 ¹Juyara dinyina “Sawita dawaai dawaai dawaai kajinnoji Pari'ma'munne' naadera.” Dinyina yadaapi “Wila pwiyaana!” desavidaa'nyi Anga Betaanina Jizaazai wina. Anga saba Jizaazai a'mwe baryari yidikaavakei Lazaarazai mwaalakebe. ²Anga Betaani sabanna wina yakevidaa'nyi gaminyine wapaaya yidika kye! Maatha' wapaaya wimaarina. Nabaai wapewakya tevoliyavi gamiji walamwaaina yesarajiya pwai Lazaarazalyi. ³Sarevidaa'nyi yuyara nyina nyina yadaapi Maariyaa' Lazaarazari ganyaabulaange' welivanadalya' maarina yaka Jizaazari sivilyaraari dingina yaka gannya mijata saaminyasi yaalika yimwanna. Welivananya sa' wabatirinya naange' yinike' purirya naathiyangidaa'nyi welivananya nawi'nya' yavikaryadivisa' Maariyaa' nigwia naanga mubakesi. Dingina kya' anga yuneba wabatirinya' winnyina. ⁴⁻⁵Wabatirinya' winnyina yinike' gamire pwai Yizikeriyotiyai Juthaazai widina “Welivananya naange' kinaaya naanga naanga (yirika 300 wawinya'ne nigwia) mamubi be'na yiwaka! Nigwia sa nigwimaayaraavina yanga kujaavadikengira.” Sai divi maalikegaa' Jizaazare yikamaangeraavina Jizaazari yibwaridaakwadelyira. ⁶Juthaazai sai nigwimaayaraavina kale wina yake'na muji ya! Aawa. Sai kukelyi. Sai kumire nigwigilya' maremwaaidei, pigaa', pigaa' nigwia gaminyine maa'delyira.

⁷Sara widakevidaa'nyi Jizaazai widina “Madinna! A'mwe' sara yana! Divi maalikegaa' nyirakipi'dehaa' a'mwe sa' ‘Nimi welivananya yovirawakinike dingima!’ daka nyiwake'nesi. ⁸Sare' dare'nesi. Gazagaasagaa' sariminyaba nigwimaayara mwaabi'de' kiri' gazagaasagaa' nimi sariminyaba mamwaalyi yideinyira.”

“Lazaarazari tamakaana!” widesa'nesi.

⁹Juyara kwala naangera kadika dara wi'nesa! “Anga Betaani savi damwaalika!” Sara devevidaa'nyi sawinna kaanna wina. Jizaazai gaverina kaanya' mi!. Aawa. Nabaai Jizaazai Lazaarazari baryari yidikaa'na yakerina “Tinna wanganaana!” deva kaanna wina ye!.
¹⁰⁻¹¹Juya kwalaalyara Lazaarazari yidikaavake'na yawi'na yeva Juya naangeraavirebwi ya'ma'na yeva Jizaazari limwanna ye!. Sare'na Gotiyarina mubithika yira'divita naangera “Lazaarazariji tamakaana!” deva sara jamungajakina ye!.

Jeruzaalemi Jizaazai Kingiyai wilake'nesi.
(Matiyui 21:1-11; Maaki 11:1-11; Luki 19:28-40)

¹²Mwanyavi Pari'ma'munne'na kwala naange! besara kadika dara wi'nesa! “Ai, Anga Jeruzaalemina Jizaazai davivanika!”
¹³Sara deva Jizaazari yilaaya'na aaburyabisangire kiwasa maarina yeva gaminyi wijimaa'nya'na wina yeva jaka dina dina “Gotiyaigi, giminyi yilaaya yivanigo. Naangeigire yayavinei widasaabahinyari tewaanna diwio! Gotiyai Yizireliyainaavire maremwaaideri tewaanna wiano!”

¹⁴Jizaazai dogiya diwinyari birina yaka yilamwaaaina. Gotiyare bukuya! dinika

¹⁵“Anga Saayoni mwaalyaihi lika mipina!

Sariminyi maremwaaaina yadei dogiya diwinyari

Yilamwaaaina yaka, yithaa, bina yivanikelyi.”

¹⁶Sara dinike! saggaa! sinnawi gamirera sare'na myawiri ye!. Aawa. Jizaazai byaannakei ayina yima'nyina yakegaa! kumi dara yawi'na “Gotiyare bukuya! sara dinike! Jizaazari sara yawalyaadosi,” yawi'na yina ye!.

¹⁷Sinnawi Jizaazai baryari wilakyawidaa'nyai Lazaarazari jaka widaka baryari yidikaavakeryaba kwala bwa'naanya! mwaalina yeva tinna wanganna yevevidaa'nyi sa'ne! pwaraavi wijalikurakina.
¹⁸Sarevi kwala bwa'naanya naange! Jizaazai yijiwaainya! yake'na kadika wi'nyina yeva sahwari wijimaa'nyina ye!.
¹⁹Sarevidaa'nyi A'mwe Periziyara dinyina “Danganyila! Sahwaraavina nemirebwine aane piri! kiri! negaimwagyade! mika! Ya'ma'na neyivanigava. Yithaa, Kwaaka davaki mwaalyara yuyara a'mwe sari midinaawina yivanigava.”

Maavera Girikiyara Jizaazarina biresa'nesi.

²⁰Anga Jeruzaalemina wawesarajiya pwara Menya Girikiyara “Nemi Munnevi Gotiyari yilaaya yaana!” deva mwaalina.
²¹Sarevidaa'nyi Pilipi Kwaaka Galili Anga Betizaaita mwaalyaryawinna sahwara bina yeva yiwaara'na “A'mwe naangeigi, ‘Jizaazari tinna wanganaana!’ sara yawi'manigo.”

²²Pilipi kadika wi'naka kaanna yaka Ediruyari sara widina ya'. Ediruyalyi Pilipiji saraai Jizaazarina widaawina. ²³Mena widaawina kyagi Jizaazai ja'nawidina "Nimiregaa' yima'niwakegaaki. Dahaa' A'mweraavine Kaimiraayai byaannya' kininnakei yima'nadelyi. ²⁴Nebulya'na yihithivanige. Witizila pwai kwaakevina walaawina yori mabalyi yajai gavei kuna waradelyi. Sai kwalaalyara mima'nyi yadelyi. Kwaakevi witizilyai balajai kayaaka yajai yi, yirivadehaa' witizila naanga naangera maarina yadelyi. ²⁵Pwai gannya gaalyabwina Kwaaka davakina yuna wivu'nadei gannya kuryai yigaladelyi. Pwai gannya gaalyabwina Kwaaka davaki similika yuna widei yuyagaa' yuyagaa' gannya kuryai maremwaaladelyi. ²⁶A'mwe pwai kwai 'Jizaazari widaayima!' dina yajai nyimidinaabana! Nyidaayadei sara yoji nimi mwaaimujava sahiba mwaaladelyi. Pwai kwai nyidaayajai sahware Nimaamaangei gaminyine yaya' makiladelyira."

Gannya balyagaa'ne' Jizaazai widake'nesi.

²⁷Jizaazai widina "Dahaa' simuyiwaala naanga yawi'manige. Sare' beri' widijiwana? 'Nimwai, dahaa'ne savi dinyivadaihasamaaka!' Sara widijiwa! Aawa. Sahiri'na biweinyi. Daanga sagaa'na nyade'na biweinyi. ²⁸Nimwai, gimire yaya' byaannake' diraginna yima'nana!" Sara kuda' Sigunyavidaa'nyi maanguraaya' widina "Sa' byaannake' mi'na wakesira. Nabaai byaannake' ayina wakidesi."

²⁹Sarevidaa'nyi kwala bwa'naanya' daaveva maanguraaya' kadika wi'nyina yeva dinyina "Ai, yi'munya' pimwaka!" Pwara dinyina "Gotiyarine mamaayai ejeliyai widiwaka." ³⁰Sara dinyina kye' Jizaazai ja'nawidina "Maanguraaya' diwake' niminyine'na mi'. Aawa. Sariminyine'nanyira. ³¹Dahaa' Kwaaka yuyavaki mwaalyaraavine maryawibwasabwi yima'niwaka. Gotiyai kotiya' maryawibwaradelyi. Dahaa' Kwaakevaki mwaalyaraavi maremwaaideri (Kamaalyari) Gotiyai marasi'na yadelyi. ³²Kwaakevidaa'nyi munyaba yilamaranyakipijainyawinna yuyaraavi mwagi'nideinyira. Kwalaalyara nimirera yima'nipi'dere." ³³Sara widake' gamire balyabwina wijiwaaina'. Dara widinikesi. Yisaviri niliya kanyiramapiji balideinyi.

³⁴Sarevidaa'nyi kwala bwa'naanya' Jizaazari ja'nawidina "Nemire Kiwinyavi nedini! 'Kiraazitiyai yuyagaa' yuyagaa' mwaalagothelyi.' Sara nedinike'na 'A'mweraavine Kaimiraayai yilamarakipi'delyi,' be'na nediwaa? A'mweraavine Kaimiraayai aaihwala?" ³⁵Sara widina yesavidaa'nyi Jizaazai widina "Maalikegaa' sarimijiyaba Baakei kuna mwaaladelyira. Baakei kininnakeihi mwaaidivitabaabi' kaanya jamaryideihilyi. 'Jihinya' nanebwakalimwagaradika!' dapi sara jila! Jihinyavi pwai kaanya yamaryada tinna mwanganyi yada 'Gawinneinyaka?' dada yaasiwa'na kayaa'na wivanikelyi. ³⁶Baakei

mwaaidozi baakeri dilimwagarila! 'Nemi baakevine kaimiraayaina yima'naana!' dapi sahwari dilimwagarila!"

Juyara Jizaazari mu'nyesa'nesi.

Sa Jizaazai widakegaa' kaanna wina yaka "Sahwara nanyangabithika!" daka lika yulya'na. ³⁷Gamire yijiwaainya naanga naanga wilimwabine tinna wangadaapiji kiri' kumi malimwagyina. ³⁸Ne piropetiyai Aazaayai dinike! nebulya' yune'na yima'nya'ne'na malimwagyi ye'. Aazaayai sai dara dinike!

"Naangeigi, gimire yagaala dithaakwo' aai limwagaka!

"Naangeigi, gimire aangasa' wijiwaainaginya' aai banganaraka!"

³⁹Sarevi malimwagyi yesa'na Aazaayai yagaala piri' dinike'

⁴⁰ " 'Kumire tinnyaji nangabithika!' daka

'Kumire simunyaji nyawipidika!' daka

'Kumire tinnyangi pida'na yakere.

'Kumire simunyangi silya'bi' yiwagakaka.

'Tewaanyabwi maapijaraavi kwaji tewaanyaraavi

kumwaaihiwidika!"

⁴¹ Ne Aazaayai Jizaazare byaannya' tinna wanganaka gaminyina dake'na sara dinikesi.

⁴² Sare kiri' Juya naangera kwala naangera malimwagyi kye' kiri' Juya naangera kwalaalyara gaminyi limwanna. Limwanna yevera a'mwe Periziyaraavina lika yina yeva dina "Juyainaavire Lotuangevi nanyasi'nipika!" dina yeva a'mweraayaba nayaa mujalikurakyi ye'.

⁴³ Sare' dare'nesi. Sahwara yilaaya'na dina "A'mweraavire tinna byaannakeinyi yima'nya'ne' tewaanyasi. Niminyina 'Tewaanyalyi,' dinipika!" Sahwara maji "Gotiyai gavei niminyina 'Tewaanyalyi,' dana!" maji yeva a'mweraayaba Jizaazarina lika yulyakina ye'.

Jizaazare yagaalya' a'mweraavi kotiya' wijathe'nesi.

⁴⁴ Jizaazai jaka naangave'na widina "A'mwe pwai nyilimwagazai nimi gaveinyi nyilimwagathe'i mika! Aawa. Nyidasaabakeriji limwagathelyi.

⁴⁵ Sahwai nyanganajai sagaa' nyidasaabakeri wanganadelyi. ⁴⁶ Kwaaka davakina Baakeinyi baheinyi 'Gazaizai niminyi nyilimwagazai

jihinyavi kuna namwaaaladika!' dena baheinyira. ⁴⁷ A'mwe pwai

kwai nimire yagaalya' kadika wi'noji savi mamidinyi yajai sahwari

kotiya' yawibwarya'neinyi beinyi mi'. Sare' dare'nesi. 'Kwaaka davaki

mwaalyaraavi kotiya'na yawibwarima!' dena baheinyi mi'. Aawa.

'Kwaaka davaki mwaalyaraavi padaihasamaarima!' dena baheinyira.

⁴⁸ A'mwe pwai bule' nyijaavoji nimire yagaalya' mamaaryajai

kotiya' wijathe' kininnakelyi. Yirika Aayagaa' nimire yagaalya' sa'

sahwari kotiya' wijathesi. ⁴⁹ Yayo, nimire yagaala gave' nimi gaveinyi

mihizivanige. Aawa. Nimwai nyidasaabakei kiwinya' nyijaavaka yuya yagaala sare nyidake yihithivanige. ⁵⁰Nimi nayaa yawi'mwa 'Gotiyare kiwinya sa' yuyagaa' yuyagaa'ne gaalyabulyira.' Sarevidaa'nyi nimi sara yihithivanigenna Nimwai nyidakabaaibi' sara yihithivanigengira."

Jizaazai gannaraavire sivila aalya' yake'nesi.

13 ¹Juyara dinyina "Mwanyagaa' Pari'ma'munne' naadera," dinesagaa' sahigaaki. Jizaazai dara yawirake! "Dahaa' Kwaaka davaki ya'mava'muji Nimwaryawinna yilaawidehaa' daaka!" Sinnawi, kusagaa' Kwaaka davaki gamirera mwaalesaraavina Jizaazari tewaanya wivu'nada aayagaa' kuminyi ya'masagaa' tewaanya kuna wivu'nakelyira. ²Sawisavi Jizaazalyi gamirerari wapaaya nyina. Sagaa' Kotiya' Jadei Saaimoni Yizikeriyotiyari gawaalivaangei Juthaazari "Jizaazaryawinna yikamaangeraavi jivwaridaakwia!" widaka sahware simunyavi mena wakakegaaki. ³Sagaa' Jizaazai dara yawi'na "Nimwai nimire asiraarina diraginya yuya nyijaavakengira. Gotiaryawidaa'nyainyi walaabe. Gotiaryawinna ayina wideinyira." ⁴Sara yawi'da "Tewaanya' yima!" daka wapewakya'nevidaa'nyi Jizaazai daavina gannya baazi'ma'nya' wakaka munnaanyaba taawiliya' marayewaa'bwa'nyina. ⁵Marayewaa'bwa'nyina yaka aalimaa'gulyavi aalya' dingikina yaka gannaraavi sivila aalya gaai yaka taawiliya' yewaa'bwa'nyina yakesi yaalika yimwanna. ⁶Sarevidaa'nyi Saaimoni Pitaryawinna bina kya' Pitai widina "Naangeigi, nimire sivilyiraari aalya jiziwaana!" ⁷Jizaazai ja'nawidina "Dahaa' yivanige'na myawiriwaanya' kiri' divi jawi'deiginyi." ⁸Pitai widina "Yuyagaa' yuyagaa' nimire sivilyiraari aalya myi jitheigi. Arikawi." Jizaazai ja'nawidina "Gimire sivilyiraari aalya mi yiwija' nimiji dimwaaideigi mika!" ⁹Sara widina kya' Saaimoni Pitai widina "Naangeigi, sara nyidiwaanya' nimire sivila gaveraari aalya mi. Nimire asiraariji nimire minyaginyaviji aalya ja!" ¹⁰Jizaazai widina "Pwai aalya yimwakei gamire kilaakeji' yuyaji' aalya ya'ne' mwigainyadelyi. Aawa. Sahwai kaanya wivanikei gamire sivila kwaa'naka gaviraari aalya ya'nelyira. Sarimi tewaanyaihi girika maayaihilyi. Kiri' yuyaihirina mika!" ¹¹Sare' dare'nesi. Gamire yikamaangeraavina wibwaridaakunanyarina Jizaazai mena yawirake'na widina "Yuyaihi girika maayaihi mika."

¹²Sarevidaa'nyi Jizaazai kumire sivila aalya mi'na yakegaa' gannya baazi'ma'nya' yivisa' ayaba marakina yaka tevoliyavi ayina walamwaaina. Ayina walamwaaina yaka gamireraavi yiwaara'na "Sariminyi mi'na yihyiwebwi jawi'mwaava? ¹³Niminyina 'Nejiwaakadinyai, Naangeigi,' nyidivanigasa'na tewaanna divanigasaihilyi. Sare' dare'nesi. Sasareinyira. ¹⁴Sarimire Naangeinyira. Sarimire wijiwaakyainyi mwaaihe. Sahwainyi mwaalena sarimire

sivila aalya kyihyiwa sarimire sivila aalya yibizaihi. Pwaigi pware sivilyiraari aalya yijaigi. Sana sana yuyaihi jideihilyi. ¹⁵Sare' dare'nesi. Nimi tewaanyabwi yihiziwaainiwa. 'Sarimi sarebwi yihyiwebaai sara jila!' dena sara yihiziwaainiwa. ¹⁶Naanga nebulya'na yihithivanige. Yaasiwa'wawinyai maalikelyi. Gaminyi maremwaaidei naangelyi. Nabaai a'mweri widaasade a'mwe sai maalikelyi. Pwai sari widaasadei naangelyi. Sare'na nimi yiwebwi sarimi sara jideihilyi maalikelyi. ¹⁷Dahaa' nebulya da' yawi'mwaasabwi sara yipija' yilaaya naange' yadivi' tewaanaanga yihiyadeihilyira. ¹⁸Yuyaihirina myihizivanigeihilyi. Aawa. Yihithahilakeihirina yawi'mwa. 'Gotiyare bukuya' dinike' nebulya'na yima'nana!' kadozi sara yadelyi. Dara dinike 'Nimire wapaaya nadei nimire yikamaangai yima'niwakelyi. Gamire sivilyasi nyiramadelyira.' ¹⁹Sara dinike' dahaa' sa' myima'nyi yadehaa' sara yihithiwa. Sara yima'nadehaa' sarimi 'Ai, Jizaazai neda' "Mwaaiheinyi nimi sawainyi." "Nedake'na sawari wilimwagaraana!" dizide' yihithiwa.' ²⁰Sarei kayaa'na yade' kiri' naanga nebulya'na yihithivanige. A'mwe pwai nimi pwari widaasideri maarina yada niminyi nyimaaradeinyi. Nabaai, sawai niminyi maarina nyada nyidasaabakeri maarina yadelyira."

Yikamaangeraavina yibwaridaakwia'na Jizaazai widake'nesi.

(Matiyui 26:20-25; Maaki 14:17-21; Luki 22:21-23)

²¹Jizaazai widakegaa' gamire kuryari simuyiwaala yawi'da aangyagaala jalikurakina "Naanga nebulya'na yihithivanige. Sarimijiya pwai niminyina yikamaangeraavi wibwaridaakwadelyi." ²²Sara widina kya' gamirera tinna wanganna yineva yawi'na "Aarina nediwaka?" ²³Gamire pwai Jizaazai yilaaya wiakei Jizaazare kusimagi walamwaaina. ²⁴Sarevidaa'nyi Saaimoni Pitai tidiraginya wanganna yaka kavena widina "Nediwakerina jiwaaraka! 'Aaihwalaka?'"

²⁵Sara widina kya' Jizaazare kihisavi yokina'na yaka yiwaara'na "Naangeigi, aaihwalaka?"

²⁶Sarevidaa'nyi Jizaazai ja'nawidina "Girikula maalike' wape-aalyavi yaali'bwa'na ya'muji wijaawiwijai sawalyira." Sarevidaa'nyi girikula maalike' maarina yaka yaali'bwa'na yaka Saaimoni Yizikeriyotiyare gawaalivaangei Juthaazari wijaavina. ²⁷Wijaavina kya' Juthaazai maranyina yaka dina "Jizaazari kayaa'na yima!" dina kya' Saataani wilamwaaina. ²⁸Sarevidaa'nyi Jizaazai widina " 'Yarai yima!' diza' yarai ja!" Tevolyavi nesara yuyarajiya aane pwai kwai Jizaazai sara widake'na myawiri. ²⁹Sare' dare'nesi. Juthaazai nigwigilya' maremwaaidei mwaalake', gamirera pwarana dina "Jizaazai widina 'Munne'na nemi nyinya'ne wapaaya pini dimubya!' dahawidiwaka? 'Nigwimaayaraavina yanga dumaryaawa!' dahawidiwaka?" Gamirera yaasiwa'na dina yeva sarebwi myawiri ye'.

³⁰Juthaazai girikulya' dapanyina yakevidaa'nyi yime'nya'bi' walyuna ya'. Sagaa' sawisasira.

Yagaikiwinya mudike'nesi.

³¹Sarevidaa'nyi Juthaazai ya'ma'na yakegaa' Jizaazai widina “Dahaa' A'mweraavine Kaimiraayai byaannakei yima'niwaka. Dahaa' gaminyina Gotiyai byaannakei yima'niwaka. ³²Gaminyina Gotiyai byaannakei yima'najai A'mweraavine Kaimiraayai byaannakeri wimwaaihadelyi. Yime'nya'bi' byaannakeri wimwaaihadelyira. ³³Ninnya kaimiraayaihi, divi maalikegaa' sariminyaba kuna mwaaiheinyi. Birina yapiji kiri' Juyaraavi widiwa'devaabi' dahaa' yihithivanige. Nimi wiwijawinna diwideihi mi'. ³⁴Yagaikiwinya mudike' yihizaavanige. Sirya'mweraavina tewaanya yihivu'nana! Niminyi sariminyina tewaanya nyivu'nadevaabi' sariminyi sirya'mweraavina tewaanya yihivu'nana! ³⁵Sarimi sara yinapiji saburidaasi a'mwe yuyara sariminyina yawi'na ‘Sahwara Jizaazarerera.’ Yi sariminyi wivu'nyabwi waraja' sara yawi'na yihyipi'deihilyira.”

“Pitai niminyina ‘Menyalyira,’ widatheva,” Jizaazai widake'nesi.
(*Matiyui 26:31-35; Maaki 14:27-31; Luki 22:31-34*)

³⁶Saaimoni Pitai widina “Naangeigi, gawinneiginaka?” Jizaazai ja'nawidina “Dahaa' wiwijawinna manyimidinya'gizi kiri' divi nyimidinaadeiginyi.” ³⁷Pitai widina “Naangeigi, dahaa' mamidinaabyi gyiwineinyi be'na gideinyaka? Nimire gaalyabwi gihaimwagya'na wakiwa. Gimiji balideinyira.” ³⁸Jizaazai ja'nawidina “Niminyina gimire gaalyabwi dalakideigi daaka? Naanga nebulya'na githivanige. Sinnawi kukuraayai jaka majahaa' dahasaai dahaa' niminyina duthathe' ‘Sari myawiriwa. Menyalyi.’ Ya, duthathehaa'na!”

Jizaazai Nimwaryawinna nemakilaawade'nesi.

14 ¹Jizaazai gamireraavi widina “Sarinnya simunyangi simuyiwaala myawipina! Gotiyari dilimwagyila! Nabaai niminyi dinyilimwagyila! ²Nimaamaangere angevi ku'dika tewaanya kwalaalya yarinikengi. Sangi sarimi dimwaalyide'na yovigalakaawideinyi. Sabwi mwarya' kwaji savina muji kyihiwidika! ³Kaanna wiwija' saba sariminyina yovigalakiwija' ayina ba'muri ‘Nimi mwaaimujawi sarimi dimwaalyila!’ da'muji niminyineihiri yihimaarideinyi. ⁴Sawinneinyi wiwija' tusa'na yawi'manigasasira.”

⁵Tomaazai, gamirei widina “Naangeigi, wijawinna nemi myawiriwo. Sarevidaasi tusa'na gara yawiraajiwona?” ⁶Widina kya' Jizaazai widina “Sahwainyi tusa'neinyi. Nebulyainyi. Gaalyabwi aaya kaavilyainyi. A'mwe aane pwai kwai tuta pirivi bwawoji Nimwaryawinna yi'mavaabya'ne' tusa' piri' minyika. Aawana, niminnanyira. ⁷Niminyina

nyawipiji kwaji Nimaamaangeriji kyawipidika! Sare'na dahaa'daasi Nimaamaangeri yawi'divi' tinna wanganwaasaihilyi.”

⁸Pilipi widina “Naangeigi, Nimwarina dineyibwaridaakwa! Tinna wanganawaaji ‘Wikira!’ dinaadeinera.” ⁹Mena widina kya' Jizaazai widina “Pilipi, naangegaa' sariminyaba mwaaidinyagaa' manyanganyadinyaigi daa! Pwai niminyi tinna nyanganwakai Nimwari tinna mena wanganwakelyi. Savidaa'nyi be'na nyidiwaa? ‘Nimwarina dineyibwaridaakwa!’ ¹⁰Pilipi, dare' malimwagyijiwaana? ‘Jizaazai Nimwari wilamwaali'. Nabaai Nimwai Jizaazari wilamwaali!’ Sara malimwagyijiwaana? Yagaalya yihithiwe niminyidaa'nya mika. Nimwai niminyi wilanyimwaaidei nyidadaa'nyi yihithivanige. Gamire wawinya yivanikengira. ¹¹‘Nimwari wilamwaahe. Nimwai niminyi wilanyimwaali’, yihithiwe'na dinyilimwagyila! Sare'na ‘Aala!’ dina yipija' nimi Nimware wawinya yadinyanna dinyilimwagyila! ¹²Naanga nebulya'na yihithivanige. Kwai nyilimwagori nimi nayaa yadinya sawhai nayaa sara yadelyi. Yayo, Nimwaryawinna wawa'muji diraginaange' nimireraavina wijaavide'na yadinyangi nimirera wawilapi'dengira. ¹³‘Jizaazai sara sara dadevaabisanna widima!’ dapiji niminyi yaya'na kanyiwaaravapiji sara yidesira! ‘Yi a'mwera tinna wanganapiji Gawaalivaangeinyina a'mwera Gotiyarine yaya' munyaba makibika!’ da'muji sara yidesira. ¹⁴Niminyi yaya'na piri' kiri' kanyiwaaravapiji sa' sariminyine' yideinyira.

“Divi Kuryai Tewaanyai walaabathelyi,” Jizaazai widake'nesi.

¹⁵Niminyina tewaanya yihivu'naja' niminyine kiwinyanna sara jideihilyi. ¹⁶Nimi Nimwari yiwaara'na kya'muri ‘Maredaa'dei yi, Maredadei Pwai yuyagaa' yuyagaa' sarimiji mwaalana!’ dozi yihizaavadelyira. ¹⁷Sahwai nebulyabwine Kuryari Kwaakevaki mwaalyara mamaari yipinere. Sahwara Kurya sari tinna mwanganyi, siduta myawiri yadivisa'na mamaari yipi'delyi. Sarimi siduta yawi'maniga'. Sarimiji kuna mwaalaka divi sariminyi wilayihimwaaalade'na sawhari yawi'maniga'. ¹⁸Sigiraayaihiri mihyagalya'mayi yideinyi. Sariminyawinna ayina bideinyi. ¹⁹Divi maalikegaa' Kwaakevaki mwaalyara tinna mwanganyi nyipi'de' kiri' sarimi dinyanganyideihilyi. Nimi mwaaidinya'na sawhaihi dimwaalyideihilyi. ²⁰Sagaa' yima'nadehaa' nimi Nimaamaangerinyi. Sarimi niminyinyira. Nimi sariminyinyira. Yi sagaa' sare' jawiryideihilyira.

²¹Da pwai nimire yagaakiwinya kininnakei sa midida sawhai niminyina tewaanya wivu'nadelyi. Nabaai niminyina tewaanya wivu'nade sawharina Nimaamaangeri tewaanya wivu'nadelyi. Nimi sainyi sawharina tewaanya nyivu'noji sawharina nimi sainyi wijiwaainidelyira.”

²² Gamire pwai Juthaazai wo'nikelyi. Sai Juthaazai Yizikeriyotiyai mika! Juthaazai pwai mwaalakei widina “Naangeigi, maalikegaa' gimireinaavina giminyi dinejiwaainade! Kwaakevaki mwaalyaraavina mujiwaainyi jithe'na be'nanaka?”

²³ Jizaazai ja'nawidina “Pwai kwai niminyina tewaanya wivu'najai nimire yagaalya' midinna yadelyi. Sahwarina Nimaamaangeri tewaanya kuvu'noji saryabanna naariminidainaa bina yakwoihiji saryaba ku'dikevi mwaalakadelyi. ²⁴ Pwari niminyina tewaanya mwivu'nyivanikei nimire yagaalya mamidinivanikelyi. Sarimi yagaalya' kadika nyu'niwaasa' nimi gaveinyire! mika! Aawa. Nimwai nyidasaabakeresira.

²⁵ Sarimiji kuna mwaaidi sa yihithiwa. ²⁶ Nimwai yawi'na 'Jizaazarebwi nayaa wijiwaainana!' yawi'na yoji nimire yayavi sariminyawinna Maredaderi yasaabathelyi. Maredade sai Kurya Tewaanyalyira. Kuryai Tewaanyai yuyangi yihiziwaakoji, nabaai, yihithiwe yuya nayaa jawiryideihiri yihimwaahadelyira.

²⁷ Dahaa' kaanyagaa' yihithima! 'Tewaanna dimwaalyila!' Sareburidaa'nyi kwaamu'nanyabwi sariminyaba yagalya'mavidesi. Yi ninnya kwaamu'nanyabwi yihizaavide'nanyi. Kwaakevaki mwaalyara yaasiwa'na dina 'Tewaanna dimwaalyila!' yaasiwa'na dadivitabaabi' ninnya kwaamu'nanyabwi mujaayi yihyide'nanyi. Nayaa yihizaavide'na sarimire simunya' simuyiwaala myawipina! Simunya gami sa' lika myanna! ²⁸ Yihithiwa. 'Kaanya wawa'muji kiri' sariminyawinna ayina bideinyi,' diwe kadika nyu'niwaa'. Sarimi niminyina tewaanya nayaa yihivu'naji kwaji Nimwaryawinna wide'na yilaaya kypidika! Nimwai naangelyi. Nimi maalikeinyira. Sare'na yihithiwa. ²⁹ Dahaa' sa yihithiwa. Sa myima'nyagaa' yihithiwa. 'Divi sara kyima'nori dinyilimwagyla!' dena sara yihithiwa. ³⁰ Naangegaa' yagaala kwalaalya yihithideinyi mika. Sare' dare'nesi. Kwaakevaki mwaalyaraavi maremwaaidei 'Jizaazari kayaa'na yima!' daka bivani!. Sai niminyi aane piri' kiri' maalyalyira. ³¹ Aawa. 'Kwaakevaki mwaalyara “O, Jizaazari Nimwarina tewaanya wivu'nadelyira,” yawipika!' dena sara yivanige. Nimwai sara nyidakakabaabi' yuya sara yivanigeinyira,” wida'.

“Kaanyaana! Davidaa'nyi wawaana!”

Jizaazai giraiwila nebulyarinesi.

15 ¹ Jizaazai gannaraavi widina “Nimi sahwainyi giraiwila nebulyainyira. Nimaamaangei giraiwawinya' nayaa maremwaaidelyi. ² Sahwai niminyi taanya gazabaazabaa sila myi'nyadevaai pidalasi'na yadelyi. Nabaai gazabaazabaa sila yi'nadevaai 'Sabaai sila pini yi'nana!' dada nayaa pidaaina. Gami dina 'Taanya savi buwita yuya sedala waryaanya yuya pidaalima! Taanya sa' tewaanya' yima'nana! Yisila naanga yi'nadevaalyi.' Dina yaka nayaa pidaaina yadelyi. ³ Yagaalya'

yihithiwe' sarimire sidusangi tewaanyaihi girika maayaihilyira. ⁴Niminyi kuna dulanyimwaalyila! Sariminyi kuna wilayihimwaaalima! Taanya pibaai giraipiwila kaavilyavi kuna mwari yajavaai yisila gami sabaai myi'nyi yadevaaibi' niminyi kuna mulamwaalyi nyipijaihi yisila myi'nyi jideihilyi.

⁵Nimi sahwayini giraipiwila kaavilyainyi. Sahwaihi giraipiwila taanyabaraavihilyi. Pwai kuna wilanyimwaaalajai gaminyi kuna wilamwaaumujai yisila naanga yi'nadengi. Sariminyi mulamwaalyi yihyiwijaihi aane piri' kiri' nayaa mi jide'nanyira. ⁶Pwai niminyi mulamwaalyi nyajai taanyabaaibisari mwasilaa wasi'na ya'nelyi. Taanya sabara wasi'nikebara yawaka baihi'na yinikebara, sabara mari'bwarakina yinikebara dikevi marira'na ya'nengi. ⁷Niminyi kuna wilanyimwaaibizaihi nabaai sariminyi nimore yagaalya yihwarajaihi yawi'na 'Sa'na maarima!' yawi'na yapiji Gotiyari sara kyiiwaaravapiji sariminyina yima'nadesira. ⁸Sarimi yisila yi'nipija'na a'mwera tinna yihwanganapiji dina 'A'mwe sara Jizaazarerera,' dipi'desi. Sarimi tewaanna sara yapijiya'na a'mwera Nimaamaangerina dinyina 'Byaannakelyi. Diraginyalyi,' dinyina yipi'de'nanyi. ⁹Nimwari niminyina wivu'nadevaaibi' sariminyina sara nyivu'nadeinyi. Nimore wivu'nyaburi kuna dimwaalyila! ¹⁰Nimore kiwinya kuna midibiza' nimore wivu'nyaburi yinahu dimwaalyideihilyi. Nimi sainyi Nimaamaangere kiwinya midinena gamire wivu'nyaburi yinahu mwaaiheinyi. Sara yigevaaibi' sara dimwaalyideihilyira.

¹¹Sa yihithiwa. 'Nimore wivu'nyabwi sariminyi yihwarana! Sarimire yilaayabwi yuneba yihyeku'nana!' dena sa yihithiwa. ¹²Nimore kiwinya da' yihithima! Niminyi giminyina tewaanya nyivu'niwakabaaibi' nimore pwaraavina tewaanya givu'nana! ¹³A'mwe pware kware wivu'nyabwi gya'mweraavina wiadaa'nyi gamire gaalyabwi wakaja' naangebulyi. Naangebwi pibwi aane pwai kwari mwarika! ¹⁴Kiwinya yihithivanigengi yipijaihi nya'mweihilyira. ¹⁵Dahaa' myihizivanige. Yaasiwa'wawinyaihilyi. Maalikeihilyi. Widaayadei gamire maremwaaiderina yawi'na 'Beri' yadelaka? Nimi myawirivanigeinyi.' Sara yawi'na yade'na 'Nya'mweihilyi,' yihithiwa. Nimaamaangeri yuyanna wi'nena mena sara yihithiwa. Saburidaasi 'Nya'mweih,' yihithivanigeihilyi. ¹⁶Niminyi manyidahilakesaihilyi. Aawa. Sariminyi yihithahilakeinyi. Yihithahilakena dara yihithakiwa. Wawapiji giraipiwilyabaai sila naanga yadevaaibi' sarimi sara jila! Nabaai sila sa yuyagaa' kuna waragwona! Nimirebwi yawiramaa'na yadivi' nimore yayavina Nimwari yuya sara kyiiwaaravapiji 'Nimwai yihizaavana!' dena yihithakiwa. ¹⁷Sare' kiwinya' dara yihithivanige. Pwaigi pwarina givu'nana! Pwaigi pwarina givu'nana! Yuyaihi sara jila!

Kwaakevaki mwaalyara Jizaazareraavina sinna tika wida'de'nesi.

¹⁸Kwaakevakiyara Gotiyari myawiryadivisara sariminyina similika kuloji atika mamaru'napina! Dara jawiryide! 'O, sinnawi sagaa'

Jizaazarina similika dulaka!' ¹⁹Kwaakevaki mwaalyaraavireihi mwaabizi kwaji Kwaakevakiyara 'Nennya avaalayara,' dipiji kwaji sariminyina tewaanya kuvu'nadika! Sarimi Kwaakevaki mwaalyaraji mamwaalyigasaihilyi. Aawa. Dahaa' nimi Kwaakevaki mwaalyaraavidaa'nyaihiri yihithahilakeihilyi. Sarevi Kwaakevaki mwaalyara sariminyina sinna tika wida'manikeihilyi. ²⁰Kigaa' yagaalya' yihithe' jawirila! 'Yaasiwa'wawinyai maalikelyi. Gaminyi maremwaaidei naangelyi.' Sare'na yihimaremwaaidinyainyi niminyi kayaa'na nyevera, nabaai sariminyi kayaa'na yhipi'de'nanyi. A'mwera nimore yagaalyavi midinevera, nabaai sarimirevi yihimidibi'de'nanyi. ²¹A'mwe sara nyidasaabakeri myawirivanigasa'na nabaai niminyina 'Gamire yaya' kininnakera daaka!' dapiji yuya kayaa'na sara yhipi'derera. ²²Nimi kaanya mabyiwiji kwaji yagaalya' mujiwiji kwaji Gotiyai maji kyadi' 'Sidu'nakera kayaa'na yadivisare.' Sare'na mena widina ye'ne' sahvara mujina 'Nimi myawiryena yaasiwa'na yiweinyi,' muji yipi'de'nanyi. ²³Pwai niminyina sinna tika widavaka nabaai Nimaamaangerinaji sinna tika wida'manikelyi. ²⁴Kuminyaba diraginna myiwiji kwaji sare tinna mwanganyipiji kwaji sahwaravina Gotiyai muji 'Kayaa'na yeverera.' Diraginna sara kye yuyagaa' yuyara sara myesabulyi. Sare'na kiri' nayaa kye kumi tinna wanganna nyeva kuna kayaa'na yadivi' niminyinaji Nimaamaangerinaji sanidainarina sinna tika wida'manikerera. ²⁵Sahiri' wari'. Kumire Kiwinya' Gotiyai wijaavake' dinike' yune'na nebulya'na yima'nadesi. Dara dini' 'Niminyina sinna tika yaasiwa'na widavakerera.'

²⁶Maredadei Kuryai walaabathelyi. Sai nebulyabwi yadei Kuryai Nimwaridaa'nyai walaabathelyi. Nimwaridaa'nya Kuryari sariminyawinna yasaabideinyi. Mena kyasaaba'muji sai niminyina yihizalikurakadelyi. ²⁷Nabaai, sarimi niminyina pwaraavi duzalikurakyideihilyi. Aayawidaa'nyi nimiji mwaidaanya'na pwaraavi duzalikurakyideihilyira niminyina.

16 ¹'Nimirera niminyi nanyimarasi'nipidika!' dena yagaala sa kavena yihithiwa. ²A'mwera sariminyina similika kuloji kumi yihithipi'de 'Nemire Lotuangevidaa'nyi yuna dalyula!' Yithaa, kayaa'nanyagaa' pigaa' yima'nadehaa' a'mwera sariminyi tamakina yihyapiji kwaasi dina 'Yiwo' Gotiyare wawinya' widaayivanigoinera.' ³Nimwariji niminyiji manehyawiriwaasa'na sariminyi kayaa'na sara yhipi'dere. ⁴Sagaa' sara yapijiyagaa' 'Sarimi dara jawirila! "Ai, Jizaazai sara nedake yima'niwakengi,'" dena yagaala sa kavena yihithiweinyi.

"Kuryai Tewaanyai yadevulyi," widake'nesi Jizaazai.

Sinnawidaa'nyi sariminyaba mwaale'na yagaala sa mujina. ⁵Muji yihyena kiri' dahaa' divi nyidasaabakeryawinna ayina wideinyi yuya sa yihithivanigeinyi. 'Ayina wideinyi,' kyihithiwa kiri' sarimijiya aane pwai

kwai manyidaanganywa! 'Gawinneiginaka?' ⁶Sara kyihithiwa sarimire simunyangi kale naanga yuna yihyivani!. Kale naanga kyihyivani! kiri! ⁷nebulya! yihithivanige. Sariminyine nimi kaanya wide! tewaanyabulyi. Sare! dare'nesi. Nimi kaanya mwiwi yiwija! sariminyawinna Maredadei mabi yadelyira. Arikawi. Sare! nimi kaanya wina yiwija! sariminyawi sari yasaabina. ⁸Sari yasaabina kya'muji walaabina yoji Kwaakevaki mwaalyaraavi mena wijiwaainade 'Sarimi yuyaihi kayaa'nanyabwi yivanigava. Yida'maraangeburina nayaa myawirivanigava. Gotiyai kotiya! sariminyi yihizidavadelyira.' ⁹Niminyi manyilimwagyivanigasa'na kayaa'nanyabwi yivanigava. ¹⁰Nimwaryawinna tewaanyainyi kwawa'mwi yuyagaa! sarimi tinna dinyanganyideinyi mi!. Sa'na Kurya Tewaanyai 'A'mwera Jizaazarina nayaa yawipika!' dozi yida'maraangebwi wijiwaainade. ¹¹Kwaakevaki mwaalyaraavi maremwaidei Saataanimi kotiya! mena wijidavake'na Gotiyai yuyaraavi kotiya! wijathelyi. Sana sana Kurya Tewaanyai Kwaakevaki mwaalyaraavi wijiwaainadelyi.

¹²Yagaala piniji myihiziwa. Aawa. Dahaa! yagaala sa nayaa mamaari jideihilyi. ¹³Sa'na kiri! divi Kurya Tewaanyai nebulya! dadei sahwai walaabozi nebulya yuyangi nayaa yihibwaridaakwade. Sare! dare'nesi. Kuryai yawiroji gannya sidusa! muji yihyade. Aawa. Nimiji Nimaamaangelyi widakaja! yihithathe. Divi yima'nya'ne yihithathelyira. ¹⁴Sahwai niminyina dina 'Naangelyi,' yaka byaannakeinyi nyimwaaihadelyi. Nimore diwija! maarina yoji sa! yihithathelyi. Sara yihithozi byaannakeinyi nyimwaaihadelyira. ¹⁵Yuya Nimware sa nimorengira. Yuya Nimware yagaala sa widadinyangi. Sareburidaasi 'Nimore diwija! maarina yoji sa! yihithathelyi,' yihithiwa.

Kale'nesi yilaaya'nesi sawaarinesira.

¹⁶Divi maalikageaa! tinna mwanganyi dinyidera. Sagaa'daasi maalikageaa! kwavilavoji tinna dinyanganyideinyi." ¹⁷Sarevidaa'nyi gamire pwara gamire pwaraavi widina "Nediwake! be yagaalavaka? Nediwa! 'Maalikageaa! tinna mwanganyi dinyidera. Sagaa'daasi maalikageaa! tinna dinyanganyideinyi.' Nabaai nediwa! 'Nimwaryawinna wide'nanyi.' ¹⁸Sara nediwake yagaala 'Maalikageaa'na,' be yagaalavaka? Nediwanike! myawirivanigoina," widina ye!

¹⁹Jizaazai kumire yiwaarata wija'na yawirakei, widina "Yihithiwa. Maalikageaa! tinna mwanganyi dinyidera. Sagaa'daasi maalikageaa! tinna dinyanganyideinyi. Sa'ne sarimi sara jiwaara'nivanigava! ²⁰Naanga nebulya'na yihithivanige. Sarimi kinna, kidaata dizide! kiri! Kwaakevaki mwaalyara yilaaya yipi'desi. Sariminyi kale yihyade! kiri! divi sarimire kale! yilaaya yima'nadesi. ²¹Mudangegaa! a'mwe! gamiregaa! yima'nake'na bwaranyaryaba daanga wivida kale wiadesi. Nabaai mena maa'da gannya bwaranyai Kwaakevaki yima'nade'na yilaaya yina yadesi.

Yilaaya yade'na gannya kale'na ayina myawiryadesi. ²²Sarevidaa'nyi a'mwe! sara yadevaabi' sarimi sara jideihilyi. Dahaa' kale yihyivanike! kiri' tinna ayina wanganna kyihya'muji sarinnya kuryara yilaaya naanga yipi'deihilyi. Sarimire yilaaya sa' a'mwe aane pwai kwai kuka mipalamaari yadeihilyi.

²³Yirika savi niminyi aane piri' kiri' miwaarayi dinyideinyi. Naanga nebulya'na yihithivanige. Niminyina nayaa yawi'divi' Nimwari sara yiwaarapija piri' kiri' Gotiyai niminyine yayavi sara yadelyi. ²⁴Kigaa' niminyine yayavi myiwaarayi ye'. Dahaa'daasi sara yiwaaravapiji sa' daapina jideihilyi. 'Nemire yilaaya' naanga yinahu neyeku'nana!' dapiji dithaapyideihilyi.

Jizaazarebwi Kwaakevaki mwaalyaraavireburi wavila'nike'nesi.

²⁵Yagaala da ke'ba'nanyangi yihithiwa. Sara yihithena aawaaya pigaa' yima'nadehaa' ke'ba'nanyangi kuna muji yihideinyi. Aawa. Sagaa' Nimwarina aangyagaalya' kave yihithideinyi. ²⁶Yirika savi niminyine yayaviji yawi'divi' Gotiyari jiwaarayidelyi. 'Nimwari sariminyina yiwaaravima!' muji yihideinyi. ²⁷Sare' dare'nesi. Nimwai sahwari sariminyina tewaanya wivu'nade'na kadika nayaa yihu'nadelyi. Niminyina tewaanya yihivu'nivanike'naji 'Jizaazai Gotiyaridaasalyi,' yawi'divi' nyilimwamanigasa'naji Nimwai sariminyina tewaanya wivu'nivanikelyi. ²⁸Nimwaridaasainyi walaabena Kwaakevakina biweinyi. Nabaai dahaa' Kwaakevakidaasi ya'mava'mwi Nimwaryawinna ayina wideinyira."

²⁹Sagaa' gamirera widina "Yithaa, dahaasagaa' aangyagaalya' kave nedivanigi. Ke'ba'nanya aane piri' kiri' manejivanigi. ³⁰Dahaa' dara yawi'mwo' 'Ai, Jizaazai yuya yawi'delyi.' Nemire yiwaarata magiziwogaa' yuya sa nayaa yawi'di nayaa sara nedivanigi. Sarebwi yivaniginnyavi dara gilimwamwo' 'Ai, sahwai Gotiyaridaasai daaka!'"

³¹Jizaazai ja'nawidina "Dahaa' danyilimwamanigava! ³²Yithaa, aawaaya pigaa' yima'nadehaa' dahaaki. Dahaa' gazaigizaigi ginnya angevina likaanya wina jitheiginyi. Piwinna piwinna yiwinama'na yapiji nimi gaveinyi mwaalidewi dinyagalya'mayideihilyi. Nimi gaveinyi mwaalya'na mi'. Nimwai nimiji mwaalade'na gaveinyi mika. ³³Nimi dina 'Nimirera niminyi kwaamu'nanyabwi kininnakera mwaabika!' dena yuya sa yihithiwa. Kwaakevaki daanga naanga kininnakeihilyi. Sare' kiri' kwaakevakiya kayaa'nanya dathiwamwenna jivaimwannyla!"

Jizaazai gannyyaraavina Gotiyari widake'nesi.

17 ¹Yagaala sa Jizaazai mena widakegaa' sagaa' Sigunyavi maranganna yaka Gotiyari widina "Nimwai, dahaa' naangegaa' yima'niwakegaaki. 'Nyibwaalivaangei byaannakeinyi nyimwaaihana!'"

da'gizi Jiwaalivaangei byaannakeri dumwaa'ihya! ²Kilaa'naka yuyaraavi nyijaavaginyaraavina gimi dina 'Yuyagaa' yuyagaa'ne gaalyabwi wijaavana!' dahina sahwarraavi maremwaa'yabwi gaminyina wijaavaginyabaa'ibi' byaannakeri dumwaa'ihya! ³Yuyagaa' yuyagaa'ne gaala sabwi daresira. Gotiya Nebulyaigi Nawi'nya gaveiginyiji Jizaazai Kiraazitiyari widasaabahinyariji yawiramaata'nesira. Sa' yuyagaa' yuyagaa'ne gaalyabulyira. ⁴Kwaaka davakiyavi a'mweraavi gimire byaannyabwi wijiwaaine. 'Diraginna sara sara ja!' kanyidahi mena sara yi'mwanyina yena wijiwaaine. ⁵Kigaakuna Kwaakeva' myima'nyaakegaa' gimiji byaannyabwi kininnakeinyi. Nimwai, dahaa' byaanna sabwina gimi sahwaiginyaba byaannakeinyi dinyimwaa'ihya!

⁶Kwaakevaki mwaalyaraayawidaa'nyi pwaraavi wijaavina nyaginya sahwarraavi gimire sidusa'na gimire yaya'na wijiwaainiwa. A'mwe sara gimirera mwaale'. Gimirera mwaalesaraavi nyijaavaginyarera. Gimire yagaalya' mena midimwaa'. ⁷Mena midimwaa'saraavine dahaa' githivanige. Yuya nyijawaanya sare giminyidaa'nyangira. Nabaai sare' mena yawi'manigasarera. ⁸Yagaalya nyijaavaginya yagaala sa sahwarraavina wijaavina kye a'mwe sara daapina yeva nebwinna dara yawi'mwaa'sa' 'Yo, Gotiyaridaasai Jizaazai walaabakei daaka!' Nabaai dara limwamwaa'sa' 'Ya, Gotiyai Jizaazari jasaabaka!' Yi sare'na mena yawi'manigasarera.

⁹Kuminyina Gotiyaiginyi gyiwaara'manige. Kwaakevakiyara gimirebwi myadivisare. Kwaakevaki mwaalyaraavina magyiwaarayivanige. Aawa. A'mwe nyijawaanyaraavinesi. Giminyinera mwaaihasa'na gyiwaara'manige sahwarraavina. ¹⁰Nimire yuya gimirengira. Gimire yuya nimirengira. Sare' sahwarraavi byaannakeinyi yima'niwa. ¹¹Sare'na dahaa' giminyawinna bivanige. Kwaakevaki kuna mamwaa'lyi yidera. Kiri' Kwaaka davaki nimirera mwaai'bi'dera. Nimwai Tewaanyaigi girika maayaigi, ginnya diraginya' ginnya yaya' yawira'gizi saraavi tewaanna dimaredaaka! Gimire yaya sa' kanyijaavagi tewaanna mwaaihe. 'Nimiji gimiji avaalyainaai mwaaiholabaai'bi' avaalyara mwaai'bika!' da'gizi kuminyi sara dimaredaaka! ¹²Kuminyaba mwaaidi sahwarraavi maredaave. Ginnya yaya' diraginya' kanyijaavagi nimi diraginna maredaave. Dame diraginna maredaa'na yadi aane pwai kwari myagalya'mayi. Sara yadi kiri' gave pwai yagalya'masabwi kininnakei yagalya'mavadelyira. Sarerina kigaakuna gimire Bukuya' sara dinike'nanyi. ¹³Diraginna maredaa'na yena dahaa' giminyawinna bivanigeinyi. 'Kuminyi yunebanna nimire yilaayabwi yeku'nana!' dena Kwaakevaki yagaala sa sara githivanige. ¹⁴Gimire yagaalya' nimireraavina nayaa wijaawa. Kwaakevakiyaraavi sahwarraavina sinna tika wida'mani!. Kwaakevakiyainyi mamwaa'lyigevaa'ibi' sahwarra Kwaakevakiyara mamwaa'lyigasa'na sinna tika wida'mani!.

15 “Nimireraavi kayaaka nyigaibithika!” dena kwaaka davakidaa'nyi dimakilaawa!’ magizivanige. Aawa. ‘Kayaa'nanaangei Saataani kayaaka nyadika! Davaki nimirera mwaaidapijiyaraavi dimaredaaka!’ Sara gyiwaara'manige. 16 Kwaakevakiyainyi mamwaalyigevaabi! sahwara Kwaakevakiyara mamwaalyigasarera. 17 Gimire wawinya'na nayaa yipi'de'na sahwara tewaanyara girika maayara nebulyaburi yima'nipika! Gimire yagaalya' nebulyasira. Yagaala sa' widiwesi. 18 Kwaakevakina nyidasaabahinyabaai Kwaakevaki mwaalyaraavi wijiwaakya'na widaase nimireraavi. 19 ‘Gimire wawinya'na nayaa yipi'de'na tewaanyara nebulyaburi yima'nipika!’ dena gimire wawinya'na nayaa yide'na kuminyine'na tewaanyainyi girika maayainyi wimwaalyige.

20 Nimirera sahwara gaveraavi Gotiyaiginyi magyiwaarayaiva. Aawa. Divi kumi pwaraavi niminyina widina kyapiji kumire yagaalyavi nyilimwabi'dera kwaraavinaji yawirena githiwa. 21 Nimwai, ‘Yuyara avaalyara mwaabika!’ dena gyiwaara'manige. ‘Giminyi wilagimwaaihe!, niminyi wilanyimwaaahinyabaabi! avaalyara mwaabika!’ dena githiwa. Nabaai, ‘Kwaakevaki mwaalyara dara limwabi'de'na “O, Gotiyai Jizaazari widasaabakelyira,” sara limwabika!’ da'gizi ‘Naariminyi wilanehimwaaibika!’ dithathe'na ‘Avaalyara mwaabika!’ dena gyiwaara'manige. 22 ‘Naarimi avaalyainai mwaaiholabaabi!’ sahwara avaalyara mwaabika!’ dena byaannya' mena nyijaavaginya sa' wijaawa. 23 ‘Kuminyi wilamwaalima! Niminyi kuna dulanyimwaala!’ githiwa. Gimi nyidasaabahi. Nabaai giminyi niminyina tewaanya givu'nadevaabi! kuminyina givu'naderera. ‘Yi Kwaakevakiyara sare' yawipika!’ dapiji ‘Sahwara avaalyaraavi yune'na wimwaaihaka!’ dakwoihiji kuminyi wilamwaalima! Niminyi kuna dulanyimwaala!

24 Nimwai, nimireraavi nyijaavaginyaraavina ‘Nimi mwaalideva nimiji mwaabika!’ da'muji simunya sara yawi'manige. Kwaaka dava' mwaki yaginegaa! niminyina tewaanya givu'nyaaake'na byaanna diraginya' nyijaye. ‘Byaanna sa' wangabika!’ da'muji ‘Sahwara nimiji mwaabika!’ githiwa. 25 Nimwai, yida'maraangebwi kininnakeigi, Kwaakevakiyara giminyi myawiryadivi! kiri' nimi sainyi giminyi yawi'dinyainyi. Nabaai gimi niminyi nyidasaabahinya'na a'mwe dara nimirera sara yawi'mwaa!. 26 Giminyina gimire yayavina sahwaraavi yibwaridaakwena nabaai, kuna yibwaridaakwideinyi. ‘Giminyi niminyina tewaanya givu'nadevwi kuminyi warana! Nabaai kuminyi wilimwaalima!’ da'muji yibwaridaakwideinyi sahwaraavi.”

Aawilasara Jizaazari wila pwiya yesa'nesi.

(Matiyui 26:47-56; Maaki 14:43-50; Luki 22:47-53)

18 1 Jizaazai sare mena widakegaa! gamirerari saba yagalya'maveva Aalya Kidironiyavi ga'ma'na ye! Saba yiwwawinya piji' wal'disiyaba.

Aalya Kidironiyavi ga'ma'na yeva wawinya savi wilamwaaina. ²Kigaa' wawinya savi Jizaazalyi gamirerari yikabadiwi' mwaalesa'na Juthaazai yikamaangeraavina Jizaazari wibwaridaakwakei wawinya savi yawi'nikei. ³Sarevidaa'nyi sai wawinya sawinna wina. Nabaai aawilasaraji Gotiyare Angevine dameraji kwara kaanna wina ye!. Gotiyarina mubithika yira'divita naangeraji Periziyaraji sara aawilasaraviji dameraaviji widasaawina. Widasaawina kye' kumire kwaari'masiraminya kilika maarina yeva laamuyaji yi'baaka livamakuna. Livamakuna yesaraavina Juthaazai Jizaazaryawinna yibwaramakuna. ⁴Sarevidaa'nyi Jizaazai gaminyine yuyangi yima'nya'ne yawi'na yakei, badaapiyaraayabanna bina. Badaapiyaraayabanna bina yaka widina "Aarina bi'manigava?" ⁵Kumi ja'nawidina "Naazareti mwaalyai Jizaazarina biwoinera." Jizaazai widina "Sahwainyi niminyira." Sagaa' kuminyaba Juthaazai yibwaridaakwai daavakelyi. ⁶Jizaazai "Sahwainyi niminyira," widina yakevidaa'nyi kumi samwi yigi'daa'na yeva kwaakewinna walakuna ye!. ⁷Sarevidaa'nyi sai ayina yiwaara'na "Aarina bi'maniga'?" Yiwaara'na kya' kumi sara widina "Naazareti mwaalyai Jizaazarina bi'manigo." ⁸Jizaazai ja'nawidina "Mena yihithiwa. Sahwainyi niminyira. Niminyi bi'manigasavidaa'nyi a'mwe dara nimirera wipika!" ⁹Mena widakei "Yune'na nebulya'na yima'nana!" daka sara widina ya!. Dara widakesi. A'mweraavi nyijaavaginyarajiya aane pwai kwari myagalya'mayiwa.

¹⁰Sarevidaa'nyi munnaanyavi Saaimoni Pitai kwaari'masiraminya' maruzaainyina yakei. Kwaari'masiraminya sa' labwa'nyina yaka pwari davina. Gotiyarina Yira'de Naangere yaasiwa'wawinyai damerari bina yaka daavina. Sai daavina kya' Pitai gamire kadiki' aangasimaginyi' yuna daku'na. A'mwe sarine yaya' "Maalikaazala." ¹¹Kadiki' yuna daku'na yakevidaa'nyi Jizaazai Pitari widina "Ginnya kwaari'masiraminya' ayina duzaainana! Gara yawi'manigina! Nimaamaangei daanga naanga nyivinade'ne kaapiya' nyijaawaka sa' manyi yideinyi daa! Nide'nanyi."

A'mwe Anaazaryaba Jizaazai daavake'nesi.

¹²Sarevidaa'nyi aawilasaraji kumire maremwaaide naangelyi Juya dameraji sara Jizaazari galalimwanna yeva gamire asawaari wila pwi'yina yeva ¹³sinnawi a'mwe Anaazaryawinna makuna. Sare' dare'nesi. Sagaa' Gotiyarina Yira'de Naangei Kaayapaazai mwaalakei. Kaayapaazari ganyaalimaangei Anaazai mwaalakelyira. ¹⁴Nabaai Kaayapaazai sai Juyaraavi widina "Gave pwai a'mweraavina balaja' yi sa' tewaanyasira." Sara widina yakelyi Kaayapaazai.

Pitai Jizaazarina "Maavelyi," widake'nesi.

(Matiyui 26:69,70; Maaki 14:66-68; Luki 22:55-57)

¹⁵Saaimoni Pitaiyi Jizaazare pwalyi saraai Jizaazari midinna. Gamirei pwarina Gotiyarina Yira'de Naangei nayaa yawi'na yadelyi. Yawi'na

yadei angwaasavi kusilaanna Jizaazalyi wilaawina. Jizaazari kuna midinna yagilyai wilaawina. ¹⁶Wilaawina kya' mwasilaa tikuryaba Pitai daavina. Sarevidaa'nyi gamire pwarina Gotiyarina Yira'de Naangei nayaa yawi'dei sai mwasilaanna ayina walyuna yaka tikuryavi maremwaaide sidiraayavi widina yaka kusilaanna Pitari makuna. ¹⁷Sarevidaa'nyi tikuryavi sidiraaya' Pitari widina “Pwaigiji a'mwe sahwareigi midaaka?” Sai kwaasi widina “Aawa, nimi mika!”

¹⁸Sagaa' yirilyagaaki. Sare'na dameraji yaasiwa'wawinyaraji dika marira'na yeva savi daavina yeva yimwannyina. Yimwannyina yadaapi Pitai bina yaka kuminyaba daavina yaka yimwannyina ya'.

Gotiyarine Tamira'de Naangei Jizaazari yiwaaravake'nesi.

(Matiyui 26:59-66; Maaki 14:55-64; Luki 22:66-71)

¹⁹Sarevidaa'nyi a'mwera dinyina “Anaazai, Gotiyarina Yira'de Naanga pwalyi.” Nabaai dinyina yesai A'mwe Anaazai Jizaazari yiwaara'na. Gamireraavinaji gamire wijiwaakyavinaji yiwaara'na. ²⁰Sara yiwaara'na kya' Jizaazai ja'nawidina “Yuyagaa' Kwaakevakiyaraayaba yuyaraavi ku'maayaba widadinyainyira. Juyainaavire lotuangengiji Gotiyare Angeviji saba wijiwaakina. Juya yuyara yikabadivisaba yuna wijiwaakina yadinyainyi. Lika yulya'na yagaala aane piri' kiri' mujadinyainyi. ²¹Sara yadinyainyine'na baa'na nyiwara'mwaa? A'mwera kadika nyu'nesaraavi yiwaarava'gizi githipi'derera. Yithaa, kumi yagaala sara wide'na nayaa yawi'na yesa'nanyira.” ²²Sai sara widina yakegaa' dame pwai Jizaazare maangwidaanyaba asasi jiri'bwararanna yaka widina “Ami, Gotiyarine Tamira'de Naangeri sara baa'na ja'nawidiwaana!”

²³Jizaazai ja'nawidina “Nimi kayaa'na widiwiji kwaji sa'na dava yuyara mwaailhasaraavi duziwaakya! Sa'na nimi tewaanna widiwe' baa'na nyiramwaana?”

²⁴Sarevidaa'nyi Jizaazai wila kuna pwiyinikeri Anaazai yaasina kya' Gotiyarina Yira'de Naangei Kaayapaazaryawinna pwara makuna ye'.

Pitai Jizaazarina “Maavelyi,” ayina widake'nesi.

(Matiyui 26:71-75; Maaki 14:69-72; Luki 22:58-62)

²⁵Sinnawi dikeyaba Pitai daavina yaka dikevi kuna yimwannyina. Kuna yimwannyina yadaa'nyi pwara Pitari widina “Nabaai, a'mwe sahwareigi midaaka?” Pitai kwaasi widina “Aawa, nimi mika!”

²⁶Saba Gotiyarina Yira'de Naangere yaasiwa'wawinya pwai mwaalina. Pitai a'mwere kadikiki yuna daku'na gamijiyarajiyai mwaalina. Sai mwaalina yaka widina “Wawinyavi salyiaiginyi tinna magwanganyijiwa?” ²⁷Sarevidaa'nyi Pitai kwaasi ayina widina “Aawa.” Widina yakegaa' yime'nya'bi' kukuraayai jaka dina ya'.

Ga'maaniiya Paailatimiyaba Jizaazai daavake'nesi.

(Matiyui 27:1,2,11-14; Maaki 15:1-5; Luki 23:1-5)

²⁸ Sarevidaa'nyi Kaayapaazare angevidaa'nyi Ga'maaniiya naangere anga kotiyavina Jizaazari makuna. Sagaa' byaaka mena yakegaaki. Jizaazari makuna yeva Juyara dina “Ga'maaniiyaraavire anga kotiyavina wilawaaji nemi kimaakeina nyima'naadika! Aawa. Pari'ma'munne tika naade'na,” deva kotiyavi mwilaawie'. ²⁹ Sarevidaa'nyi mwasawi daavesawinna A'mwe Paailati walyuna yaka yiwaara'na “A'mwe darina kotiyavi be kayaa'nanya'na divanigatavaka?”

³⁰ Kumi ja'nawidina “Sai kayaa'nanya' myaji kwaji giminyawinna mamakabi kyaadika!” ³¹ Sarevidaa'nyi Paailati widina “Sahwaihi makwalyuna yapi sarinnya kiwinya'na kotiya' a'mweri jila!” Juyara widina “A'mwe Romiyaihi kiwinya' nedakadivi' 'Kotiya'na aane pwai kwari maramakipinera! Sara nedadivisaihilyi.” ³² Sinnawi Jizaazai “A'mwera niminyi sara kyapiji balideinyi,” widakesi. “Gamire yagaala sa' yune'na nebulya'na yima'nana!” Gotiyai kadozi Juyara sara widina yesasi.

³³ Sarevidaa'nyi Ga'maaniiyaraavire anga kotiyavi Paailati ayina wilina yaka Jizaazarina dameraavi widina “Dalyamaraawila!” Sara widina yaka Jizaazari widina “Juyaraavi maremwaaidinya Kingiyaigi daaka?” ³⁴ Jizaazai ja'nawidina “Nyiwara'mwaanya' ginnya yagaalya' dingaka? Pwara niminyina githiwaasa' dingaka?” ³⁵ Paailati ja'nawidina “Juyainyi daaka! Niminyawinna ginnya yisavaakiyara Juyaraji Gotiyarina yira'divita naangeraji sara gimarimwaihiwaa'. Beri' yagineiginaka!” ³⁶ Jizaazai ja'nawidina “Kwaaka davaki nimore maremwaalyabwi maayasira. Kwaaka davaki maremwaaidinyainyi kwaji nyimididivisara dina ‘Juyara sahwari nagalalimwabika!’ kadipika! Sara dina yipiji kwaji Juyaraavi mala karabithika! Sare' Kwaaka davakidaa'nyi nimore maremwaalyabwi mwarika.” ³⁷ Sarevidaa'nyi Paailati widina “Nabaai, sarevi maremwaaidinya Kingiyaigi daaka?” Jizaazai ja'nawidina “Niminyina nyidiwaa ‘Kingiyaiginyi.’ ‘Nebulyabwina wijalikurakima!’ dina yena niwaa' nyimaarakeinyi, Kwaakevaki yima'neinyi. Sareinyi nimore wawinyasi. Gazaizai nebulyavina wivu'nadei nimore maanguraayavi kadika nyu'nivanikelyira.” ³⁸ Paailati widina “Nebulyabwi berivaka!”

Jizaazari tamakya'na Paailati widake'nesi.

(Matiyui 27:15-31; Maaki 15:6-20; Luki 23:13-25)

Sagaa' mwasawi Juyaraayawinna Paailati ayina wina yaka widina “Mena yawirena dina yiwa. Sai kayaa'nanya myiwakelyi. ³⁹ Sa'na kiri' sarimirebwina Pari'ma'munnegaa' kalavuzari yagalya'ma'dinyainyi.

Sarevidaa'nyi Juyaihire Kingiyari yagalya'mavijiwa? Simunya gara yawi'mwaa'?" ⁴⁰Sarevidaa'nyi kumi jaka ayina widina "Aawa, sai mika! Aawa. Baravaazari nejaama!" Baravaazai sai kuka yipalamaa'delyi.

19 ¹Sarevidaa'nyi Paailati sara widina kya' aawilasara Jizaazari maarina yeva wila lannakesi sara tamina. ²Mena tamina yeva taanya lannaka kave ghipaina yeva yamingaina yeva mwaihi'nya lannake' gamire minyaginyavi yilakina. Gamire minyaginyavi yilakina yeva kwaabiyivita wayaake' egwewaari yewaa'bwa'na yeva ³gaminyawinna bina yeva kwaasi yagaala widina "Naangeigi! Yuyagaa' Juyaraavire Kingiyaigi dimwala!" Sara widina yeva kunnya araraalyaji gamire sinnyavi jiri'bwararanna ye'.

⁴Anga mwasawinna Paailati ayina walyuna yaka kwala bwa'naanyavi widina "Yithaa, tamakya'na gamire kayaa'nanya' mwari'. Nimi birina birina yena gamire kayaa'nanya' mwanganyiwa. Dahaa' ' "Paailati gaminyi yiwetawakya' mabiramaariwaka," yawipika!' dena sariminyabanna makabivanige." ⁵Sarevidaa'nyi Jizaazai mwaihi'nya lannake' yilakinike' kwaabiyivita wayaake' yewaa'bwa'nikei mwasawinna walyuna. Mwasawinna walyuna kya' Paailati kuminyi widina "Yithaanyila! A'mwe dalaakana!"

⁶Sarevidaa'nyi Gotiyarina yira'divita naangeraji dameraji tinna wanganeva jaka dina "Yisaviri niliya diramo! Yisaviri niliya diramo!" Jaka dina kye' Paailati widina "Nabaai, sarimi maarapiri yisavi niliya diramyila! Sare' dare'nesi. Nimi gaminyi mabiramaariwa yiwetawakya!" ⁷Juyara ja'nawidina "Nemi kiwinya' kininnakeine. 'Gotiyari Gawaalivaangeinyira,' kwaasi sara nedivanike'na nemire kiwinya' dara dini' 'Balana!' "

⁸Sarevidaa'nyi Paailati yagaala sa' kadika wi'nyina yaka lika naanga yina yaka ⁹Ga'maaniyaraavire kotiangevi ayina wilina yaka Jizaazari yiwaara'na "Gawidaasaiginaka?" Sara yiwaara'na kya' kiri' Jizaazai maja'nawijina. ¹⁰Sarevidaa'nyi Paailati widina "Niminyi manyijiwaana? Jawika! A'mwe naangeinyi, gimire wilyabaai yaarina kya'muri diwode diraginya' kininnakeinyi. Nabaai, 'Yisaviri niliya diramyila!' kuda'muri divaide diraginya' kininnakeinyira. Sare'na jawika!" ¹¹Jizaazai ja'nawidina "Gimire diraginya' Sigunyavidaa'nyi Gotiyai magizaayaji kwaji diraginya aane piri' kiri' kininnakeigi mamwaalyi kyidika! Sarevi giminyawinna a'mwe kwai nyimakabiwakei, kayaa'nanya naange' kininnakelyira. Gimi kayaa'nanya maalike' kininnakeiginyira." ¹²Sarevi Paailati kadika wi'nyina yaka dina "Jizaazari makwaasima!" Dina yaka yaamiji yaamiji yina. Yaamiji yaamiji yina yadaa'nyi kiri' Juyara jaka naanga widina "Sari makwaasija' Romiyaihiri yihimaremwaaide Sizaareigi mika! Gazaizai dada 'Kingiyainyi,' a'mwe sai Sizaarina yikamaangelyira!"

¹³Sarevidaa'nyi sa Paailati kadika wi'nyina yaka kusawidaa'nyi mwasawinna Jizaazari wilamaraawina yaka kotiya' yadei yawibwa'deri namwaalyisavi walamwaaina. Saba Angwaata Silaange' wo'nikesi. Nabaai, Yiviruyagaalya' Gavaatha wo'nikesi. ¹⁴Sagaa' Pari'ma'munne wona sagaaki. Sagaa' kumire yuya yovirawakyagaa'. Sirigwajahaa' aya kigaa' yima'nakegaaki. Paailati walamwaaina yaka Juyaraavi widina "Yithaanyila! Dai sarinnya Kingiyalyi." ¹⁵Sarevidaa'nyi sahwara jaka naanga widina "Diramakya! Diramakya! Yisaviri niliya dirama!" Paailati yiwaara'na "Sarinnya Kingiyari yisaviri niliya tamidei daaka! Sara danyidiwaava!" Gotiyarina yira'divita naangera ja'nawidina "Nemire kingiya pwai mamwaalyi'. Sizaai gavei kingiyalyira." ¹⁶Sarevidaa'nyi sagaa' Paailati "Sari yisaviri niliya tabika!" daka wimwangimwaaihina ya'.

Yisaviri Jizaazari niliya tamesa'nesi.

(Matiyui 27:32-44; Maaki 15:21-32; Luki 23:26-43)

Sarevidaa'nyi aawilasara yisawa' Jizaazari wimaarina yeva Jizaazari makwalyuna. ¹⁷Jizaazari makwalyuna yadivi' sai gannya yisawa' yikwa'na yaka Gileminyaginyaba wo'nikewinna makuna. Saba Yiviruyagaalya' Golihota wo'nikesi. ¹⁸Makuna kya' aawilasara yita saviri niliya tamina. Nabaai, yisawaariri a'mwe pwaraari niliya tamina yesaraalyi. Jizaazare aangasimagi pwari niliya tamina, kwanaamimagi pwari niliya tamina. Tinnyaba Jizaazai. ¹⁹Paailati pikarya yida'na yaka aawilasaraavi widina "Jizaazari yisavi yagaala da' jilakyila!" Sara widina kya' sara yilakina. Dara pikarya yida'na "Jizaazai, Naazareti mwaalyai Juyaraavi maremwaaidei Kingiyai." ²⁰Sara yida'nike' yisaviri Jizaazari niliya tamesaba Anga Jeruzaalemi aya kiba wara'. Jeruzaalemi maalikeba wa'nike'na Juya kwalaalyara pikarya sa' tinna wanganna. Pikarya sa' Yiviruyagaalyasi Romiyaraavire yagaalyasi Girikiyaraavire yagaalyasi yida'nikesi. ²¹Sarevidaa'nyi Gotiyarina yira'divita naangera Juyara Paailatimi widina " 'Juyaraavi maremwaaidei Kingiyai,' pikarya myavikaryinnera! Aawa. Javikarya! 'A'mwe dai widadelyi "Juyaraavi maremwaaidinyainyi Kingiyainyireva." ' ' " ²²Paailati ja'nawidina "Nimi mena yida'mwe' yida'mwana! Mi'nanyira."

²³Yisaviri Jizaazari niliya tamevevidaa'nyi aawilasara Jizaazari baazi'ma'nya saza maarina yeva yanga munne'. Piwa' pwai maarina, piwa' pwai maarina, aawilata pwaraai pwaraalyara maarina. Nabaai Jizaazari baazi'ma'nya saaminaange' maarina. Baazi'ma'nya sa' yavikaryagaa' magipwalyakesi. Sa' yuneba tilayalawakina yakesi. ²⁴Sarevidaa'nyi baazi'ma'nya saaminaange' maarina yeva dinyina "Baazi'ma'nya da' yuneba gave piri'na miwi'nike' lihiwalawaaji namunnaadika! Aawa. Nemi saatuya wasi'nyi wasi'nya yawaaji saatuya'

tewaanya wawilavajai maaradesi.” Sare'na Gotiyai “Nimire bukuya' dinike! nebulya'na yima'nana!” kada' sara ye!. Gotiyare bukuya' dara dini'

“Nimire kwaabihannya yivita saza yanga munne'.

“Nimire baazi'ma'nya'na saatuya' yeva wawilavakei maara'.” Sarevidaa'nyi aawilasara sara ye'.

²⁵Yisaviri Jizaazari niliya tamesaba maalikeba ganaangesi ganyiwanaangesi Kilopaazare balaange' Maariyaasi Maahithaala mwaalya' Maariyaasi sa daavina. ²⁶Sarevidaa'nyi Jizaazai tinna wanganna. Nabaai gamirerina tewaanya wivu'nakei saba daa'di'nyi tinna wanganaka ganaangevi sarina widina “A'mwe'gi, yithaa, sai jiwwaalivaangelyi.” ²⁷Widina yaka gannyari widina “Yithaa! Dahaa' a'mwe sa' ginnya gwaangesi.” Sara widina yakegaa'daasi gannya angevi a'mwe savi maremwaala'.

Jizaazai balake'nesi.

(Matiyui 27:45-56; Maaki 15:33-41; Luki 23:44-49)

²⁸Sagaa' Jizaazai dara yawirake' “Yuya mena daaka!” Sara kada' Gotiyai “Nimire Bukuya' dinike' yuneba nebulya'na yima'nana!” kada' widina “Aalya'na mijika nyiwaka.” ²⁹Saba maa'gulyavi waainiya kayaa'nanya' yi'nikesi. Sarevidaa'nyi waainiya savi saalaalyaviya ji'minya' paihina yeva yita yizopiya taanyavi ji'minya' baazi'makuna yeva Jizaazari maryiki dihaihirakina. ³⁰Sarevidaa'nyi mi'na dihaihirakina yesagaa' Jizaazai waainiya' yaamiji nyina yaka widina “Yuya menanyira.”

Gannya minyaginya' tuta'naraka gannya kuryai wimwangimwaaihina ya'.

Jizaazari ligiligisaba aawilasai siraminya saaminya' livapina yake'nesi.

³¹Sagaa' Juyara kunnya Kwazaakegaa'na yovirawakina yadivisagaaki. Nabaai, Kwazaakegaa' sagaa' Pari'ma'munnegaa' Kwazaaka naangeagaaki. Kwazaaka naangegaa'na Juyara “Nemire tewaanyagaa' yisangi gilaayara warina nyipidika!” dineva Paailatimi yiwaara'na “ ‘A'mwera baibika! nediwaanyaraavi sivila kayaaka karingirawaaji yarai kabalapiri yisangidaasi makwalina yaadeina daaka?” ³²Paailati “Yo,” widakevidaa'nyi aawilasara bina. Piri' daresi. Jizaazaryaba a'mweraari tameta pwari sivilyaraai tingi'na, pwari sivila tingi'na. ³³Sivila tingi'na kye' piri' daresi. Jizaazaryawinna bina yeva dara wanganesa' “Ai, a'mwe sai mena davaimwaka!” Sara deva gamire sivilyaraai maringirina. ³⁴Aawa. Gamire sivilyaraai maringiri kye' kiri' aawilata pwai Jizaazare ligiligisaba siraminya saaminyasi livadaakuna. Siraminya' livadaakuna kya' yime'nya'bi' tawesi aalyasi bwalaravaawina ya'. ³⁵Sarimi

wi'nipine'na nimi tinna sara wangane sara yihizalikurakiwa. Jalikurakya sa' nebulyasi. “Sarimi dilimwagyila!” dena sainyi dara yawi'mwa “Nimi nebulya'na yihithivanigesira.” ³⁶Sare' dare'nesi. Sinnawi Gotiyai “Nimire bukuya' dinike' yune'na nebulya'na yima'nana!” kada' aawilasara sara ye!. Dara dini’ “Gamire yaginya aane piri' kiri' maringiri yadesira.” ³⁷Nabaai Gotiyare Bukuya gabinyaba dinyina “A'mwera pwari sraminya saaminyasi livadaakwapiji sari tinna wangabi'delyi.” Sara dinikesi.

Jizaazai gilaayari wakagilya'nesi.

(Matiyui 27:57-61; Maaki 15:42-47; Luki 23:50-56)

³⁸Sa mena yesagaa' Paailatimyawinna a'mwe naangei Jozepiyai Aarimathiya mwaalyai wina yaka yiwaara'na “Jizaazari gilaayari maarijiwana?” Jozepiyai sai Jizaazarei mwaalakelyi. Kiri' Juya naangera Jizaazareraavina sinna tika widavakevina lika ya!. Sa'na Jizaazarei mwaalake' lika yulyarakei. Sagaa' navika mwaalina yakei yiwaara'na “Gilaayari maarijiwana?” Sara yiwaara'na kya' Paailati widina “Yo, gilaayari dulamaraawa!” Widina kya' Jozepiyai wilaawina yaka gilaayari makabina. ³⁹Makabina yadaa'nyi A'mwe Nikothimaazai Jozepiyalyi bina. Nikothimaazai sai sinnawi sawisavi Jizaazaryawinna angyiri'maata yakelyi. Sai marazinanya wabatirinya' makabina. Marazinanya mesi marazinanya aloziyasi yegirilya' gilaayaraavi y'divisa' Juyara. Nikothimaazai marazinanya taanga teti (30) kilohiraami makabina. ⁴⁰Sarevidaa'nyi Jozepiyalyi Nikothimaazalyi saraai Jizaazare kilaakejiki marazinanya' wakina yadi' kwaabihannya saaminyaji pwiwina yagi. Sara yina yagilyabwi Juyara kumire gilaayaraavi wakya'ne'na sara yadivisabulyi. ⁴¹Yisaviri Jizaazari niliya tamina yesaba yiwawinya' warikebera. Yiwawinyavi gilaayari wakya'ne' simaange' wari!. Sagaa' simaangevi gilaaya aane pwai kwari mwaki yadivisasi. ⁴²Sarevidaa'nyi saba simaanga mudike' warike'na, mwanayavi Juyaraavire Kwazaakegaa'na saraai Jizaazari kave wilakina yagilyaraalyi.

Simaanga kune' wa'disiyavinesi.

(Matiyui 28:1-8; Maaki 16:1-8; Luki 24:1-2)

20 ¹Wikipiyavine yirika sinnawinya' Saadehaa' yirikunyagaa' jihinyavi simaangevina Maahithaala mwaalya' Maariyaa' wina yaka tinna dara wanganake' “O, Niwaava, simaadikuryavi silaange' davisinadaavika!” ²Sarevidaa'nyi kaanyave'na kaanyave'na wina. Jizaazari gannya pwarina tewaanya wivu'nadei salyi Saaimoni Pitalyi saraaryawi yi'ma'na yaka saraari widina “Simaangevidaa'nyi pwara Naangeri makwalyuna kyiwaa' nemi yawi'na ‘Gaziyaka? Gilaayari gazi makuwaatabanaka?’ ”

³Sarevidaa'nyi Pitalyi Jizaazare pwalyi ya'ma'na yagila walyaabina yagila simaangevina yarai wina. ⁴Saraai kaanyave'na wodaakilyi kiri'

Jizaazare pwai kaanyave'na naanga yaka Pitari wavila'na yaka sinnawi simaangevi yi'ma'na. ⁵Mi'na yi'ma'na yaka walaruta'nyina yaka kusawi kwaabihannya saamina tinna wanganna. Tinna wanganna yaka kiri' kusawinna mulaawina. ⁶Kusawinna mulaawi yadaa'nyi dividaasi Saimoni Pitai bina yaka simaanga kusawinna yarai bulaawina. Yarai bulaawina yaka savi kwaabihannya saamina wa'disi tinna wanganna. ⁷Nabaai Jizaazari minyaginyavi kwaabihannya saamina' gwavaaihi'nike' tinna wanganna. Kwaabihannya sa' kwaabihannya saamina piningyaba mwari ya'. Aawa. Gabinyaba gwavaaihi'nike' wa'disi tinna wanganna. ⁸Pitai tinna wanganna yakevidaa'nyi sinnawi simaangevi Jizaazare pwai yi'mavakei saggaa' wilina yaka tinna wanganna yada Jizaazarina limwana ya'. ⁹Sare' dare'nesi. Saggaa' Gotiyare Bukuya' dinike' "Sai mena balori ayina dikaavadelyira," sa' dinike'na kiriti myawiri yagilyaraalyi. ¹⁰Sarevidaa'nyi kirinna angevina saraai Jizaazaraai ayina wina yagi.

Maariyaa', Maahithaala mwaalyayaba Jizaazai daavina yake'nesi.

(Matiyui 28:9,10; Maaki 16:9-11)

¹¹Maariyaa' ayina bina yaka simaangevi mwasawi daavina yaka kinna dina. Kinna kuna dina yadevidaa'nyi walaruta'nyina yaka simaangevi kusawi tinna wanganna yaka ¹²Gotiyare mamaaya ejelijaraari tinna wanganna. Ejelijaraai baazi'ma'nya yaaka baazi'ma'nagileraai. Jizaazari kilaakeji' warakeba saraai walamwaaina yagi. Minyaginyayaba pwai walamwaaina, siviliyaraaryaba pwai walamwaaina yagi. ¹³Maariyaa' tinna wanganna kya' saraai widina "A'mwe'gi, kinna baa'na divanigina?" A'mwe' widina "Piwinna nimore Naangeri makuna kiyiwa' kumi wakina yiwaasa'na nimi mwanganyiwe'nyi."

¹⁴Sara widina yakegaa' ginyima'nyina yaka saba Jizaazai daa'disiyari tinna wanganna ya'. Sa' kiri' dara myawiryake' "O, Jizaazai daaka!" ¹⁵Sa'na maji kya' Jizaazai widina "A'mwe'gi, kinna baa'na divanigina? Aarina bi'di divanigi?" Widina kya' a'mwe' yawi'na yada "Yiwawinya' yadelyi," widina "A'mwe naangeigi, gimi damakuwaana? Sara yagina nyidana! 'Yinagaavaihaba sabanna wakuwana.' Sara kanyida'gizi sawinna wawa'muri maraawide'nyi nimi." ¹⁶Jizaazai widina "Maariyaa'!" A'mwe' gaminyina ginyiwanna yaka "Jizaazalyi," daka Yiviruyagaala widina "Raavoni!" Yagaala sa' "Nyijiwaakadinyai!" dinikesira. ¹⁷Jizaazai widina "Manyigalalimwadinnera! Sare' dare'nesi. Nimwaryawinna mena ayina yimwaaweinyi daaka! Sa'na nya'mweraayawi niminyine widina 'Nimwaryawinna ayina yilaawideinyi. Sai Nimaamaangelyi. Sai Sirinimaangelyi. Sai Ninnya Gotiyalyi. Sai sarimire Gotiyalyi. Saryawinna ayina yilaawideinyi,' sara duthana."

¹⁸Maariyaa' Maahithaala mwaalya' bina yaka gamireraavi widina "Ai, Naangeri tinna wangamwe'nyi," widina yaka Jizaazai widake' sara widina yakesira.

Gannaraayawi Jizaazai daavake'nesi.

(*Matiyui 28:16-20; Maaki 16:14-18; Luki 24:36-39*)

¹⁹Sarevidaa'nyi Saadehaa' sawisavi angevi Jizaazarera yikabina yeva kaanya lokiya nayaa tihina. Juya naangeraavina lika yina yadivi! kaanya lokiya nayaa tihina ye'. Tihinyina yadi'nyi Jizaazai yima'naabina yaka kuminyaba daavina. Tinnyaba daavina yaka widina “Nya'mweihi, kwaamu'nanya' yihwarana! Tewaanya dimwaalyila!” ²⁰Sara widina yaka gannya a'araraalyawaalyi gannya ligiligisaba wijiwaainnyina ya'. Sarevidaa'nyi gamirera Naangeri tinna wanganeva yilaaya naanga yina. ²¹Sarevidaa'nyi Jizaazai ayawi widina “Nya'mweihi, kwaamu'nanya' yihwarana! Nimwai nyidasaabakabaabi' sara yihithaasideinyira.” ²²Sa' widina yaka kuminyi pwa'nyi makuraasina yaka widina “Kuryai Tewaanyai sariminyi yihimwaalana! ²³Kyihimwaalori sarimi pwara kwaraavire yiwetawakya wasi'na kyapiji Gotiyai sara mena wasi'na yadelyi. Kwara pwaraavire yiwetawakya kuna ja'nayipija' Gotiyai avaina mena ja'nayadelyira.” Sara widina ya'.

Jizaazalyi Tomaazalyi saraarinesi.

²⁴Kuminyabanna Jizaazai bakegaa' Jizaazarera siviliyiraai ata puridaasi pwaraalyai Tomaazai kumiji mamwaalyina. Mamwaalyai Tomaazai gira'miraalyai. ²⁵Sarevidaa'nyi sai ayina bina kya' sawhara widina “Naangeri tinna mi'na wangamworinera.” Widina kye' Tomaazai widina “Kwaasi nyidiwaa'. Gamire asawaari niliya tamwa'daata yiwihwaaryawaari tinna mwanganyi yiwija' yiwihwaarya sawaari ninnya asai malakulayiwija' gamire ligiligisaba ninnya asi malakulayiwija' malimwagyi yideinyi. Arikawinyi.” Widina ya' Tomaazai.

²⁶Wikiya ayawinyariki angevi kusawinna Jizaazarera ayina yikabina yeva angevi bamwaaina. Nabaai Tomaazalyi mwaalina. Saggaa' kaanya yuya lokiya nayaa tihini'nikengi. Yuyara mwaalina yadapi kaanya tihini'nadi'nyi kir! Jizaazai yima'naabina yaka tinnyaba daavina yaka wida! “Nya'mweihi, kwaamu'nanya' yihwarana!” ²⁷Sara widaka Tomaazari widina “Davi ginnya asai daki! Nimire asiraari tinna dinyangana! Ginnya asi yiwibwa'na ya'gizi nimire ligiligisaba dinyulakaa! Nimi kwaihwaainakeinyina kuna manyilimwagyadinyaigi mamwaaidinna! Aawa. Nyilimwadinyaigi dimwaala!” ²⁸Tomaazai wi'nyina yaka ja'nawidina “Ninnya Naangeiginyi. Ninnya Gotiyaiginyira.” ²⁹Jizaazai widina “Tinna nyanganagina danyilimwamwaa? Pwara tinna manyanganyevera kibanna nyilimwamwaa'. Sarera yilaaya naanga yadivi! tewaanaanga winikeraavi Gotiyai wimwaaihaderera.” Jizaazai sara widina yakelyi.

Bukuya da' yida'nike'nesi.

³⁰Sarevidaa'nyi piri' daresi. Bukuya davi Jizaazai yijiwaainya saji tewaanya saji yakengi yida'mwa. Gannaraayaba Jizaazai naanga piniji

tewaanya piniji kwalaalya yina ya'. Sangina bukuya davi myidayi yiweinyi. ³¹Piri' daresi. Sara yida'mwe yawi'na yadi "Pwara yagaala da tinna wanganapiri dara limwabika! 'Jizaazai Kiraazitiyalyira. Gotiyai Jizaazari dahilakakelyira. Yithaa, Jizaazai Gotiyare Gawaalivaangelyira.' 'Sara limwabika!' dadi yida'mwa." Nabaai yida'mwe yawi'na yadi "Sahwara sara limwaga'divi' yuyagaa' gamire yayavi Jizaazarine gaalyabwi kininnakera mwaaibika!" Sara dina yadi bukuya da' yida'mwa.

**Jizaazai gamirera ata yuyi ata puridaasi
pwaraalyaraavi wijiwaainnake'nesi.**

21 ¹Sa mena yima'nakegaa' divi Aalibunya Taaiviriyaazavi Jizaazai gannaraavi ayina wijiwaainnyina. Dara wijiwaainnyina yakesi. ²Saaimoni Pitalyi Tomaazai gira'miraalyiyalyi Nataanyali Kwaaka Galili Anga Kena mwaalyalyi Sevathiyari gawaalivaangeraalyi Jizaazare pwaraalyi sara yikabina yeva aalibunyavi mwaalina. ³Mwaalina yadapi Saaimoni Pitai pwaraavi widina "Jawinya maarya'neinyi wideinyira." Sara widina kya' kumi widina "Gimiji wawaana!" Sarera wina yeva aalyavi sipiya' yila'disi yilamwaaina. Yilamwaaina yeva sawita yuyavi jawinyanne gilya wasi'wasita yadaapi jawinya aane pwai kwai mabwalaminaawi yina. ⁴Mabwalaminaawi yadaa'nyi nyilyai gaai byilyiri'daasiyagaa' aalimaangevi Jizaazai daavina. Jizaazai daavina yadi'nyi kiri' gamirera dina "Mudikelyi. Jizaazai mika!" ⁵Sarevidaa'nyi Jizaazai widina "Kaimiraayaihi, jawinya aane piri' kiri' kininnakeihi daaka?" Kumi ja'nawidina "Aawa." ⁶Sai widina "Sipiyavi aangasimagi jawigilya' marasi'na yapiri jawinya bwalaminaapi'dengi." Sarevidaa'nyi aangasimagi jawigilya' marasi'na yeva jawinya naanga naanga minnike'na sipiyavina ayina mamwagi'nyi yipinesi.

⁷Sarevidaa'nyi Jizaazari gannarina tewaanya wivu'nakei Pitari widina "Naangelyi." Sarevidaa'nyi Saaimoni Pitai "Naangelyi," kadika wi'nyina yaka yarai baazi'ma'nyina ya'. Sare' dare'nesi. Baazi'ma'nya yirainakei kunei mwaala'. Sara yaka aalibunyavi dikwosi'na. ⁸Aalyavi dikwosi'na kya' sipiyavi Jizaazare pwara yilamwaaina yeva, jawinya minnike' mwagi'nyina yadaapiji aalibumaangevina sipiya' makuna. Sare' dare'nesi. Kwaakevidaa'nyi etaba mi'. Aawa. Mitaaya 100 (waani aadireti) sipiya' makuna. ⁹Sarevidaa'nyi maangebaari sivila paihi'na yeva wapaasi dikwaagidikevi jawinya piraayakeji sa tinna wanganna. ¹⁰Tinna wanganna kye' Jizaazai widina "Jawinya ma'mwaata pini dimakabyila!"

¹¹Sipiyavina Saaimoni Pitai wina yaka aalimaangevina jawigilya' mwagi'namaa'na. Gilya savi jawinya naanga minnyina. Jawinya 153 yuya sa minnyina yakengi. Jawinya naanga naanga sa minnaka kiri' gilya' mamumunyiryakesi. ¹²Pitai gilya' mwagi'namaa'na kya' Jizaazai widina "Kaajila! Wapaaya dinyila!" Gamirerajiya aane pwai kwai yawi'na

“Naangelyi,” yaka “Aaihwaiginaka?” diraginna myiwaarayi, navika mwaalina. ¹³Navika mwaalina yadisi sangyawinna Jizaazai bina yaka wapaaya maarina yaka wijaavina ya!. Nabaai jawinyaji wimaarina ya!.

¹⁴Sare! dahasaai dahaa! Jizaazai gannyaraavi wijiwaainnakelyi. Mena balakei ayina dikaa'na yaka dahasaai dahaa! gannyaraavi wijiwaainnyina yakegaaki.

Jizaazalyi Pitalyi saraarinesi.

¹⁵Sarevidaa'nyi mena nesagaa! Jizaazai Saaimoni Pitari widina “Saaimoni, Jonimireigi, a'mwe daraavi niminyina tewaanya wivu'nivani! Gimire givu'nadevwi sahwaravirebwi davila'manika?”

Pitai widina “Naangeigi, yo, gimi mena yawi'mwaa ‘Pitai niminyi nya'mwelyira.’ Sara yawi'mwaanyasi.”

Jizaazai widina “Nimire sipizipiya maalikeraavina wapaaya duzaama!”

¹⁶Widina yaka pigasaai Jizaazai widina “Saaimoni, Jonimireigi, niminyina tewaanya givu'nivanikeigi daaka?” Widina kya! “Yo, Naangeigi,” Pitai widina “‘Pitai nya'mwelyi,’ mena yawi'mwaanyaiginyi.” Jizaazai widina “Nimire sipizipiyaraavi dimaremwaala!” ¹⁷Dahasaai dahaa! Jizaazai widina “Saaimoni, Jonimireigi, nimi ja'mweinyi daaka?”

Dahasaai dahaa! Jizaazai “Ja'mweinyi daaka?” widake'na Pitai kale wiadaa'nyi widina “Naangeigi, yuyangina yawi'mwaa. Nabaai ‘Pitai nya'mwelyi,’ sara yawi'mwaanyaiginyi.”

Jizaazai widina “Nimire sipizipiyaraavina wapaaya duzaama!” ¹⁸Naanga nebulya'na githivanige. Miginyaigi mwaalaginegaa! ginnya munnaanya! marina yadi ‘Yuyawinna wima!’ dina yadi sawinna wawaginyaiginyi. Sare! yadi kiri! neigi jima'nadehaa! ginnya asiraai yiwibwa'nyina kya'giri pwara giminyi wila pwiya gyapji ‘Sawinna mwiwinera!’ yawi'dinyawi sawinna makuna gyipi'deiginyi.” ¹⁹Sa! Jizaazai widake! dara dina “Pitai sara balina kyori sare'na Gotiyai byaannakei yima'nadelyira.” Pitari widina “Dinyimidinaama!”

Jizaazalyi gamire pwalyi saraarinesi.

²⁰Pitai ginyiwannyina yaka dusimagi Jizaazare pwari tinna wanganna. Sarina Jizaazari tewaanya wivu'nakelyi. Sai kigaa! wapaaya tika nyina yesagaa! Jizaazaryaba walamwaainike!, Jizaazari kave yiwaara'na “Naangeigi, giminyi yikamaangeraavina givwaridaakwodei aihwalaka?” sara yakelyi. ²¹Sarevidaa'nyi Pitai tinna mi'na wanganna yaka Jizaazari widina “Naangeigi, diwaanya'na a'mwe sarina berivaka?”

²²Jizaazai widina “Nimi sarina yawi'na ‘Kaanya ayina bidaha'na sai kuna yemwaaladelyi.’ Sara yawi'na yiwija! gimire wawinya! daaka! Sarebwina madinneiginyi. Dinyimidinaama!”

²³Jizaazai sara widakevidaa'nyi neya'mwera dara dinesa! “Ai, Jizaazarei sai mabalyi yadei daaka!” Sara kade! kiri! sa'na Jizaazai maji

“Mabalyi yadelyi,” Aawa. Maji yaka widina “Nimi sarina yawi'na ‘Kaanya bidehaa'na sai kuna yemwaaladelyi.’ Sara yawi'na yiwija' gimire' daaka!” Sara widina yakelyi Jizaazai.

²⁴Jizaazarei sai dangina nejalikurakivanike', nabaai sai yagaala da yida'na yakelyi. Gamire wijalikurakyabwina nemi yawi'mwo “Nebulyasira.”

Mi'nanya'nesi.

²⁵Yithaa, Jizaazai yake pini kwalaalyangine yagaala sa warikengi. “Yagaala yuya sa pikarya yida'na yiwiji kwaji Kwaaka yuyavaki maalikeba bukuya mwaki kyipidika! Bukuya naanga naanga kwaradikengi.” Sara yawi'mweinyi.